

EL SANTO EVANGELIO SEGUN

SAN JUAN

YOOZ TAKU CJITAČHA JESUCRISTUQUI

1 ¹Ima tii muntu želan Jesucristo želatčha. Jalla niičha Yooz Taku cjita. Nižaza Yooz Ejpžtančha. Niimi Yooz zakažza. ²Primirquiztanpacha niiqui Yooz Ejpžtanpančha. ³Jalla niž cjen Yoozqui tjappacha paachičha. Tjapa niž paatacamačha. Anaž yekjaž paataqui žejlčha. ⁴Jalla nižakazza žeti tjaachiqui. Nižaza žejtan žoñinacacqui persun kuzquiz zuma kamaña zizasaccha. Tsjii kjanažtakaz Jesucristuqui Yooz zuma kamaña žoñž kuzquiz zizkatñičha. ⁵Jaknužt tsjii kjanaqui zumchiquiz kjančhaja, jalla nižta Jesucristuqui zumchiquiz ojklayni žoñinacž kuzquiz zuma kamaña zizkatčha. Nii zumchiquiz ojklayni žoñinacaccha ana zuma kamañchizqui. Pero Jesucristuž cjenpankaz Yooz zuma kamaña zizasaccha.

⁶Tsjii Yooziž cuchañžquita žoñi želatčha, Juan cjita. ⁷Nižaza Jesucristučha zuma kamaña zizkatñiqui. Juanqui Jesucristuž puntuquiztan mažni tjonchičha, tsjii kjanažtakaz. Nižaza testicu cunta Jesucristuž puntu werara mazzinchičha. Tjapa žoñinacžquiz

nuž mazzinchičha, Jesucristužquiz criyajo. ⁸Juanqui anačha ultim Yooz zuma kamaña zizkatñiqui. Antiz tsjii testicu cunta tjonchičha, nii Yooz zuma kamaña zizkatñiž puntuquiztan mazzinzjapa. ⁹Jesucristučha ultimu Yooz zuma kamaña zizkatñiqui. Jalla niičha zapa žoñinacž kuzquiz Yooz zuma kamaña zizkatñiqui. Nižaza Jesucristuqui tii muntuquiz tjonchičha.

¹⁰Jalla nuž tjonžcu tii muntuquiz kamchičha. Nižaza niičha tjapa tii muntuquiz žejlñinaca paañiqui. Niiž paataž cjenami tii muntuquiz žejlñi žoñinacacqui Jesucristo ana pajz pecchičha. ¹¹Jesucristo Yooz Majchqui niž persun wajtchiz žoñinacžquiz tjonchičha. Pero nii žoñinacazti Jesucristo ana pajz pecchičha.

¹²Pero jakziltami nii Jesucristo pajz pecchaja, nižaza nižquin tjapa kuztan criichaja, jalla ninacacqui ultim Yooz maatinacapanž cjissa. ¹³Jalla nuž muñchičha Yoozqui. Anaž persun maa ejpž kuzcama, nižaza anaž persun kuzcama, nižaza anaž žoñiž pinsitacama, antiz Yooziž pinsitacama žoñinacacqui Yooz maatinaca cjissa.

¹⁴Yooz Taku cjita Jesucristuqui tii muntuquiz tjonžcu, žoñž curpuchiz wejtnacatan juntu kamchičha. Jalla tii muntuquiz kamcan Jesucristuqui Yooz

zuma okzñi kuz tjeeziĉha. Niĉaza Yooz lijitum kamañ puntunacami werara tjeeziĉha. Tii muntuquiz kaman, wejrnacqui niiz ancha zuma arajpach kamaña cherchinĉha. Niiĉha Yooz Ejpž zinta Majchqui. Jalla nižtiquiztan niiz tjeeža arajpach kamañaqui niiz kamañapankalĉha. ¹⁵ Juanqui nii Yooz Majch puntu mazzinchiĉha, tuž cjican:

—Jalla tiiz puntuquiztan tuqui chiichinĉha, tuž cjican: “Tsjliqui tjonĉha wejt jarupacha. Jalla niiĉha wejtquiztan juc'ant chekanaqui. Ima weriž nasan pan želatkalĉha niiqui”.

¹⁶ Nii Yooz Majchqui tsjan juc'ant zuma kuzziz cjen uĉumnacaquiz zuma arajpach kamañchiz cjiskatchiĉha juc'anti juc'anti. ¹⁷ Tuqui timpu Moisesqui lii mantitanaca žoñinacžquiz tjaachiĉha. Jaziqui Jesucristuqui Yooz zuma okzñi kuz žoñinacžquiz tjeeža. Niĉaza žoñinacžquiz Yooz zuma kamañchiz cjiskatĉha, niĉaza Yooz puntunaca zizkatĉha. ¹⁸ Jesucristuĉha Yooz Majchqui. Anapanž jec žoñimi Yooz cherchiqui. Niiž zinta Majch alajakazza Yooz cherchiqui. Nii Yooz Majchqui Yooz Ejpžtan tsjii kuzzizpankazza. Jalla nižtiquiztan niiĉha Yooz puntunacami werara zizkatñiqui.

JUAN BAUTISTAŽ CHIITA TAKU

¹⁹ Juanž mazzintaqui Jesucristuž puntuquiztan jalla tužuĉha. Jerusalén wajtchiz judfo žoñinacaqui Juanž puntuquiztan iya ziz pecatĉha. Nekztan timplu jilirinacami timpluquiz sirwiñinacami Juanžquin pewczñi cuhanžquitataĉha. Ninaca pewczĉha, tuž cjican:

—ĉAmqui jequimtaya?

²⁰ Juanqui zumpacha mazzinchiĉha. Nii pewczñi žoñžquiz ana nicchiĉha. Mazzincan tuž cjichiĉha:

—Wejrqui anaĉha Cristutqui, anĉhucaž tjewžtaqui.

²¹ Jalla nekztanaqui nii pewczñi žoñinacaqui wilta pewczĉha tuž cjican: —ĉJequimt amjo? ĉElías cjita profetamkaya?

Juanqui kjaaziĉha, tuž cjican:

—Anaĉha Eliastqui.

Nekztanaqui ninacaqui pewczĉha, tuž cjican:

—Nii profeta tjoniz cjizpacha, ĉniimi amya?

Juanqui kjaaziĉha, tuž cjican:

—Wejr anaĉha niitqui.

²² Jalla nekztanaqui ninacaqui cjichiĉha:

—ĉJecpant amjo? Wejrnacqui quintu chjitstanĉha wejrnac cuhanžquiñinacžquin. Am persun puntuquiztan ĉkjažum cjii?

²³ Nekztan Juanqui tuž kjaaziĉha:

—Wejrtĉha alto joržtan ch'ekti yokquin paljayiñtqui. Tuž paljayiñĉha: “Yooz Jiliržtajapa zuma kamañ jicz tjaczna”. Jaknužt Isafas cjita profeta chiitĉhaja, jalla nuž paljayiñĉha.

²⁴ Nii pewczñinacaqui fariseo žoñinacž cuhanžquitataĉha, Juanžquin. ²⁵ Ninacaqui pewczizakazza tuž cjican:

—Nižtaqui amqui anaž Cristumni, niĉaza anaž Eliasni, niĉaza anaž nii tjonni profetamni. Ana nižta žoñimžlaj niiqui, ĉkjažtiquiztan am judio žoñinaca bautisjo?

²⁶ Juanqui ninacžquiz kjaaziĉha tuž cjican:

—Wejrqui kjaztankaz bautisiñĉha. Judio žoñinacžquiztan tsjiiqui žejlĉha, jalla niiqui anĉhucqui anaž pajĉha.

²⁷ Jalla niiqui wejt jaruž tjonĉha. Jalla nuž cjenami niiĉha wejtquiztan juc'ant tsjan chekanaqui. Jalla nii atintizjapa wejrqui anal waquizuĉha, niiz zapat chiqui jwerzinimi, anaž cjichuca.

²⁸ Betábara cjita yokquin nuž
Juanžquiz pecuntatača. Betábara cjita
yokaqui Jordán cjita puž tuunača.
Jalla nicju Juanqui bautisatča.

UUIZ WILANAŽTAKAZZA JESUCRISTUQUI

²⁹ Jakatažuqui Juanqui Jesusa tjonni
cherchiča. Jalla nuž cheržcu, tuž
cjichiča:

—Cherzna. Tiiča Yoozquiztan
cuchanžquita žoni, uuzi wilanažtakaz.
Jalla tiiqui tii muntuquiz žejlñi
žoninacž cuntiquiztan ticznaquiča.
Ujchiz žoninacž laycu ticznaquiča,
ninacaž ujnacquiztan ana casticta
cjeyajo. ³⁰ Wejrqui tiiž puntuquiztan
mazzinchinča tuž cjican: “Wejt
wirquin tjonča tsjiiqui. Jalla niiča
wejtquiztan juc'ant tsjan chekanaqui.
Ima weriž nasan, niiquei želatkalča”.

³¹ Wejrqui persunpacha tii žoni anal
zizaytuča, jecčhalaj, jalla nii. Wejrqui
Yooz mantita jaru kjaztan bautisiñča,
Israel wajtchiz žoninacžquiz nii
pajkatta cjisjapa.

³² Nižaza Juanqui Jesusiž
puntuquiztan tuž chiichizakazza:
—Wejrqui arajpachquiztan Yooz
Espíritu Santo palumažtakaz
chjiwžquiñi cherchinča. Nekztan
nii palumaqui Jesusižuntuñpacha
cjisquichiča. ³³ Tuquiqui wejrqui
persunpacha tii žoni anal zizaytuča,
jecčhalaj, jalla nii. Pero Yoozqui wejr
mantichiča kjaztan bautisajo. Nižaza
wejtquiz tuž cjichiča: “Espíritu
Santuqui jecžquiz chjiwžcačhaja,
nižaza nižquiz želačhaja, jalla niiča
Espíritu Santužtan bautisniqui. Jalla
nii cheržcu nižquiz pajaquiča”.

³⁴ Jaziqii nižtapan cherchinča, jalla
nižtiquiztan wejrqui ančucaquiz
maznuča, tiiča werar Yooz Maatiqui,
cjican.

ANDRESTAN PEDRUŽTAN

³⁵ Jakatažuqui Juanqui pucultan niiž
tjaajinta žoninacžtan tsijtsi želatča.

³⁶ Jesusaž nijechuc ojklayan, Juanqui
niižquin cheržcu tuž cjichiča:

—Cherzna. Tiiča Yoozquiztan
cuchanžquitaqui. Uuzi wilanažtakaz
cjequiča.

³⁷ Nii pucultan Juanž tjaajintanacaqui
jalla nuž chiiñi nonžcu Jesusižquiz
apziča. ³⁸ Jalla nekztanaqui Jesusaqui
wir kjutni cheržcu, ninaca apzquiñi
naychiča. Ninacžquiz cjichiča:
—Čhjuluz ančhuc kjurya?

Nii apzñi žoninacaqui tuž kjaaziča:
—Rabbí. (Rabbí cjita takuqui Tjaajiñi
Maestro cjiča ninacž tawquiztan.)
¿Jakziquinam am kamy?

³⁹ Jesusaqui ninacžquiz cjichiča:

—Picha. Wejtta oka, cherzjapa.

Jalla nekztanaqui tjonžni ojkičiča,
jakziquin kamchitažlaja, jalla nicju.
Tjuñi zezi cjen nii pucultanaqui
Jesusižtan kamchiča nii zeztan ween
pakara.

⁴⁰ Tsji pucultiquiztan Andrés
cjitatača, Simón Pedruž lajктаča.
Jalla niiquei Juanž chiita nonžcu
Jesusa apziča. ⁴¹ Pero Andresqui
ima Jesusižtan ojklayan niiž Simón
cjita jila kjuri ojkičiča. Jalla niižtan
zalžcu, tuž mazziča:

—Wejrqui Mesiastan zalchinča.
(Ninacž tawquiztan Mesías cjita
tjuuqui Cristuž cjicha. Cristo cjita
tjuuqui “Yooz illzta” cjiča.)

⁴² Jalla nekztanaqui Andresqui niiž
jila Jesusižquiz zjičchiča. Jesusaqui
nii cheržcu, tuž cjichiča:

—Amqui Simona cjitamča, Jonás
majch. Tekztan najwčhuc Cefas cjita
cjequiča. (Cefas cjita tjuuqui Pedro
cjiča, ninacž tawquiztan. Pedro cjita
tjuuqui “maz” cjiča.)

FELIPŽTAN NATANAELŽTAN

⁴³ Jakatažuqui Jesusaqui Galilea yokquin ojkz pinsichiča. Jalla nuž okawk cjen, Felipe cjita žoňžtan zalchiča. Niižquiz tuž cjichiča:

—Wejttanpanim chica ojklayaquiča.

⁴⁴ Nii Felipiqui Betsaida wajtchiz žoňitača. Andrestan Pedružtan nii wajtchiz žoňinacazakaztača. ⁴⁵ Jalla nekztanaqui Felipiqui Natanael kjuri ojkičiča. Jalla niižtan zalžcu cjichiča:

—Tsjii žoňžtan zalchinča. Niiž puntuquiztan Moisesqui cjiřchipantala Yooziž tjaata liy librunacquiz. Nižaza niiž puntu profetanacaqui cjiřrchizakaztača. Niiqui Jesusa cjitača, Josež majch. Nazaret wajtchiz žoňiča nii Jesusaqui.

⁴⁶ Jalla nuž nonžcu Natanaelqui tuž cjichiča:

—¿Nazaret wajtquiztan zuma žoňi želasajo? Anaž jaz.

Felipiqui niižquiz tuž kjaaziča:

—Cheržquily.

⁴⁷ Jesusaqui Natanael cjita žoňi macjatžquini cheržcu, tuž cjichiča:

—Cheržca. Nii žoňiča lijitum Israel wajtchiz žoňiqui, ana incallniqui, nižaza zuma kuzzizza.

⁴⁸ Jalla nekztanaqui Natanaelqui Jesusižquiz pewczyiža tuž cjican:

—¿Jaknužum am wejr pajjo?

Jesusaqui niižquiz kjaaziča tuž cjican:

—Ima Felipe am kjawznan, wejrqui am cherchinča, higo munti koztan.

⁴⁹ Natanaelqui tuž cjichiča:

—Tjaajiňi Maestro, am Yooz Maatimkalala, Israel žoňinacz chawc Jilirimkalala.

⁵⁰ Nekztanaqui Jesusaqui niižquiz cjichiča:

—Wejrqui chiichinča, am higo munti koztan žejlňi cherchinča,

nii. Jalla nižta chiitiquiztan alaja wejtquizim kuzziz cjissamča. Pero wiruňaquí juc'ant pajk obranaca cheraquiča amqui.

⁵¹ Nižaza Jesusaqui cjichizakazza:

—Ančhucaciz weraral cjiwča.

Ančhucqui arajpacha cjetsi cheraquiča, nižaza Yooz anjilanaqui wejtuntuň chjiwžquini yawžquini cheraquiča. Wejrtča tsewtan cuchanzquita Yooz Žoňtqui.

ZALZ PJIJZTA

2 ¹ Čhjep majquiztan tsjii zalz pjiizta želatča Caná wajtquin, Galilea yokquin. Jesusiž maa nicju želatča.

² Nižaza Jesusaqui niiž tjaajinta žoňinacztanpacha nii zalz pjiiztiquiz kjawžtatača. ³ Jalla nuž pjiizta paan vino upzitača. Jalla nekztanaqui Jesusiž maaqui niižquiz cjichinča:

—Vino upziča.

⁴ Jesusaqui naaciz tuž kjaaziča:

—Maataka, ¿kjažtiquiztan nii puntu wejtquiz chiijo? Wejt langz ora imaziča.

⁵ Pero naaqui nekz atintiňi sirwizunaczquiz cjichinča:

—Tiiž mantitacama ančhucž paaquiča.

⁶ Jalla nicju sojta pajk maz luuznaca želatča. Judío žoňinacaqui ajunz cuzturumpi paazjapa luuznaca joojooňitača. Zapa luuzquiz quinzakal tunc litro, patac litro, nuž kjaz luzňitača. ⁷ Nekztan Jesusaqui nii pjiizta paaňi sirwizunaczquiz mantichiča, tuž cjican:

—Tii luuznaciz ančhucqui kjaz chjiipznaquiča.

Nekztanaqui luuz joracama kjaznaca chjiipziča. ⁸ Jalla nekztanaqui Jesusaqui cjichiča:

—Jaziqi tsjii zkoluculla coožna.

Nekztan pjiizta paaňi patrunžquiz chjicha.

Jalla nuž niiž chiitacama chjitchiċha.

⁹Nii pijjzta paañi patrunaqui mallziċha nii kjazquiztan vino tucchi. Jakziquiztan tjonchi nii vino, jalla nii ana zizatċha. Sirwizunacakaz zizatċha. Ninacaž kjazqui cootkalċha. Jalla nuž nii vino mallžcu pijjzta paañi patrunaqui nii zalzñi tjowa kjawziċha.

¹⁰Nekztan tuž cjichiċha:

—Ĉjul žoñimi zuma vino panž tjaaċha primiraqui. Nekztan kjawžta žoñinacaž zuma vino lictan nii jaru ana zuti zuma vino zakaz tjaaċha. Amzti tii oracama tii ancha zuma vino ċhjojċham, ċkjažtatajo?

¹¹Jalla niitaċha Jesusaž primer paata milajruqui. Caná de Galilea wajtquiz paachiċha. Jesusaqui nii milajru paacan, niiž arajpach kamañami azimi tjeeziċha. Jalla nižtiquiztan nižtan chica ojklayñi žoñinacaqui niižquizimi tjapa kuz cjissiċha, nižaza criichiċha.

¹²Jalla niiž wiruñ Capernaum wajtquin ojkiċha. Niiž maatan, niiž lajknacžtan, niiž tjaažinta žoñinacžtan, jalla ninacaqui nižtan chica ojkiċha. Jalla nicju tsjii kjaž maj kamchiċha.

TIMPLU PEWŽA JESUCRISTUQUI

¹³Judío žoñinacž pascua pijjzta wajillataċha. Jalla nižtiquiztan Jesusaqui Jerusalén watja ojkiċha.

¹⁴Jalla nicju timplu patiuquiz luzcu, animala tuyñinaca cherċiċha. Vacanaca, uuzinaca, nižaza palumanaca jalla nižtanaca timplu patiuquiz tuyñi cherċiċha. Nižaza paaz campiñinaca ninacž puestuquiz julzi cherchizakazza. ¹⁵Jalla nižtanaca cheržcu Jesusaqui poota zkizquiztan laz paachiċha. Jalla nekztanaqui nii laztan zancħuc liwĵ tirkatchiċha vacanacami, uuzinacami tjapa nii tuyñinacžtanpacha. Nii paaz campiñi žoñinacž paazmi k'ala witzinċiċha,

nižaza ninacž mizanacami pjokžinċiċha. ¹⁶Nekztan paluma tuyñi žoñinacžquiz ujziċha tuž cjican:

—Tjapa tinaca jwesa. Wejt Yooz Ejpž kjuya anaċha tuyz kjuya tjaczqui.

¹⁷Jalla nekztanaqui niiž tjaažinta žoñinacaqui cjijrta Yooz taku cjuñziċha. Yooz tawĵ libruquiz tuž cjijrtkalċha: “Am kjuya rispitta cjiskatz pecuċha. Nuž pectiquiztan akztal cjeeċha”.

¹⁸Jalla nekztanaqui judío žoñinacaqui niižquiz pewcziċha tuž cjican:

—Jalla nižtanaca paazjapa, ċject am mantichejo? Yoozqui am mantichizlaj niiqui, tsjii siñala milajruž tjeežna.

¹⁹Jesusaqui tuž kjaaziċha:

—Tii timplu pajlžta cjequiċha. Nekztan ċhjep majquiz wilta tsijtsnaċha.

²⁰Jalla nižta chiiñi nonžcu judío žoñinacaqui cjichiċha:

—Tii timplu kjuycanaqui pusi tunc sojtan wata kjuytala pero. ĆAmqui ċhjep majquizkaz tii timplu tsijtsnasajo? Anapan niim atasāċha amqui.

²¹Jalla nuž nii timplu puntuquiztan ċhiican Jesusaqui niiž persun curpu puntuquiztanž ċhiyatċha. ²²Jesusaž ticziquiztan jacatattan niiž tjaažinta žoñinacaqui nii ċhiita cjuñziċha. Nekztan Yooz takumi criichiċha, Jesusaž jacatatž punto cjijrta. Nižaza Jesusiž ċhiitanacami criichizakazza.

²³Pascua pijjztiquiz Jesusaqui Jerusalén wajtquiz želatċha. Jalla nicju želan walja žoñinacaqui niižquin criichiċha. Niiž paata milajrunacami siñalanacami, nii cheržcu criichiċha. ²⁴Jesusaqui niiž persun kuzquiz žoñinacž kuz, jaknužt cjeċhaja, jalla nii zizatċha. Jalla nižtiquiztan Jesusaqui nii juntuñ ċriichi žoñinacžquiz ana juyzu

paachiċha. ²⁵ Jesusaqui persunpacha žoñinacž kuz jaknužt cječhaja jalla nii zizatċha. Jalla nižtiquiztan niiqui anaž jec tjaajñimi pecatċha žoñinacž kuz puntuquiztanaqui.

JESUSIŽTAN NICODEMUŽTAN

3 ¹Tsjii fariseo žoñi želatċha, Nicodemo cjita, judfo žoñinacž jiliritatċha. ²Jalla nii Nicodemuqui tsjii ween Jesusižquin tjonžñi ojčkhiċha. Nekztan Jesusižquin paljayċhiċha, tuž cjican:

—Tjaajiñi Maestro, žoñiqui ana Yooz poderžtanžlaj niiqui, nekztan ana milajrunaca paasaċha, amiž paata milajru, nižtanacami. Jalla nižtiquiztan wejrqui zizuċha, Yoozquiztan tjonchamċha, Yooz obra tjeežñi nižaza Yooz puntu tjaajiñi.

³Jalla nekztanaqui Jesusaqui niizquiz cjichiċha:

—Amquiz weraral cjeeċha. Jequit ana pizc wilta nassi cječhaja, jalla niiqui arajpach Yooz wajtquiz ana kamasatċha.

⁴Jalla nižta chiitiquiztan nii Nicodemo cjita žoñiqui tuž pewcziċha:

—Pero, ċkjaž tsjii žoñiqui wilta majtta cjesajo? Wilta majtta cjisjapa, ċmaa iczquiz wiltaž luzasajo?

⁵Jesusaqui tuž kjaaziċha:

—Ultimu werarapal cjiwċha. Jequit kjažquiztanami Espiritu Santužquiztanami ana nassi cječhaja jalla niiqui arajpach Yooz wajtquiz ana luzasaċha. ⁶Jequit maa ejpžquiztankaz nassaja, jalla niiqui žoñž kamañchizkazza. Pero jequit Yooz Espiritu Santuquiztan zakaz nassaja, jalla niiqui Yooz Espiritu Santuž kamañchizza. ⁷Weriž chiitiquiztan anam am ispantaquiċha. Tjapa žoñinacaqui pizc wilta nastanpanċha cjiwċha. ⁸Nicjumi ticjumi tjamiqui

tjamċha. Nii tjamž jora nonžcanami jakziquiztan tjamžquičhaja, jakzitchuc ojčkċhaja, jalla nii ana zizzuca. Jalla nižta irataž Yooz Espiritu Santuqui jecž kuzquizimiž luzasaċha. Nižaza ana Yoozquin criichi žoñinacaqui criichi žoñinacž kamaña cherċha. Pero nii Espiritu Santuž tjaata kamaña ana intintazucaċha.

⁹Jalla nekztanaqui Nicodemuqui wilta pewcziċha, tuž cjican:

—ċJaknužupan cjes teejo?

¹⁰Jesusaqui niizquin tuž kjaaziċha:

—Amqui Israel žoñinacžquiz tjaajiñi maestrumla. ċJalla tii weriž chiita ana intintazzucakaya? ¹¹Ultimupan wejr cjiwċha. Wejrqui tii puntuquiztan intintazcu chiyuċha. Weraraž chiyuċha, tii weriž zizta nižaza cherta puntunacami. Jalla nuž cjenami amqui weriž chiita anam catokċha.

¹²Tii muntuquiz watñi puntuquiztan chiyan ana intintazza amqui. Jaziqui juc'ant altu razunžtan arajpach Yooz puntuquiztan chiyanami, ċjaknužt am intintasasajo?

¹³Anaž jecmi arajpachquin yawchiqui. Wejrpankal arajpach Yooz puntuquiztan zumpacha zizuċha. Wejrqui arajpachquiztan chijiwžquichinċha. Wejrqui arajpachquiztan cuchanžquita Yooz Žoñtċha. ¹⁴Nižaza wejrqui cruzquiz waytital cjistanċha. Jaknužt Moisesqui tsjii korquiztan paata zkora pajk tuñquiz waytitċhaja, jalla nižta wejrqui waytital cjistanċha, ¹⁵wejtquin criichi žoñinacžquiz ew kamaña tjaazjapa, ninaca Yooztan wiñaya kamajo, ana infiernuquin sufrajo.

YOOZ EJPĊHA ŽOÑINACŽQUIZ OKŽNIQUI

¹⁶Yooz Ejpqui tii muntuquiz žejlñi žoñinacžquiz ancha okžquichipanċha.

Jalla nižtiquiztan niž zinta Majch cuchanžquichiča, žoñinacžquiz ew kamañchiz cjiskatzjapa. Jakziltat niž zinta Majchquiz criyačhaja, ew kamañchiz cjequiča Yooztan wiñaya kamzjapa ana infiernuquin sufrajo. ¹⁷Yooz Ejpqui niž Majch tii muntuquiz cuchanžquichiča. Niiž cjen žoñinaca liwriita cjesača infiernuquin ana casticta cjisjapa.

¹⁸Jakziltat Yooz Majchquiz criyačhaja, jalla niiqui ana infiernuquin castictaž cjequiča. Pero jakziltat Yooz Majchquiz ana criyačhaja, jalla niiqui infiernuquin castictapanž cjequiča, Yooz zinta Majchquiz ana criitiquiztan. ¹⁹Yooz zinta Majchča Yooz kamaña tjeezñiqui zuma kjanažtakaz. Jalla nuž cjenaqui tii muntuquiz tjontan, žoñinacaqui ana wali kamañchiz kamzpanž pecatča, zumchiquiz kamzpanž pecatča. Nižaza ninacaž ana wali kamtanacaž cjen Yooz kamañchiz cjis ana pecchipanča. Jalla nižtiquiztan castictapanž cjequiča. ²⁰Tjapa ana wali kamñinacaqui Yooz kamaña tjeezñižjapa quintracha. Nižaza Yooz kamaña tjeezñižquiz anaž cherz pecča, ninacž ana wali kamtanaca ana tjeezta cjisjapa. ²¹Pero jakziltat werar Yooz kamañ jaru kamz pecčhaja, jalla niiqui Yooz kamaña tjeezñižquiz macjatžquichiča kjanapacha tjeezjapa, niž zuma kamtanaca Yooz aztan kamtača, nii. —Jalla nuž cjichiča Jesusaqui.

JUAN BAUTISTAŽ CHIITA

²²Jalla nuž Nicodemužtan parližcu, Jesusaqui tjaajintanacžtan Judea yokquin ojkičiča. Jalla nicju niž tjaajintanacaqui bautiscan žejlchiča. ²³Nižaza Juan bautiscan zakaz želatča. Salim cjita wajt žcati

Enón cjita wajtquin želatča. Jalla nicju wacchi kjaz želatča. Nekztan žoñinacaž tjonatča bautista cjisjapa.

²⁴Jalla nižtanaca watchiča, ima Juanqui carsilquin chawcta cjen.

²⁵Jalla nekztanaqui Juanž tjaajinta žoñinacžtan tsjii kjaž judío žoñinacžtan ch'aassiča, ajunz cuzturumpi puntuquiztan. ²⁶Juanž tjaajintanacaqui nižquin mazñi tjonchiča, tuž cjan:

—Tjaajiñi maestro, tsjiiqui amtan chica želatča Jordán pujž tuuna. Amqui niž puntuquiztan mazzinchamča. Jalla niiqui tekz žejlča bautiscan. Nižaza tjapa žoñinacaqui nižtan ojczpanž cjissa.

²⁷Juanqui ninacžquiz tuž cjichiča:

—Yooz Ejpqui wejtquiz tsjii kamaña tjaachiča; nižaza tsjii puestuquiz wejr utchiča. Jaknužt Yoozqui žoñžquiz kamaña tjaatčhaja, jalla nii jaru žoñiqui kamz waquiziča.

²⁸Ančhucpacha weriž chiita nonzinčucča. Wejr cjichinča: Anača wejr Cristutqui. Wejrzi niž tuqui cuchanžquita žoñtča. ²⁹Tsjii zalz pjižtquiz zalzñi tjowaqui yanapñi mazinacžquiztan tsjan importantiča. Nii zalzñi tjowaqui tjunchizza.

Yanapñi mazinacaqui jalla nii nonžcu cuntintuča, nižaza chipchipča. Jalla nižta iratača anziqi. Wejrqui Jesusiž quintu nonžcu ancha cuntintuča.

³⁰Niiqui juc'anti juc'anti tuquin cjistanča. Wejrzi nižquiztan juc'anti juc'anti wirquin cjistanča.

JESUSAČHA TSEWCTAN TJONCHI ŽOŇI

³¹Nii tsewctan tjonchi žoñiča tjapa žoñinacžquiztan juc'anti chekanaqui. Tii yok muntuquiz kamñi žoñinacaqui tii yokjapakaz kamañchizza. Nižaza tii yokjapa kamaña puntuquiztankaz

parličha. Nii tsewctan tjonchi žoñizti tjapa žoñinacžquiztan juc'antičha. ³²Nii tsewctan tjonchi žoñiqui arajpachquin čhjulut chertčhaja, nonžtčhaja, jalla nii žoñinacžquiz mazzičha. Jalla nii zumanaca maztiquiztanami žoñinacaqui anaž wira criiz pecčha. ³³Jakziltat niž mazta criičhaja, niiqui tjurt'aquičha, Yooziž čhiita takuqui werarapankalala, cjican. ³⁴Yooziž cuchanžquita žoñiqui Yooz takupanž parličha. Yooz Espíritu Santučha niž kuzquiz žejlñipan, yanapzjapa. Jalla nižtiquiztan Yooz takupanž parličha. ³⁵Yooz Ejppui niž Majch k'aachičha. Jalla nižtiquiztan tjappacha tjaachičha niž Majch kjarquiz. ³⁶Jalla nižtiquiztan jakziltat Yooz Majchquiz criyačhaja, jalla niiqui Yooztan wiñaya kamaquičha. Nižaza jakziltat ana Yooz Majchquiz criyačhaja nižaza ana cazačhaja, jalla niiqui anapanž Yooztan kamasacha. Nižaza Yooz Ejppui cjičha, nii žoñiqui castictaž cjequičha.

JESUSIŽTAN SAMARIA WAJTCHIZ MAATAKŽTAN

4 ¹Žoñinacaqui Jesusižquiz walja tjonchičha nižtan chica ojklayzjapa, Juanžquiztan juc'ant tama. Nižaza Juanžquiztan juc'anti žoñinaca bautissicha. Jalla nii quintu ojklayan, fariseo žoñinacaqui nii quintu nonchičha. Nekztan Jesusižtan quintrazi kallantichičha. Nii zizzičha Jesusaqui. ²Jalla nuž nii Jesusiž bautis quintu ojklaychiž cjenami, Jesusaqui anaž bautissicha. Antiz niž tjaajinta žoñinacakaz bautisatčha. ³Pero fariseo žoñinacaqui Jesusiž puntuquiztan nonžcu, Jesusižtan quintrazi kallantichičha. Jalla nižtiquiztan Jesusaqui Judea yokquiztan zarakchičha, Galilea yokquin quejpžquizjapa.

⁴Jalla nii jiczquiz ojkecan, Samaria yoka nuž watstantačha. ⁵Jalla nuž Samaria yokquin ojkecan Sicar cjita wajtquin irantichičha. Tuqui timpu Jacob cjita žoñiqui niž José cjita majchquiz tsjii yoka tjaachitačha. Nii yok žcati Sicar cjita watja želatčha. ⁶Jalla nicju tsjii kjaz tuj želatčha, Jacobž tuj cjitatačha. Jesusaqui jiczquiz ojktiquiztan otchičha. Nekztan tuj latuquiz julzičha. Nii oraqui taysur wajitačha. ⁷⁻⁸Nekztanaqui niž tjaajinta žoñinacaqui watja luzzičha lujl čhjeri kjayzjapa. Jesusaž nuž zinalla želan, tsjaa Samaria wajtchiz maatakqui nii tujquin kjaz cooyi tjonchinčha. Jesusaqui naaquiz paljaychičha: —Kjaz onalla, —cjican.

⁹Jalla nuž kjaz tomangztiquiztan naa Samaria wajtchiz maatak žonqui cjichinčha:

—Amqui judío žoñimla. Wejrqui Samaria wajtchiz žontčha. ¿Kjažtiquiztan amqui wejtquiztan kjaz mayjo?

(Judío žoñinacžtan Samaria wajtchiz žoñinacžtan porapat ana parliñipanla, pero.) ¹⁰Jalla nektanaqui naa maatakaž čhiitiquiztan Jesusaqui tuž kjaazičha:

—Wejrqui amquiztan kjaz maychinčha. Pero amzti wejt puntuquiztanami nižaza Yooziž tjaaz puntuquiztanami intintitasaz niiqui, jalla nektan wejtquiztan žejtni kjaz maytasacha. Nižaza nii žejtni kjaz tjaatam cjitasačha.

¹¹Jalla nektanaqui naa maatakqui tuž cjichinčha:

—Señor, am anaj kjaz coozizamla. Tii tuj kozičha. ¿Jakzictanam nii žejtni kjaz tjaasajo? ¹²Učhum Jacob cjita tuquita ejppui tii tuj ecanchičha. Nižaza tii tujquiztan kjaz licñitačha, nižaza niž maatinacami, nižaza niž

animalanacami. ¿Amqui niizquiztan juc'antim cjes, kjažtatajo?

¹³Jalla nekztanaqui Jesusaqui naaquiz cjichiča:

—Jakziltat tii tuj kjazquiztan lic'haja, jalla niiqui wilaž kjaz pecaquiča.

¹⁴Pero jakziltat weriž tjaata kjaz lic'haja, jalla niiqui anaž iya kjaz pecniž cjequiča. Weriž tjaata kjazqui niiz persun kuzquiz tsjii jalzurižtakaz cjisnaquiča wiñaya žejtzjapa.

¹⁵Jalla nekztanaqui naa maatak žonqui niizquiz cjichinča:

—Señor, nii kjaz tjaalla, ana iya kjaz peczjapa, nižaza tii tujquiz ana iya kjaz cooyi tjonzjapa.

¹⁶Nekztanaqui Jesusaqui naaquiz cjichiča:

—Oka, am luctaka kjawžca. Nekztan wiltam wejtquin tjonaquiča.

¹⁷Naa maatak žonqui tuž kjaaziča:

—Ana luctakchiztča.

Jalla nuž kjaaztiquiztan Jesusaqui tuž cjichiča:

—Amqui weraram chiiča, “Ana luctakchiztča” cjicanaqui. ¹⁸Amqui pjijska luctakchiztakalala amqui.

Jalla nižtiquiztan anziqii am lumuc cjičhaja, jalla niiqui anaž am ultim lucuqui. Jaziqui weraram chiiča.

¹⁹Jalla nekztanaqui naa maatak žonqui Jesusižquiz tuž cjichinča:

—Señor, amča profetaqui, nuž tantiyuča. ²⁰Wejtnaca tuquita ejpnacaqui tii curquiz Yooz rispitiñitača. Ančhuc judío žoñinacazti cjiñchucča, Jerusalén wajtquin Yooz rispitsa, nii.

²¹Nekztanaqui Jesusaqui naaquiz tuž kjaaziča:

—Maataka, weriž chiita taku criya. Tsjii tjuñi tjonča. Jalla nii tjuñquiziqui anaž tii curquizimi nizaza anaž Jerusalén wajtquizimi Yooz Ejp rispitaquiča. ²²Ančhucqui Yooz ana

zuma pajžcu rispitiča. Wejrnacztii Yooz lijituma pajžcu rispituča. Judío partiquiztanž Yooziž cučanžquita Liwriñiqui tjonča. ²³Nii tjonz tjuñquiziqui, nižaza anzimi, werar Yooz Ejp rispitiñinacaqui kuztanami animužtanami Yooz rispitaquiča. Nižaza Yooz Ejpž kuzcama weraraž rispitaquiča. Jalla nižta rispitiñinacaž Yooz Ejpqui pecča. ²⁴Yoozza ana janchichizqui, animužtakaz. Jalla nižtiquiztan nižquin rispitiñinacaqui kuztanami animužtanami nii rispitanča. Nižaza Yooz kuzcama werara rispistanča.

²⁵Jalla nekztanaqui naa maatak žonqui Jesusižquiz cjichinča:

—Tsjii noojiqui tsjii Yoozquiztan cučanžquita cjitaqui tjonaquiča. (Mesías, nižaza Cristo cjitazakazza niiqui.) Jalla nii tjonžcu wejtnacaquiz tjapa Yooz puntuquiztan tjaajnaquiča.

²⁶Nekztanaqui Jesusaqui naaquiz tuž cjichiča:

—Werjtča niitqui, amquiz paljayuča.

²⁷Jalla nuž parlan Jesusiž tjaajinta žoñinacaqui quejpžquichiča.

Nuž Jesusaž tsjaa Samaria wajtchiz žonatan parliñi cheržcu, ispantichiča. Ancha ispantižcu tjapa nii tjaajintanacaqui ana pewczñi atchiča, “Naaquiztan čhjululum pec?” cjičan, už “¿Kjažtiquiztan naa žonatan parli?” cjičan ana pewczñi atchiča.

²⁸Nekztanaqui naa maatak žonqui kjaz luuz eccu, watja ojkhinča. Nekztan žoñinacžquin tuž quint'ichinča:

²⁹—Ojklay, tsjii žoniž cheržquilai. Niiqui tjapa weriž kamta puntu zizza. Wejtquiz nii puntu čhiichiča. ¿Anaj tii Yooz cučanžquita Cristo cjesaya?

³⁰Nekztanaqui žoñinacaqui wajtquiztan ulanžquichiča, jakziquin Jesusa želatčhaja, jalla

nicju. ³¹ Ima nii žoninacaž irantižcan, niž tjaajintanacaqui Jesusižquiz chiižinchiča, tuž cjican:

—Tjaajiñi Maestro, čjululla mekaz lujlžnalla.

³² Jesusazti ninacžquiz cjichiča:

—Wejtac yekja lujlž željča. Jalla nii lujlžqui ančhucqui anaž pajča.

³³ Jalla nuž chiitiquiztan niž tjaajintanacaqui ninacpora pewssassiča, tuž cjican:

—¿Jequit tižquiz lujlž čjeri zjiycanchi cjesajo?

³⁴ Jesusaqui ninacžquiz cjichiča:

—Wejrqui wejt cuchanžquiniž kuzcama kamuča. Nižaza niž pecta langz cumpluča. Jalla niča wejta lujlž čjeri cuntaqui. ³⁵ Ančhucqui cjinčhucča, “Zkala ajzquinaqui pajkpic jiiz pjaltiča”, jalla nuž cjinčhucča. Pero wejr ančhucaciz cjiwča, “Nii žoninacžquin cherna. Pookchi zkalanacžtakaz ninacaqui. Ricujz pecča. ³⁶ Jakziltat nii pookchi zkalanaca ricujačhaja, jalla niiqui pactaž cjequiča. Nižaza nii ricujta žoninacaqui Yooztan wiñaya kamaquiča. Jalla nižtiquiztan zkala čhjacñimi ajzñimi nuž chicapacha cuntintuž cjequiča. ³⁷ Tii zkala puntuiztan chiitaqui werarapanča. Jalla tuž cjiča: “Zkala čhjacñiqui tsjiča. Nižaza zkala ajzñiqui yekjača”. ³⁸ Wejrqui ančhuc cuchanžquichinča, ana amiž trabajta zkala ricujzjapa. Yekjanacača nii zkalac trabajchi Yooz taku paljaycan. Ančhucqui nii trabajtiqiz yapzinčhucča, ultimquiziqui Yooztajapa ricujta cjisjapa.

³⁹ Jalla nekztanaqui wacchi Samaria wajtchiz žoninacaqui nižquiz criichiča, naa maatak žonaž maztaž cjen. “Niiqui tjapa weriž kamta puntu zizza”, jalla nuž cjican mazzinča

naaqui. ⁴⁰ Nižaza Jesusižquiz tjonžcu, nii Samaria wajtchiz žoninacaqui Jesusižquiz rocchiča, tuž cjican:

—Wejtnacatan kamt'alla.

Nekztanaqui Jesusaqui ninacžtan puc maj kamchiča. ⁴¹ Jalla nuž niž persuna tjaajintiquiztan iya juc'anti nii žoninacaqui nižquiz criichiča. ⁴² Ninacaqui naa maatak žonaquiz tuž cjichiča:

—Wejrnacqui criyuča. Anaž amiž maztiquiztankaz criyuča. Antiz niž taku persuna nonžcupan criyuča. Chekapan, tiiqui Yooz cuchanžquita Cristukalča, žoninacžquiz liwriñiqui. Anzil nii zizuča wejrnacqui, niž tjaajinta taku nonžcu.

TSJII ČHJETINTAQUI

⁴³ Puc majquiztan Jesusaqui Galilea yokquin ojkičiča.

⁴⁴ Jalla nekztanaqui Jesusaqui tuž chiichiča:

—Tsji Yooz cuntiquiztan chiiñi profetaqui niž persun wajtchiz žoninacžquiz ana rispittača.

⁴⁵ Jalla nekztanaqui Galilea irantitan, nii žoninacaqui Jesusa zuma risiwchiča. Nii žoninacaqui Jerusalén ojkičizakaztača, pascua pijizta payi. Jalla nicju željcan tjapa Jesusaž paatanaca cherchiča. Jalla nižtiquiztan nii žoninacaqui Jesusa zuma risiwchiča.

⁴⁶ Galilea yokquin željcan, Jesusaqui Caná cjita watja wilta ojkičiča. Tuquiqui nii wajtquiz kjazquiztan vino tuckatchiča. Tsji pajk jilirž secretariuqui Capernaum wajtquiz želatča. Nii secretariuž majchqui laatača. ⁴⁷ Jesusaž Judea yokquiztan Galilea tjonchi quntu zizcu, nii secretariuqui Jesusa roqui ojkičiča niž kjuyquin tjonžcajo, nižaza niž majch čhjetnajo. Niiž majchqui

ticzmayatača. ⁴⁸ Jalla nekztan Jesusaqui nižquiz cjichiča:

—Ančhucqui sinalanacami milajrunacami ana cheraquiž niiqui, ana cryasača.

⁴⁹ Nekztan nii secretariuqui cjichiča:

—Señor, ima wejt majch ticznán wejt kjuyquin tjonžcalla.

⁵⁰ Jesusaqui nekztan cjichiča:

—Am kjuya quepa, am majchqui žetaquiča.

Nekztan nii secretariuqui jalla nuž Jesusaž chiitan nii criichiča. Jalla nekztan kjuya quejpchiča. ⁵¹ Jalla nuž niž kjuya okan, niž piyunanacqui nižquin zalžquichiča, tuž cjican:

—Am majchqui žejtchiča.

⁵² Jalla nuž chiitiquiztan nii secretariuqui pewcziča, čjulora niiž majch žeti kallantichi, jalla nii. Niiž piyunanacqui cjichiča:

—Zezcu taypuruž paztanalla nii kjakñi ch'ujlñiqui apaltichiča.

⁵³ Nii ejpqui cjuñziča, nii orapacha Jesusaqui cjichiča, “Am majchqui žetaquiča”. Jalla nižtiquiztan nii ejpqui tjapa kuztan Jesusižquiz criichiča, tjapa niž kjuychiz žoñinacžtanpacha.

⁵⁴ Judea yokquiztan Galilea quejpžcu, Jesusaqui nii milajru paachiča. Jalla nižtanaqui pize wilta milajru paachiča.

LAA ŽOŇI ČHJETINTA

5 ¹ Wiruñacqui judío žoñinacqui pjijzta paatča. Jalla nuž paan, Jesusaqui Jerusalén watja quejpžquichiča. ² Jerusalén wajtquiz tsjii pajk zana želatča, uuzi zana cjita. Jalla nii žcati tsjii žoñiž paata cocha kjazjapa želatča. Nii cochaqui Betesda cjitatača Hebreo tawkquiztan. Nii coch muytata pjijska kjuyallanaca

želatča. ³ Jalla nekzi wacchi laanaca želatča, zuranaca, zuch žoñinaca, ana tsijtñinaca. Nii laa žoñinacqui kjaz kizkiz tjewznatča. ⁴ Awiz awizaqui tsjii anjilaqui nii cochquiz tjoñiča kjaz tjarni. Jalla nuž nii kjaz tjarnan, primera kjazquiz luzzi žoñiqui žejtchi cjisñitača, čjul laaquiztanami. ⁵ Tsjii laa žoñiqui quinsa tunc quinsakalcun wata laa želatča. ⁶ Jesusaqui nii laa žoñi cherchiča. Nekztan Jesusaqui zizzi cjissiča, nii žoñi ažk watanaca laachitača, nii. Jalla nuž zizcu nii laa žoñžquiz pewcziča tuž cjican:

—¿Žejtchi cjissim pecya?

⁷ Nii laa žoñiqui kjaaziča tuž cjican:

—Señor, anaž jecmi tii kjaz tjarnan wejr luzkatñi žejlča. Luz pecuča, pero yekjakaz wejt tuqui luzza, tii kjazquizqui.

⁸ Nekztanaqui Jesusaqui nižquiz cjichiča:

—Žaazna, am tjajz zquiti apta, ojklaya.

⁹ Jalla nii orapacha žejtchi cjissiča. Niiž tjajz zquiti aptižcu ojkečiča. Jeejz tjuñquiz nii čhetintaqui watchiča. ¹⁰ Jalla nižtiquiztan judío žoñinacqui nii čhetinta žoñžquiz tuž chiižinchiča:

—Jeejz tjuñquiziqui, anača tjajz zquiti joojooz cjitaqui. Lii quintrala niiqui.

¹¹ Nii čhetinta žoñiqui tuž kjaaziča:

—Jalla nii wejr čjetiñi žoñiqui wejr mantichiča, tuž cjican: “Tjajz zquiti aptižcu, oka”. Jalla nuž cjichiča.

¹² Nii judío žoñinacqui pewcziča tuž cjican:

—¿Ject amquiz nuž cjichejo, “Tjajz zquiti aptižcu oka”, cjicanajo?

¹³ Jesusaqui nii orauqui walja neks žejlñi žoñinacž taypiquiztan katchiča. Jalla nižtiquiztan nii žoñiqui ana pajchiča, ject nii čjetinčaja,

jalla nii. ¹⁴Niiz wiruñ Jesusaqui nii laaquiztan žejtchi žoñžtan zalchiča timpluquin. Nekztan niizquiz cjichiča:

—Jila, amqui žejtchamča. Jaziqui ana wilta uj paaquiča. Uj paaquiz niiqui, amquiz juc'ant anawalim cjisnasača.

¹⁵Jalla nekztanaqui nii žoñiqui judío žoñinacžquin mazni ojkchiča, Jesusača nii čhjetini žoñiqui, jalla nii mazziča. ¹⁶Nii Jesusaž niža jeejz tjuñquiz čhjetintiquiztan judío žoñinacaqui Jesusiž quintru cjišiča; konz pecatča. ¹⁷Ninacžquiz Jesusaqui tuž cjichiča:

—Wejt Yooz Ejpqui tiraž langža, wejrmi nižtapachal langznuča.

¹⁸Jalla niža chiitiquiztan nii judío žoñinacaqui juc'ant žawjchiča, nižaza juc'anti konz pecatča. Jesusaqui jeejz tjuñquiz ana permitta langz mantichiča, judío žoñinacž lii quintru. Nižaza “Yooz Ejpča wejt persun Ejpqui” cjican chiichiča. Nuž cjican “Wejrmi Yoozzakaztča” cjichiča. Jalla nižtiquiztan nii judío žoñinacaqui Jesusiž quintru juc'anti aptichiča, konzjapa.

JESUCRISTUČHA YOOZ MAJCHQUI

¹⁹Nižaza Jesusaqui tuž cjichiča:

—Ančucaquiz weraral chiyuča. Wejrtča Yooz Majchqui. Pero persun kuzcama anal paasača. Yooz Epiž tjaata obranacal paa-uča. Jaknužt Yooz Ejpqui obra paačhaja, jalla nužuzakaz wejr Yooz Majchqui obra paa-uča. ²⁰Yooz Ejpqui wejr k'aachiča, nižaza tjapa niž paata obranacami wejtquiz tjeeža. Nižaza Yooz Ejpqui juc'anti pajk obranacaž tjeeznaquiča, ančhuc ispanitichi cjejajo. ²¹Jaknužt Yooz Ejpqui ticzinaca jacatatskatčhaja, nižaza wilta žeti tjaačhaja, jalla niža zakaz wejrqui

žeti tjaača, wejt munañpicama.

²²Yooz Ejpqui persunpacha ana casticu tjaača. Pero wejtquiz tjapa niž mantiz poder intirjichiča castictu tjaačjapa. ²³Jalla nuž intirjichiča, tjapa žoñinaca wejtquiz rispitačo, jaknužt Yooz Ejpžquin rispitchaja, jalla nuž. Jakziltat wejtquiz ana rispitchaja, jalla niiqui wejr cuchanžquini Yooz Ejpžquin ana zakaz rispitcha.

²⁴Ančucaquiz weraral chiyuča. Jakziltat weriž chiita taku nonžcu tjapa kuztan catokčhaja, nižaza wejr cuchanžquinižquiz kuz tjaačhaja, jalla niiqui Yooztan wiñaya kamča. Nižaza ana casticta cjequiča. Infiernuquin ojkni jiczquiz eccu, arajpach ojkni jiczquiz kamča, Yooztan wiñaya kamčjapa.

²⁵Ančucaquiz weraral chiyuča. Tsjii timpu tjonča, nižaza anzimi nii timpuča. Anziqui ticzižtakaz kamni žoñinacaqui wejt taku nonžnaquiča. Jakziltat wejt taku nonžcu tjapa kuztan catokačhaja, jalla niiqui ew kamañchiz kamaquiča. Yooz Majchtča wejrqui. ²⁶Yooz Ejpqui persunpacha žejtkatz poderchizza. Nižaza wejt Yooz Ejpqui nii poder wejtquiz intirjichiča. ²⁷Wejrqui tsewctan cuchanžquita Yooz Žoñtča. Jalla nižtiquiztan Yooz Ejpqui pjalz puestuquiz wejr utchiča. Jaziqui arajpachquin kamzmi nižaza infiernuquin casticzmi jalla nii mantiznaca wejtquiz intirjichiča. ²⁸Tii weriž chiitiquiztan ana ispanta. Tsjii timpu tjonča. Jalla nii timpuquiz tjapa ticzinacaqui wejt joraž nonžnaquiča. Nekztan sipulturquiztanž žaaznaquiča. ²⁹Zuma kamchinacaqui jacatataquiča Yooztan wiñaya kamčjapa. Ana zuma kamchinacazti jacatataquiča infiernuquin casticta cjisjapa.

YOOZ EJPŽTAN YOOZ MAJCHTAN

³⁰Wejrqui persun kuzquiztanac anal pjalznasača. Jaknužt wejt Yooz Ejp

mantichaja, jalla niicamal pjalznuča. Anal wejt kuzquiztan pjalz pecuča. Antiz wejr cuhanžquiñiž kuzcama pjalz pecuča. Jalla nižtiquiztan weriž pjaltaqui lititumača.

³¹Wejrkal persunpacha wejt favora chiyasaž niiquei, weriž chiita taku anaž walasača. ³²Pero yekja tisticu wejt favora žejlča. Jalla niičha Yooz Ejpqui. Niiž wejt puntuquiztan chiita takuqui werarapanča. Jalla nii zizuča. ³³Anchucqui Juanžquin pewczni cuhanžquichinchučha wejt puntuquiztan. Niiž kjaaztaqui werarapanča. ³⁴Žoniž wejt favora werara chiiñiž cjenami, wejtquiz anaž ancha importičha. Yooz Ejpča wejt favora ultim werara chiiñiquei. Nuž cjiwča, anchuc wejtquiz criyajo, anchuc liwriita cjisjapa. ³⁵Juanqui tsjii tjeezta lamparažtakaz kjanatča. Jalla nuž kjančan nii Juanqui wejt puntu kjanzt'ichiča. Nižaza tsjii upacamakaz niiž kjanquiz anchucqui cuntintu kamchiča. ³⁶Juanqui wejt favora chiiichiča. Pero tsjiiiquei žejlča Juanžquiztan juc'anti. Jalla niičha Yooz Ejpqui. Niiquei wejt favora zakaz chiiča. Nižaza wejt Yooz Ejpqui wejr mantichiča obranaca cumplizjapa. Tii obranacquiztan wejr pajtapan cjesača, Yoozquiztan tjonchin, ana Yoozquiztan tjonchin, nii. Tii weriž paata obranaca kjanapacha tjeēja, Yooz Epiž wejr cuhanžquita, jalla nii. ³⁷Wejr cuhanžquiñi Yooz Ejppacha wejt favora chiiča. Anchucqui niiž persun jora ana nonznasača nižaza niiž tsiti ana cherasača. ³⁸Yooz Ejpqui wejr cuhanžquichiča. Pero anchucqui wejtquiz ana criičha. Jalla nižtiquiztan niiž takumi anchuca kuzquiz ana zakaz catokča. ³⁹Anchucqui cjiirta Yooz taku anchaž istutiiča. Nekztan anchucqui tantiiča, “Yooz taku

istutiichiž cjen wejrnacqui Yooztan wiñaya kamaka,” cjan. Pero nii cjiirta Yooz takunacaqui wejt puntuquiztanž chiiča. ⁴⁰Jalla nuž istutiižcupacha, anchuczti anaž wejtquiz macjatž pecča, Yooz Ejpžtan wiñaya kamzjapaqui.

⁴¹Žoñinacaž tjaata honora wejtquiz anaž importičha. ⁴²Ultimu anchucqui ana Yoozquin kuzzizchučha. Nii zizuča. ⁴³Wejt Yooz Ejpž cuntiquiztan tjonchi cjenami, anchucqui anaž wejr criičha. Pero yekja žoniiquei persun kuzcama anchucaquiz tjonasaž niiquei, niižquiz criyasaž, jaz. ⁴⁴Anchucqui anchucporaz honorchiz cjezas pecča. Anchucqui Yooziž tjaata honorchiz cjisjapa anaž importičha. Jaziquei, čjaknužt anchuc wejr criyasajo?

⁴⁵Anchucqui Moisés liiquei kuz tjaachiž cjen, pinsaquiča, Yooztan wiñaya kamaka, jalla nii. Pero nii Moisespacha anchuca ujnacaž tjeeznaquiča, Yooz Ejpž yujcquiziquei. Anača wejrqui Yooz Ejpž yujcquiz anchuca ujnaca tjeezniñtqui. ⁴⁶Moisesqui wejt puntuquiztan cjiirchiča. Jalla nižtiquiztan anchucqui Moisés cjiirta criitasaž niiquei, wejtquiz zakaz criitasača. ⁴⁷Anchucqui nii Moisés cjiirtanaca ana criičhaj niiquei, čjaknužt weriž chiitanaca criyasajo?

JESUSAQUI ČHJERI TJAAČHA

6 ¹Jalla nuž chiižcu Jesusaqui Galilea cjita kotž nawjctuñtan ojkchiča. Nii kotaqui Tiberias, cjitazakaztača. ²Walja žoñinacaqui niižquin apziča, milajrunaca paañi cheržcu nižaza laanaca čhjetinchi cheržcu. ³Pero Jesusaqui tsjii curu yawchiča niiž tjaajintanacžtan. Jalla nicju julziča. ⁴Nii oraqui judío žoñinacž pascua pijizta žcatitača. ⁵Acha waytižcu, Jesusaqui walja

žoĥinaca apžquĩni cherchiĥa.
Nekztanaquĩ Felipžquiz paljayĥiĥa,
tuž cjican:

—ĤJakziquiztan lujlz ĥherinaca
kjayžcaquĩ, tii tama žoĥinacžquiz luli
tjaazjapaya?

⁶Jesusaquĩ nuž ĥiĩĥiĥa Felipe
yanzjapa, jaknužt kjaazñi, jalla nii. Nii
ora Jesusa persun kuzquiz zizatĥa,
jaknužt nii žoĥinaca luli tjaaĥaja,
jalla nii. ⁷Nekztanaquĩ Felipiquĩ
kjaaziĥa, tuž cjican:

—Paa patac pajk paaz walurchiz
t'anta anaž alcansasaĥa, zapa mayni
zkoluccama lujlz cjenami. ⁸Tsjii
tjaajintaquĩ, Andrés, cjitataĥa, Simón
Pedruž lajk. Jalla niiquĩ tuž cjichiĥa:

⁹—Tekz tsjii uza žejlĥa, pjijska
siwat t'antichiz, pizc ĥl'izziz. Pero
ĥtama žoĥinacžquiz wacas teejo?

¹⁰Nekztanaquĩ Jesusaquĩ
mantichiĥa:

—Tjappacha nii žoĥinaca, julznajo.

Jalla nii yokaquĩ walja pastu
yokataĥa. Nekziquĩ tsjii pjijska warank
luctak žoĥinaca julziĥa. ¹¹Jalla
nekztanaquĩ Jesusaquĩ nii t'anta tanžcu,
Yoozquin gracias cjican cjichiĥa.
Nekztanaquĩ tjaajintanacžquin
tjaachiĥa. Jalla nii tjaajintanacaquĩ
partir payĥiĥa nii julzi žoĥinacžquiz.
Nužuzakaz nii pizc ĥl'iztan tožžcu,
lujlkatchiĥa, jaknužt zapa mayni
pecatĥaja, jalla nuž. ¹²Jalla nuž nii
žoĥinacaz ĥjekĥiž cjen, Jesusaquĩ niiž
tjaajintanaca mantichiĥa, tuž cjican:

—Nii žejtĥi t'unanaca ricuja, ana
ĥjulumi pertita cjeajo.

¹³Nekztanaquĩ žoĥinacaz lujlz
žeržtan, niiž tjaajintanacaquĩ nii
pjijska siwat t'antiquiztan žejtĥinaca
ricujĥiĥa. Tuncapan canasta ĥjijpi
ricujĥiĥa. ¹⁴Nekz žejlñi žoĥinacaquĩ
Jesusiž paata milajru ĥeržcu, tuž
cjichiĥa:

—Ĥekapani, tiikalala nii tjonñi
profetaquĩ.

¹⁵Jesusaquĩ ninacž kuzquiz
nayĥiĥa. Ninacaquĩ Jesusa pjorazž
majkz pecatĥa, ninacž ĥawc jiliri
cjeajo. Jalla nižtiquiztan Jesusaquĩ
ninacžquiztan zarakžcu cur punt kjutñi
yawĥiĥa, zina žejljapa.

JESUSAQUI KJAZ JUNTUŃ OJKĤHA

¹⁶Tjuñiž kattan niiž tjajinta
žoĥinacaquĩ kot atquin
ĥjijwžquichiĥa. ¹⁷Nii curquiztan
ĥjijwžcu warcuquiz luzziĥa,
Capernaum watja irantizjapa. Jalla
nekztanaquĩ kotquiz oki kallantichiĥa.
Ween zumĥitaĥa. Jesusaquĩ imapanž
ninacžquin tjonatĥa. ¹⁸Kotquiz okan
tsjii pjursant tjamiquĩ tjamžquichiĥa.
Jalla nižtiquiztan kjaz ljojkjinacaquĩ
waljaž ljojkinžquichiĥa. ¹⁹Tsjii tupu
zkoluc jilalla ojĥiž cjen, ninacaquĩ
Jesusaž warcuquin žcatžinžquĩni
cherchiĥa. Jesusaquĩ kjaz juntun
tjonatĥa. Pero Jesusižquiz ana
pajatĥa nii zumĥiquiz cjen. Jalla
nekztan ninacaquĩ anĥa tsucĥiĥa.
²⁰Nekztan Jesusaquĩ ninacžquiz tuž
cjichiĥa:

—Werjtĥa. Anaĥa tsuca.

²¹Jalla nuž ĥiitiquiztan
ninacaquĩ Jesusa warcuquiz cuntintu
luzkatchiĥa. Kot taypiquiztaĥa. Pero
nii ratupacha kot atquin cjissiĥa, jakzi
wajtquin okatĥaja, jalla niĥu.

ŽOĤINACAQUI JESUSA KJURĤHA

²²Jakatažuquĩ nii kotž nawjctuñtan
ecta žoĥinacaquĩ Jesusa ana
cherchiĥa. Zezcu zeztan tsjii
warcukaz želatĥa. Jesusaquĩ
warcuquiz ana luzziĥa. Niiž tjajinta
žoĥinacakaz warcuquiz ojĥiĥa.
Pero jakziquin Jesusaquĩ želatĥaja,
ana zizziĥa nii ecta žoĥinacaquĩ.

²³Nekztan yekja warcunacaqui irantižquichiča Tiberias cjita wajtquiztan. Jakziquin nii žoñinaca t'anta lujlchižlaja, jalla nieju irantižquichiča. Ima lujlkatcan, Jesús Jiliriqui Yoozquin parlichicha gracias cjican. ²⁴Nekzi ecta žoñinacaqui Jesusami niiž tjaajintanacami ana nekz cheržcu warcunacquiz luzziča. Capernaum watja ojkcichiča Jesusa kjuri.

JESUCRISTUŽ CHIITA TAKU

²⁵Kot tsjii latuquin irantižcu, žoñinacaqui Jesusižtan zalchiča. Jalla nuž zalžcu niižquiz pewcziča tuž cjican:

—Tjaajiñi Maestro, ¿čhjulora tekz irantižquichamtajo?

²⁶Jesusaqui ninacžquiz tuž kjaaziča:

—Ančhucaquiz ultim weraral chiižinuča. Zeczu ančhucui t'anta lujlchinčhucča chjekjañcama. Jalla nižtquiztanž ančhucui wejr kjurča. Weriž paata milajru anaž intintazza ančhucui. Jalla niiž intintaztasaz niiqui anaž wejr kjurtasača čheri lujljapakaz. Antiz wejr kjurtasača, Yooz puntu tsjan zizjapa. ²⁷Anača miranzñi čherquinaqui kuz tjaazqui. Tsjii ratujapakazza niiqui. Antis ana miranzñi Yooz čherquiñča kuz tjaa. Yooz Ejpžtan wiñaya kamzjapača niiqui. Nii Yooz čheriqui wejrqui ančhucaquiz tjaasača. Yooz Ejpqui nijapa wejr utchipanča. Wejrqui tsewtan cuchanžquita Yooz Žoñtča.

²⁸Jalla nekztanaqui nii žoñinacaqui pewcziča tuž cjican:

—¿Čhjulu obranacat paaz wauisasaya, Yooz munaña cumplisjapaya?

²⁹Jesusaqui ninacžquiz kjaaziča, tuž cjican:

—Yooz cuchanžquita Žoñžquiz kuz tjaa; niižquiz criya. Jalla niiča Yooz munañpaqui.

³⁰Nekztanaqui ninacaqui cjichiča:

—¿Amqui čhjul milajrum tjeeznas, wejrnac cherzjapajo? Nekztan amquin criyasacha. ¿Čhjul obram paa-as?

³¹Učhum tuquita atchi ejpnacaqui ch'ekti yokquin maná cjita čheri lujlchiča. Nižaza nii puntuquiztan Yooz tawk libruquiz tuž cjiirtača: “Moisesqui ninacžquiz arajpachquiztan tjonñi čheri tjaachiča”.

³²Jalla nuž chiitquiztan Jesusaqui tuž kjaaziča:

—Ančhucaquiz ultim weraral chiižinuča. Moisesqui ančhuca atchi ejpnacžquiz čheri tjaachiča. Pero Moisesqui anača tjaachiqui ultim werar arajpach t'anta čheriqui. Wejt Yooz Ejpča ultim werar arajpach t'anta čheri tjaachiqui. ³³Jalla nii Yooziž tjaata t'antaqui arajpachquiztan chjiwžquichiča. Jalla niiča tii muntuquiz žejlñi žoñinacžquiz arajpach žeti tjaaniqui.

³⁴Nekztanaqui ninacaqui Jesusižquiz cjichiča:

—Señor, nii t'anta čheri panž tjaalla.

³⁵Jalla nekztanaqui Jesusaqui tuž cjichiča:

—Wejrtča arajpach žeti tjaani t'antitqui. Jequit wejtquin tjonačhaja jalla niiqui ana wira čheri eecñiz cjequiča; nižaza jequit wejtquiz criyačhaja, jalla niiqui ana wira kjaz kjara pasñiz cjequiča. ³⁶Tuqui wejrqui ančhucaquiz chiichinča, “Ančhucui wejr cheržcumi wejtquiz ana criichinčhucča”. ³⁷Yooz Ejpqui wejt mantuquiz cjisjapa žoñinaca intirjichiča. Tjapa nii intirjita žoñinacaqui wejtquiz tjonačhaja. Nižaza jakziltat wejtquiz tjonačhaja, jalla niiqui ana weriž čhjatkatataž

cjequiĉha. ³⁸Wejrqui arajpachquiztan ana wejt persun kuczama payi tjonchinĉha. Antiz wejrqui wejr cuchanžquini Yooz Ejpž kuczama payi tjonchinĉha. ³⁹Jalla tiiĉha wejt Yooz Ejpž kuzqui. Niiž kuz tuž pecĉha, wejr ana zinta niiž intirjita žoĉinaca pertiskatajo, nižaza ninaca jacatatskatajo. ⁴⁰Nižaza tiiĉha wejt Yooz Ejpž kuzqui. Niiž kuz tuž zakaz pecĉha, jequit wejr pajaĉhaja, nižaza wejtquin crijaĉhaja, jalla niiqui Yooztan wiĉaya kamaquiĉha. Nižaza wejrqui ninaca ticziquiztan jacatatskataĉha ultim juyzu pjalz tjuĉquiziqui. Jalla nužuĉha wejt Yooz Ejpž kuzqui.

⁴¹Tuqui Jesusaqui ĉiichiĉha, tuž cjican:

—Wejrtĉha arajpachquiztan tjonchi t'antitqui. Jalla nii ĉiitiquiztan judío žoĉinacaqui niiž quintr chutĉiĉha.

⁴²Ninacaqui cjichiĉha:

—ĉAnaj tii Jesusac Jus maatejo? Uĉhumqui niiž maa ejpžquiz pajla. ĉKjaž tiizti “Arajpachquiztan tjonchinĉha” cjican ĉiyasajo?

⁴³Jalla nekztanaqui Jesusaqui ninacžquiz cjichiĉha:

—Anĉhucqui anaž nuž wejt quintr chucha.

⁴⁴Yooz Ejpqui wejr cuchanžquichiĉha. Nižaza niiĉha wejtquiz macjatskatĉiqui. Jakziltat wejt Epiž macjatskatta cjeĉhaj niiqui jalla ninacakaz wejtquiz tjonasaĉha. Anažlaj wejt Epiž macjatskatžquitaqui, wejtquiz anaž tjonasaĉha. Nižaza jacatatz tjuĉquiziqui wejtquiz criichinacaqui jacatatskataĉha, ninaca Yooztan wiĉaya kamzjapa.

⁴⁵Profetanacaqui tuquitan tuž cjiirĉiĉha: “Yoozqui tjapa niiž partir žoĉinacžquiz tjajnaquiĉha”. Jalla nižtiquiztan jequit wejt Epiž tjajinta

nonžaja, nižaza catokĉhaja, jalla niiqui wejtquiz tjonĉha, nižazaž criiĉha.

⁴⁶‘Jalla nuž wejt Yooz Epiž tjajinta cjenami, anaž jecmi persun ĉhjujĉtan Yooz Ejp cherchiqui. Wejr alajaĉha Yooz Ejp cherchintqui. Wejrqui Yooz Ejpžquiztan tjonchinĉha.

⁴⁷Anĉhucacquiz ultim weraral ĉiyuĉha. Jequit wejtquiz crijaĉhaja, jalla niiqui Yooztan wiĉaya kamĉha; nižaza arajpachquin žejtniž cjequiĉha.

⁴⁸Wejrtĉha arajpach žeti tjaaĉi t'antitqui. ⁴⁹Anĉhuc tuquita atĉi ejpnacaqui ĉh'ekti yokquin maná cjita t'anta lujĉiĉha. Pero nii t'anta lujĉiž cjenami, ninacaqui ticzizakazza.

⁵⁰Wejrtĉha arajpachquiztan tjonchi t'antitqui. Jequit wejt t'antiquiztan lulaĉhaja, jalla niiqui Yooztan wiĉaya kamaquiĉha; arajpachquin žejtniž cjequiĉha. ⁵¹Wejrqui arajpachquiztan tjonchinĉha. Jaziqui wejrpanĉha žeti tjaaĉi t'antitqui. Jequit tii t'antiquiztan lulaĉhaja, jalla niiqui Yooztan ĉica wiĉaya kamaquiĉha. Tii wejt curpuqui t'anta cuntaĉha. Wejt curpuqui tjaaĉha, tii muntuquiz žejlĉi žoĉinaca Yooztan wiĉaya kamajo. ⁵²Jalla nuž ĉiitiquiztanaqui nii judío žoĉinacaqui ninacpora ĉh'aazi kallantichiĉha, tuž cjican:

—ĉKjaž tiiz persun curpu uĉhum lulajo tjaaasajo?

⁵³Jesusaqui nekztanaqui cjichiĉha:

—Anĉhucacquiz weraral ĉiyuĉha.

Jequit anĉhucacquiztan wejt curpu ana lulaĉhaj niiqui, nižaza wejt ljoc ana licaĉhaj niiqui, jalla niiqui anapanž ultim arajpach žejtz wirchiz cjesaĉha. Anapan Yooztan wiĉaya kamasasĉha.

⁵⁴Jequit wejt curpu lulaĉhaj niiqui, nižaza wejt ljoc licaĉhaj niiqui, jalla niiĉha Yooztan ĉica wiĉaya kamĉiqui. Nižaza nii žoĉinacaqui tsjii tjonz tjuĉquiziqui weriž jacatatskattaž

cjequiĉha, Yooztan wiĉaya kamzjapa.
⁵⁵Wejt curpuqui ultimu arajpachquin
 žejtkatĉi ĉjeriĉha. Nižaza wejt ljocĉha
 ultimu arajpachquin žejtzjapa liczqui.
⁵⁶Jequit wejt žejtkatĉi curpu lujlĉhaja,
 nižaza wejt žejtkatĉi ljoc licĉhaja,
 jalla ninacaĉha wejtĉan tsjii kuzzizqui.
 Nižaza wejrtĉha ninacžtan tsjii
 kuzzizqui. ⁵⁷Wejr cuchanžquiĉi Yooz
 Ejpĉha arajpach žejtĉi kamaĉhizqui.
 Wejrmi niž cjen arajpach žejtĉi
 kamaĉhiztĉha. Nižaza jequit
 wejtquiztan lujlĉhaja, jalla niĉha weriž
 cjen arajpach žejtĉi kamaĉhizqui.
⁵⁸Wejrtĉha nii arajpachquiztan tjonchi
 t'antitqui. Jalla tii t'antaqui anaĉha
 nii maná cjita t'anta irataqui. Nii
 maná t'anta lujlchiž cjenami, anĉhuca
 tuquita atchi ejpnacaqui ticziĉha.
 Jequit tii wejt t'anta lulaĉhaja, jalla
 niĉqui arajpachquin wiĉaya žetaquiĉha.
⁵⁹Jalla nuž Jesusaqui tjaajinĉiĉha
 Capernaum wajtquiz ajcz kjuyquiz.

TSJII ŽOŃINACAQUI ANAŽ CRIIĉHA

⁶⁰Jalla nižta tjaajinta nonžcu walja
 nižquiz apžĉinacaqui tuž cjichiĉha:
 —Tii ĉiitaqui ĉh'amaĉha intintazqui.
 ¿Jequit tiiž tjaajintižquiz criyasajo?
⁶¹Jesusaqui persun kuzquiz
 zizziĉha, tsjii apžĉi žoĉinacaqui niž
 ĉiitiquiztan chutĉiĉha jalla nii. Jalla
 nižtiquiztan tuž cjichicĉha:
 —¿Tii ĉiitiquiztan chuchya,
 wejtquiztan zarakz pecya? ⁶²Tuquiqui
 arajpachquin wejr želatĉha. Anĉhucqui
 wejr wilta arajpachquin ojĉĉi ĉeraquiž
 niĉqui, nekztan ¿jaknužt anĉhuc cjeequi?
⁶³Tsjii žoĉiqui animuž cjen žejtĉha.
 Niiž curpuqui curpukazza, ana wiĉaya
 žejtĉiĉha. Nižaza weriž ĉiita takuqui
 anĉhuca animunaca arajpachquin žetĉi
 cjiskatasacĉha, Yooztan wiĉaya kamajo.
⁶⁴Yekjapanacaqui anĉhucaquiztan
 wejtquiz ana criiĉha.

Jesusaqui primirquiztanpacha zizziĉha,
 jequit nižquin ana criĉi cjeĉhaja, jalla
 nii Nižaza zizziĉha, jequit niž quintra
 tarazuna paaĉhaja, jalla nii. ⁶⁵Jalla
 nekztanaqui Jesusaqui tuž cjichiĉha:
 —Wejrqui cjichinpanĉha, “Yooz
 Ejppankazza žoĉinaca wejtquiz
 macjatskatĉiĉqui, wejtquiz criizjapa.
 Jequit wejtquiz macjatžquichi cjeĉhaja,
 jalla niĉqui wejtquiz tjonĉha, nižaza
 criiĉha. Pero jequit ana macjatžquichi
 cjeĉhaja, jalla niĉqui anapan wejtquiz
 tjonasacĉha, criizjapa”.

⁶⁶Jalla nekztanaqui walja nii
 apžĉinacaqui Jesusižquiztan zarakĉiĉha.
 Niižtan ĉhica ana iya ojĉlayĉiĉha.
⁶⁷Nekztanaqui Jesusaqui niž tuncapan
 tjaajintanacžquiz pewczicĉha, tuž cjican:
 —¿Anĉhuczakaz zarakz pecya?
⁶⁸Nekztanaqui Simón Pedruqui
 kjaaziĉha, tuž cjican:

—Wejt Jiliri, ¿jecžquin wejrnac
 okasajo? ¿Yooz puntu tjaajinta cjisjapajo?
 Am takunacakazza werara tjaajintaqui,
 jaknužt Yooztan wiĉaya kamĉhaja,
 nii. ⁶⁹Wejrnacqui amquiz criĉinĉha.
 Nižaza zizĉi ĉjissinĉha, amqui Yooz
 cuchanžquita Crisumpanĉha; wiĉaya
 žejtĉi Yooz Ejpž Maatimĉha.
⁷⁰Jesusaqui nekztan tuž cjichiĉha:
 —Wejrqui anĉhuc illzinĉha, tuncapani.
 Jalla nižta cjenami tsjii anĉhucaquiztan
 diabluž mantuquiz žejlĉha.

⁷¹Jalla nuž ĉiican Jesusaqui
 Judas Iscariote, niž puntuquiztan
 ĉiichiĉha. Simonž majĉtaĉha
 niĉqui. Judasqui tuncapan illza
 žoĉinacžquiztanpachaĉha. Niĉqui
 tarasunažcu, Jesusa intirjaquiĉha
 quintra žoĉinacž kjarquiz.

JESUSIŽ LAJKNACAQUI NIIŽQUIN ANA CRIIĉHA

7 ¹Jalla nekztanaqui Jesusaqui
 Galilea yokaran ojĉlayĉiĉha.

Judea yokquin ana ojklaz pecatĉha. Jalla nicju judío ŝoninacqui Jesusa conz pecatĉha. ²Nii timpuqui tsjii judío ŝoninacĉ pijjztaqui ŝcatitaĉha. Nii pijjzta paazjapa chjujlla kjuyanaca kjuychiĉha. ³Jalla niŝtiquiztan Jesusiŝ lajknacacqui niizquiz paljaychiĉha, tuŝ cjican:

—Ana tekz ŝela amqui. Judea yokquin oka. Jalla nicju am apŝninaĉa ŝejlĉha. Jalla ninacĉquiz amiŝ paata obranaca cherskata. ⁴Jakziltami ŝoninacĉquiz persun poder cherskatz pecĉhaja, jalla niiqui anaŝ chjozacuñ obranaca paaĉha. Jaziqumi amqui obranaca paaz poderchizzamŝlaj niiqui, kjanapacham ŝoninacĉquiz tjeeznaquiĉha.

⁵Jesusiŝ lajknacami ana niizquin criichiĉha. ⁶Nekztan Jesusaqui ninacĉquiz cjichiĉha:

—Anĉhucqui ĉjulorami pijjzta okasaĉha. Wejt ojzk oraqui imaziĉha. ⁷Tii muntuquiz ŝejlĉni ŝoninacacqui anĉhucatan ana ĉjaawjkatasacĉha. Wejttanztii ĉjaawjkatĉha. Wejrqui kjanapacha tjeeznuĉha ninacĉa ana wali paatanaca. Jalla niŝtiquiztan wejttan quintraĉha. ⁸Anĉhuckaz pijjzta oka. Wejrqui anal okasaĉha. Wejt ojzk oraqui imaziĉha.

⁹Jalla nuŝ ĉhiizcu, nii Galilea yokquin eclichiĉha.

JESUSAQUI PIJZTA OJKCHIĉHA

¹⁰Niiŝ lajknacĉaŝ pijjzta ojktanaqui Jesusaqui chjozacuñ ojkhizakazza, ŝoninaca ana cherajo. ¹¹Judío ŝoninacaczi Jesusa kjurchiĉha nii pijjzta paaŝi ŝoninacĉporquiz, tuŝ cjican:

—ĉJakziquin nii ŝoni ŝelasaya?

¹²Wacchi nii pijjztiquin ŝejlĉni ŝoninacacqui Jesusiŝ puntu parlatĉha. Yekjap ŝoninacacqui cjetĉha: “Niiĉha

zuma ŝoniqumi”. Yekjap ŝoninacaczi cjetĉha: “Niiĉha ana zuma ŝoniqumi. Ŝoninacĉquiz tsjii kjutŝi tjaajincan incallŝiĉha”.

¹³Pero judío jilirinaca ekskui, anaŝ jecmi Jesusiŝ favaora cuza kjana parlatĉha, antiz jamazitŝ parlatĉha.

¹⁴Pijjzta taypi cjisan, Jesusaqui timpluquin luzcu tjaajinchiĉha.

¹⁵Jesusaŝ nuŝ tjaajnan judío ŝoninacacqui ispantichiĉha, tuŝ cjican:

—ĉKjaŝ tii ŝoniqumi zizŝi zizŝi tjaajnasajo, ana instutiiŝcojo?

¹⁶Jalla nuŝ nii judío ŝoninacĉaŝ parlitiquiztan Jesusaqui tuŝ kjaaziĉha:

—Weriŝ tjaajintaqui anaĉha wejt kuzquiztan jwesta. Antiz wejr cuhanŝquiniŝ kuzquiztan tjonĉha.

¹⁷Jakziltat Yooz kuzcama kamz pecĉhaj niiqui, nii ŝoniqumi zizaquiĉha, weriŝ tjaajintaqui Yoozquiztan tjonchiĉha, nii. Anaĉha wejt persun kuzquiztan tjonchiqui. ¹⁸Jakziltat persun kuzcama tjaajinĉhaja, jalla niiqui persun honorakaz waytiz pecĉha. Pero wejrqui Yooz kuzcama tjaajnuĉha. Yooz Ejppqui wejr cuhanŝquichiĉha. Jaziqumi Yooz honora waytiz pecuĉha. Weriŝ tjaajintami kamtami Yooz kuzcamapankazza. Werarapanĉha. Ana zinta toscara chiyasaĉha.

¹⁹“Moisesqui anĉhucaltajapa lii ecchiĉha, ĉana jaa? Jalla nuŝ ecchiŝ cjenpacha, anaŝ jecmi anĉhucacquiiztan nii lii jaru kamchinĉhucĉha.

ĉKjaŝtiquiztan anĉhucqui wejr conz pecjo, anĉhuca lii quintrajo?

²⁰Jalla niŝtiquiztan nii ŝoninacacqui kjaaziĉha tuŝ cjican:

—Amqui zajraŝ tantamĉha. ĉJect am conz pecjo?

²¹Jesusaqui ninacĉquiz kjaaziĉha tuŝ cjican:

—Tsjii pajk obra paachinĉha jeejz tjuŝquiz. Jalla niŝta paatiquiztan

ančhucqui ispantichinčhucča. Pero weriž paata obra ana intintazzinčhucča. ²²Nonžna. Moisesqui janchiquiz chimpuz cuzturumpi ančhucaquiz mantichiča. Primirquiztanpacha ančuca atchi ejpnacatača nuž mantichiqui. Wiruñaquí Moisés zakaz nuž mantichiča, nii jaru. Jalla nižtiquiztan ančhucqui nii lii jaru žoñž janchiquiz chimpupa cjiskatiñchucča, jeejz tjuñquizimi. ²³Moisés lii rispittapanž cjisjapa, ančhucqui jeejz tjuñquiz cjenami žoñž janchiquiz chimpupa cjisinčhucča. Jalla nižtiquiztan čkjažtiquiztan ančhucqui wejt quintra žawj-jo, weriž jeejz tjuñquiz žoñž curpu čhetintiquiztanajo? ²⁴Ančhucqui, Yooz kuzmi nižaza žoñž kuzmi ana zizcuqui, anača uj jwez peczqui. Ujchiz jwez peccuqui zuma ujchiz jwezpanča.

¿JAKZQUIZITAN TJONCHI JESUSAJO?

²⁵Jalla nekztanaqui yekjap Jerusalén žejlñi žoñinacaqui pewcziča, tuž cjican:

—Tiiča nii conz pecta žoñi, čana jaa? ²⁶Pero tekz žejl-la, anaž chjozacuñ tjaajinla; kjanaž tjaajinla. Niiž quintra žoñinacaqui ana kjažmi cjila. Jaziqui, čjilirinacami pajkay, tiiqui Yooz cučanžquita Cristokay? Anapanž cjesača. ²⁷Wejrnaqui zizuča, jakziquiztan tii žoñi tjonchižlaja, jalla nii. Pero Cristuž tjonžcuqui anaž jecmi zizaquiča jakziquiztan tjončhaja, jalla nii.

²⁸Jalla nekztanaqui Jesusaqui timpluquin tjaajincan, alto tawkžtan tuž cjichiča:

—Ančhucqui cjinčhucča, nii žoñi pajuča, nižaza jakziquiztan tjonchižlaja, nii. Ultimu ančhucqui

wejr ana pajča. Wejrqui persun kuzquiztan ana tjonchinča. Antiz cučanžquita tjonchinča. Nii wejr cučanžquiniqui zuma lujitumača. Nižaza ančhucqui nii ana pajča. ²⁹Pero wejrqui niižquiztan tjonuča. Nižaza niiqui wejr cučanžquichiča. Jalla nižtiquiztan wejrqui nii pajuča.

³⁰Jalla nižta chiitiquiztan ninacaqui preso tanz pecatča. Jesusiž preso tanta cjis oraqui imazitača. Jalla nižtiquiztan ana jakziltami tanzñi atchiča. ³¹Jalla nuž tanz pecñi žoñinaca želanami walja žoñinacaqui Jesusižquin criichiča. Nii criichinacaqui tuž cjichiča:

—Yooz cučanžquita Cristo tjonžcuqui, čtii žoñžquiztan juc'ant cuza milajrunaca paasajo?

ZULTATUNACA CUCHANTA

³²Jalla nekztanaqui fariseo žoñinacaqui Jesusiž puntu chiitanaca nonžcu, ninacaqui timplu jilirinacžtanpacha Jesusa preso tani zultatunaca cučanžquichiča. ³³Jalla nižtiquiztan Jesusaqui cjichiča:

—Wejrqui tjii kjaž jiizkal ančhucatan želača, jalla nekztan wejr cučanžquinižquin quepača. ³⁴Jalla nekztan ančhucqui wejr kjuraquiča. Jalla nuž kjurcan anaž wejr wachi ataquiča. Nižaza ančhucqui anaž oki atasača, jakziquint wejr želačhaja, jalla nicju.

³⁵Jalla nekztanaqui nii judfo žoñinacaqui ninacpora pewcsasiča, tuž cjican:

—¿Jakziquint tii okas, ana watžta cjisjapajo? ¿Yekja yokquin kamñi judfo žoñinacžquin nižaza nekz žejlñi žoñinacžquin okas tejo, ninacžquin tjaajinzjapajo? ³⁶Čhjulut tiiž chiitac cjes? “Ančhucqui wejr kjuraquiča, pero wejr ana wachi ataquiča”, cjican.

Nižaza “Ančhucqui anaž oki atasača, jakziquint wejr želačhaja, jalla nicju” cjican. Jalla nuž chiyanacui, čhjulut cjes?

³⁷ Jalla nekztanaqui pjijzta tucuzinž tjuñquiziqui wali chawc tjuñitača. Jalla nii tjuñquiziqui Jesusaqui tsijtscu, alto tawkžtan paljaychiča:

—Jakziltat kjaz kjara passaja, jalla niiqui wejtquiz macjatža, wejt wiñaya žejtkatni kjaz liczjapa.

³⁸ Jeqit wejtquiz criyačhaja, jalla niiz kuzquiztan walja zumanaca ulnaquiča jaknužt tsjii zuma jalzurquiztan zuma kjaznaca ulančhaja, jalla nižta. Jalla nuž Yooz tawk libruquiz cijjrtača.

³⁹ Jalla nuž chiican Jesusaqui Espiritu Santuž puntuquiztan chiichiča. Wiruñacui Yooz Espiritu Santuqui Jesusižquiz criichinacž kuzquiz luzaquiča. Pero Jesusaqui imaž ticznatča, nižaza imaž tsewc arajpacha okatča. Jalla nižtiquiztan imazitača Espiritu Santo tjaataqui.

CRISTUŽ PUNTU PARLITA

⁴⁰ Jalla nuž Jesusaž chiita nonžcu yekjap žoñinacui cjichiča:

—Chekapan tiiča nii tjonni profetaqui.

⁴¹ Yekjapazti tuž cjichiča:

—Tiiča Yooziž cuchanžquita Cristuqui.

Yekjapanacui cjichiča:

—čKjaž Galilea žoñinacžquiztan Cristuc nasasajo? Anaž cjesača.

⁴² “Cristuqui Davidž majchmajtquiztan naspanča, nižaza Belén cjita wajtquin nasaquiča. Nii watjaqui Davidž watja cjitača”. Jalla nuž cjiča Yooz takuqui.

⁴³ Jalla nuž parližcu nii žoñinacui t'aka t'aka cjissiča, Cristuž puntuquiztan ch'aazcu.

⁴⁴ Yekjapanacui Jesusa preso tanz

pecatča. Jalla nuž peccanami, ana jaknužumi payi atchiča.

⁴⁵ Timplu zultatunacui timplu jilirinacžquinami fariseonacžquinami quejpcchiča, ana Jesusa preso tani atžcu. Nii jilirinacui zultatunacžquiz cjichiča:

—čKjažtiquiztan ančhuc nii ana zjijcjo?

⁴⁶ Nii žultatunacui kjaaziča, tuž cjican:

—Anaž jecmi chiiča, jaknužt nii žoñi chiyatčhaja, jalla nužuqui. čYooziž cuchanžquita nii žoñejo?

⁴⁷ Jalla nekztanaqui fariseo žoñinacui tuž cjichiča:

—čAnčhuczakaz incallskatchinčhucž, jaz? ⁴⁸ Tjapa učum jilirinacami nižaza tjapa fariseo žoñinacami nižžquinaqui ana criichipanla. ⁴⁹ Tii ana lii pajni žoñinacui, jalla ninacakazza nižžquin criichiqui. Ninacui Yooziž castictapanž cjequiča.

⁵⁰ Nicodemo cjitatača tsjiiqui ninacžquiztan. Tuquiqui ween chjozacuñ Jesusižquin zina ojkičiča. Jalla niiqui ninacžquiz cjichiča:

⁵¹ —Učum liiqui tuž cjiča, “Tsji žoñiqui ima casticta cjican, primero kjawžta cjequiča, niž persun razuna nonžta cjisjapa”. Nuž cjiča učum liiqui, čana jaa?

⁵² Nekztanaqui ninacui kjaaziča tuž cjican:

—čAm zakaz Galileauiztanajo? Yooz taku istutiya. Anaž jec profetaqui Galileauiztan tjonasača. Jazim zizaquič, jaz.

⁵³ Jalla nekztanaqui tjappacha persun kjuya ojkičiča.

ADULTERIUQUIZ OJKLAYNI ŽON

8 ¹ Jesusaqui Olivos cjita curulla ojkičiča. ² Jakatažuqui kjantati timpluquin quejpžquichiča. Tjapa

neks žejlñi žoñinacaqui nižquin tjonchiča. Jesusaqui julžcu wilta tjaajinchiča. ³Jalla nuž julzi tjaajnan, lii tjaajiñinacami fariseonacami tsjaa maatak žon zjijcchiča. Jalla naa maatak žonqui adulterio paachiž cjen tanstkalča. Žoñinacaqui jalla nuž tanžcu naa maatak žon Jesusiž yujcquiz zjijcchiča. Nižaza nii žejlñi žoñinacž taypiquiz tsijskatchiča naa žonqui. ⁴Nekztanaqui ninacaqui Jesusižquiz tuž paljaychiča:

—Tjaajiñi Maestro, taa maatak žonqui adulterio paanipacha tanassinča. ⁵Moisés liiquiz tuž mantitača, “Tižta adulteriuquiz cjicjiñi žoñinacaqui čhajc jawi conz cjitača”. Am, čkjažum cjiy?

⁶Jalla ninacaqui nuž paljaychiča, Jesusa kjas cjiñit cjes, jalla nii zizjapa. Nižaza Jesusiž chiitiquiztan ujchiz jwez pecatča, niž quintra tsjii uj tjojtunzjapa. Jalla nekztanaqui Jesusaqui pachpiquiz colžcu yokquiz cjiiri kallantichiča, niž loc'anžtan. ⁷Pero ninacaqui tirapanž Jesusižquiz pewcnatča, “Am, čkjažum cjii?” cjian. Jalla nekztan Jesusaqui zumpacha acha waytižcu, ninacžquiz cjichiča:

—Ančucaquiztan jakziltapirižlaj ana ujchiz, niiqui primiru taa maatak žonaquiz maztan čhajczkazza.

⁸Jalla nuž chiižcu wilta colžcu yokquiz tira cjiiratcha. ⁹Jalla nuž Jesusiž chiitiquiztan nii žoñinacaqui persun ujquiztan sint'ichiča. Nekztanaqui mayat mayat ch'uju ulñi kallantichiča. Chawc žoñinacž primiraqui ulanchiqui. Nekztan tjappacha nii žoñinacž ulantan, Jesusaqui naa maatak žonatan, nuž pucultankaz, eclichiča. ¹⁰Jalla nekztanaqui Jesusaqui wilta acha waytichiča. Anaž jecmi želatča.

Naa maataka alajakaztača. Nekztan naaquiz cjichiča:

—Cullaca. ČJakziquin amquiz uj tjojtunñi žoñinacajo? ČAna jakziltami am castiqui atchikaya?

¹¹Naa maatak žonqui cjichinča:

—Wejt Jiliri, anaž jakziltami wejr castiqui atchiča.

Nekztanaqui Jesusaqui naaquiz cjichiča:

—Wejrmi anal am ujquiztan casticača. Jaziqui oka amqui, anam iya uj paaquiča. —Nuž pertunchiča Jesusaqui.

KJANAŽTAKAZ JESUCRISTO

¹²Wiruñaquei Jesusaqui žoñinacžquiz wilta paljaychiča, tuž cjian:

—Wejrqui tii muntuquiz žejlñi žoñinacžquiz zuma kamaña tjeeznuča, tsjii kjanažtakaz. Jakziltat wejt kamañ jaru kamačhaja, jalla niiqui anawal zumchiquiz anaž kamaquiča. Nižaza nii zuma kamañchiz žoñinacča wiñaya Yooztan kamñinacaqui.

¹³Jalla nekztanaqui nii fariseo žoñinacaqui cjichiča:

—Am alaja am persunjapa chiiča. Jalla nižtiquiztan anaž walča.

¹⁴Jesusaqui kjaaziča, tuž cjian:

—Tii weriž chiitaqui wejt persunjapa cjenami walča. Wejrqui zizuča jakziquiztan tjontučhaja, nižaza jakzit wejr okačhaja, jalla nii. Anchuczi anaž nii zizza. ¹⁵Ančhucqui žoñiž pinsita jarukaz wejtquiz uj tjojt pecča. Pero wejt kuz ana zizza. Wejrzi anal niža uj tjojtiñča. ¹⁶Pero weril tsjii žoñžquiz “Uj paachamča” cjeež niiqui, wejrqui weraral chiyuča nii žoñiž uj paañiž cjen. Anal wejt kuzquiztankaz chiyuča. Wejr cuchanžquini Yooz Ejpoz kuzcamakal wejrmi chiyuča. Wejrmi wejt Yooz Ejpmi tsjiikaz chiyuča. ¹⁷Ančuca

liiquiz tuž cjiirtača: “Pucultan tistic žoninacaqui tsjiikaz chiyaquiz̃ niiqui ninacž chiitaqui walča”. ¹⁸Wejrqui persun puntuquiztan chiyuča. Nižaza wejr cuchanžquini Yooz Ejpqui wejt puntuquiztan zakaz chiicha. Jaziqui weriž chiitaqui panž walča.

¹⁹Jalla nekztanaqui ninacaqui Jesusižquin cjichiča:

—ĹJakziquint am Ejpjo?

Jesusaqui tuž kjaaziča:

—Ančhucqui wejr anaž ultimu pajča, nižaza wejt Ejpmi anaž pajča. Wejr ultimu pajčhaj niiqui, wejt Ejp zakaz pajasača.

²⁰Nuž tjaajincan Jesusaqui timpluquiz želatča. Jakziquin ofrenda utz cajanaca želatčaja, jalla nekz želatča. Nuž želan, anaž jecmi Jesusa preso tanchiča. Jesusa preso tanta cjis oraqui imazitača.

JESUSA OJKZ PUNTU

²¹Jalla nekztanaqui Jesusaqui wilta ninacžquiz cjichiča:

—Wejr okača. Jalla nekztanaqui ančhucqui wejr kjuraquiča. Pero jakziquint wejr okačhaja, jalla nicju ančhucqui anaž oki atasacha. Ančhucqui ticznaquiča persun ujquiztan ana pertunta.

²²Nekztanaqui nii judío žoninacaqui cjichiča:

—Tiiqui chiiča, “Jakziquint wejr okačhaja, jalla nicju ančhucqui ana oki atasacha”, cjicanž chiiča. ĹTiiqui persunpacha curpu conasaya?

²³Nekztanaqui Jesusaqui tuž cjichiča:

—Ančhucqui tii koza yokchiz žončhuckazza. Wejrzti tsewcta yokchiz žončča. Ančhucqui tii yokquiz žejlñi žonž kuzcama kamiñchucča. Wejrzti ana tii yokquiz žejlñi žonž kuzcama kamiñča. ²⁴Jalla nižtiquiztan wejrqui

ančhucquiz chiichinča, ančhucqui ticznaquiča, persun ujquiztan ana pertunta. Ultimupan ančhucqui weriž chiitaqui ana catokaquiz̃ niiqui, ticznaquiča, persun ujquiztan ana pertunta.

²⁵Jalla nekztanaqui ninacaqui pewcziča, tuž cjican:

—ĹJequimt amjo?

Jesusaqui tuž kjaaziča:

—Jaknužt wejt persun puntuquiztan chiintčhalaja, jalla nižta žonťpanča wejrqui. ²⁶Ančhuc punctuquiztan wejtta walja chiiz žejlča, ančhuc ujtjeezjapa. Pero wejt chiizqui anača wejt kuzquiztanqui. Antiz wejr cuchanžquiniž kuzcamapankazza. Wejr cuchanžquiniqui werara chiiñipanča. Wejrqui nižquiztan nonžtanaca maznuča tii muntuquiz žejlñi žoninacžquiz. Jalla nižtiquiztan weriž chiitaqui ančhuc punctuquiztan ultim werarača. —Jalla nuž chiichiča Jesusaqui.

²⁷Jalla nuž Yooz Ejpž punctuquiztan chiyān, nii judío žoninacaqui ana intintazziča. ²⁸Jalla nekztan Jesusaqui cjichiča:

—Wejrqui tsewctān cuchanžquita Yooz Žonťča. Čhjūlorat ančhucqui wejr tsewcchuc waytita cheračhaja, jalla nii ora ančhucqui zizaquiča, werarača wejt persun punctuquiztan chiitaqui, nii. Wejrqui anal wejt persun kuzquiztan kamuča. Antiz wejt Yooz Epiž kuzcama kamuča. Wejt waytiz oraqui jalla niizakaz zizaquiča. ²⁹Wejr cuchanžquiniqui wejttañ chicaž žejlča. Wejrqui niž kuzcamapan kamuča. Jalla nižtiquiztan wejt Ejpqui anaž wejr zina ecča.

³⁰Jalla nuž Jesusiž chiitiquiztan muzpa žoninacaqui nižquin criichiča.

LIWRIIZ PUNTU

³¹ Jalla nekztanaqui Jesusaqui niizquiz criichi judío žoñinacžquiz cjichiča:

—Ančhucqui weriž chiita tawquiz tjapa kuztan tjurt'auqiž niiqui, ultim werara wejt partir žoñinaca cjequiča.

³² Nižaza Yooz takuča ultim

weraraqui, nii zizaquiča. Jalla nuž werara zizcu liwriitaž cjequiča.

³³ Nii ana criichi judío žoñinacaqui Jesusižquiz kjaaziča, tuž cjican:

—Wejrnacqui Abrahamž majchmajtquiztan tjoninča. Jaziqui Yooz wajtchiz žoñinactča wejrnacqui. Yekjaž mantuquiz anaž wira žejlchinča. Amzti, ĺkjažtiquiztan chiichamta, “Ančhucqui liwriitaž cjequiča” cjicanajo?

³⁴ Jesusaqui ninacžquiz cjichiča:

—Ančhucaquiz weraral chiyuča. Jakziltat uj paacan kamčhaja, jalla niiqui ujž mantuquiz kamča. ³⁵ Tsji mantita piyunaqui patrunž kjuyquiz kamchi cjenami ultimu anaž nii kjuychiz famillž partiquiz želasača. Antiz nii famillž majchqui jalla niiča famillž partiquiz žejlñipanča. ³⁶ Jalla nižtiquiztan ančhucqui Yooz Majchiž liwriita cjequiž niiqui ultim werara liwriita cjequiča, Yooz kjuychiz famillquiz cjisjapaqui. ³⁷ Wejr zizuča, ančhucqui Abrahamž majchmajtquiztan tjoninčhucča, nii. Pero jalla nuž cjenami, ančhucqui weriž chiitanaca anapan catokča. Jalla nižtiquiztan ančhucqui wejr conz pecča. ³⁸ Wejrqui chiyuča, wejt Yooz Epiž chiitanaca, jalla nii. Ančhuczi ančhuca epiž chiita jaru paača.

³⁹ Ninacaqui tuž kjaaziča:

—Wejtnaca atchi ejpča Abrahamqui. Pero Jesusaqui ninacžquiz cjichiča: —Ančhucqui ultimu Abrahamž majchmajtchuc cjičhaj niiqui, niiz

kamta irataž kamčhani. ⁴⁰ Yoozquiztan nonžtanac jaru werara chichinča.

Jalla nuž werara chitiquiztan

ančhuczi wejr conz pecča.

Abrahamqui ana niža paachiča.

⁴¹ Ančhucqui persun epiž kamta irataž kamča.

Nekztanaqui ninacaqui cjichiča:

—Wejrnacqui anača adulteriuquiz kamñi maa ejpžquiztan tjoninči. Wejtnaca maa ejpnaca zizuča. Nižaza wejrnacqui tsji arajpach Ejpchizkazza. Yooza niiqui.

⁴² Jesusaqui nekztan cjichiča:

—Ančhuca ejpqui Yoozalaj niiqui, ančhucqui wejttan zuma munazitasacha. Wejrqui Yooz Ejpžquiztanča; niizquiztan tjonuča. Niiž pinsitiquiztan tekz tii muntuquiz želuča. Anal wejt kuzcamakaz tjonchinča. Wejt Yooz Ejpqui wejr cuchanžquichiča. ⁴³ ĺKjažtiquiztan ančhucqui weriž chiitanaca ana intintazasajo? Ančhucqui weriž chiitanaca anapanž kuztan nonz pecča, nekztan. ⁴⁴ Ančhuca ultim ejpqui diabluča. Niiž kuzcama kamz pequiñchucča. Primirquiztanpacha niiča žoñi conñiqui. Nižaza diabluqui werara chiizquiztan ana juyzu paañiča. Anapanča werar taku chiiñi niiqui. Niiž ana zum kuzcamapan toscar takunaca chiiča. Niipankazza toscara chiiñiqui. Nižaza niiča toscar chiiñinacž ejpqui.

⁴⁵ Wejrqui ančhucaquiz weraral chiyuča. Ančhuca diablu ejpchiz cjen, weriž werara chiitanaca ana criinčhucča. ⁴⁶ ĺJect ančhucaquiztan tsji weriž paata uj tjeenasajo?

Wejrqui Yooz taku werarapan chiyuča. ĺKjažtiquiztan wira ana wejtquiz crii ančhucjo? ⁴⁷ Yooz partir žoñinacaqui Yooz takuž nonža. Ančhuczi anapanča Yooz partira.

Jalla nižtiquiztan ančhucqui Yooz taku ana nonz pecčha.

IMA ABRAHAM ŽELAN, JESUCRISTUQUI ŽELATČHA

⁴⁸Nekztan judío žoñinacaqui Jesusižquiz kjaazičha tuž cjican:
—Amqui anawal Samaria wajtchiz žoñimžlani. Zajraž tanta žoñimžlani. Nužupančha.

⁴⁹Jesusaqui ninacžquiz tuž kjaazičha:
—Wejrqui anačha zajraž tantitqui. Wejt Yooz Ejpž honora waytučha. Ančhuczi wejr iñarcan wejtquiz anaž honora tjaačha. ⁵⁰Wejrqui persun honora ana waytiz pecučha. Tsjiiquei žejlčha. Jalla niičha wejt honora waytiz pecñiqui. Jalla niičha lijituma pjalzñiqui. ⁵¹Wejrqui ančhucacquiz weraral chiyučha. Jequit weriž chiitacama kamčhaja, jalla niiquei ana ticžñiž cjequičha; Yooztan wiñaya kamaquičha.

⁵²Jalla nuž chiitiquiztan judío žoñinacaqui tuž kjaazičha:
—Jalla nuž amiž chiitiquiztan wejrnacaqui zizzinčha, zajraž tantapanimkalal amqui. Abraham ticzičha; profetanacami ticzizakazza. Amzti cjičha, “Jequit weriž chiitacama kamčhaja, ana ticžñiž cjequičha”, nii. ⁵³Amqui wejtnacaž ticzi Abraham ejpžquiztan tsjan jilirim cjes, čkjažtatajo? Yooztajapa chiini profet žoñinacami ticzičha. ČChjul žoñipanim amzt cjesajo?

⁵⁴Jesusaqui tuž kjaazičha:
—Wejt persun honora waytaž niiquei, jalla nuž waytita honoraqui anaž walčha. Wejt Yooz Ejpčha wejt honora waytiñiqui. Jalla niiz puntu ančhucqui “Wejtnaca Yoozza” cjiñčhucčha. ⁵⁵Ančhucqui nii Yoozqui anapan pajčha. Wejrkal nii pajučha.

“Wejrqui Yooz Ejp anal pajučha”, cjesaž niiquei, wejrqui toscaral cjesačha, ančhuc irata. Yooz Ejp pajučha; nižaza niiz chiitacama kamučha. ⁵⁶Tuquita atchi Abraham ejpqui wejt tjonž tjuñi nonžcu, walja cuntintutačha. Nižaza wejt tjonž tjuñi zizcu, walja chipchičha.

⁵⁷Jalla nuž chiitiquiztan nii judío žoñinacaqui Jesusižquiz cjičhičha:

—Amqui imazi pjijzka tunc watchizzam pero. ČJaknužt amzti Abraham pajcham cjesajo?

⁵⁸Jesusaqui ninacžquiz tuž kjaazičha:
—Ančhucacquiz ultim weraral cjiwčha. Ima Abraham želan, wejrqui žejlchinčha.

⁵⁹Jalla nuž chiitiquiztan judío žoñinacaqui maznaca aptichičha. Jesusa maztan čhajcz pecatčha. Jesusazti chjojzičha. Nekztan timpluquiztan ulanchičha. Nekž žejlñi žoñinacž taypiquiztan atipassičha.

ZUR ŽOÑI ČHJETINTA

9 ¹Jalla nekztanaqui Jesusaqui jiczquiz ojkičha. Nii jicz latuquiz tsjii zur žoñi želatčha. Majttiquiztanpacha zuratačha. ²Jalla nii žoñi cheržcu Jesusiž tjaajinta žoñinacaqui pewczičha, tuž cjican:
—Tjaajiñi Maestro, čkjažtiquiztan zurapan majttata? ČNiiž maa ejpž ujquiztan nižta zura majtta cjesaya? Už čpersunž ujquiztan cjesaj?

³Jesusaqui ninacžquiz tuž kjaazičha:

—Anaž niiz persun ujquiztanami, nižaza anaž niiz maa ejpž ujquiztanami zura majttatačha. Antiz zura žejlčha, niiz zuržquiz Yooz obra tjeeža cjisjapa. ⁴Jaknužt žoñinaca majiñ langžaja, jalla nižta irata wejrnacqui tii muntuquiz žejlcan langstančha. Wejt cuchanžquiniž tjaata obranaca langstančha. Zumz timpu

wajillača. Zumchi cjenauqui anaž jecmi langzuca. ⁵Tii muntuquiz žejlcan wejrqui žoñinacžquiz Yooz zuma kamaña tjeeznuča, tsjii kjanažtakaz.

⁶Jalla nuž chiižcu, Jesusaqui yokquiz tjujtzicha. Nekztan nii tjujtzta llawsa yok pjilžtan tjarziča. Jalla nii aptižcu nii zur žoñž čhjucquiz tjalžinchiča. ⁷Nekztanaqui nii zur žoñžquiz cjichiča:

—Siloé cjita coch paata kjazquin oka. Jalla nicju čhjuiqui awjžca.

Siloé cjita tjuuqui “Cuchanžquita” cjicha ninacž tawkquiz. Jalla nekztanaqui nii zur žoñiqui ojžcu čhjuiqui awjžicha. Nekztan cherñi cjissiča. Cherñi quejpžquichiča.

⁸Jalla nekztan niiž žcati kamñi žoñinacami nižaza niižquiz pajñi žoñinacami nii žejtchi cheržcu, tuž cjichiča:

—¿Anaj tiiqui nii paaz tomtomangžñi žoñiya? Tuquiqui julzi žejlñitala.

⁹Yekjapanacaqui cjetča:

—Niipansala.

Yekjapac cjetča:

—Anapanž nii tiiqui. Nižtažtakazla, pero.

Pero nii žejtchi žoñipachača cjichiqui:

—Wejrpantča.

¹⁰Jalla nekztanaqui niižquiz pewcunchiča:

—¿Kjažum am jazic cher, kjažtatajo?

¹¹Niiqui ninacžquiz kjaaziča tuž cjican:

—Nii Jesusa cjita žoñiqui llawsiztan yok pjilžtan tjarziča. Jalla nuž tjaržcu wejt čhjucquiz tjalžinchiča, tuž cjican: “Siloé cjita kjazquin oka. Jalla nicju ajunžca”. Jalla nekztanaqui ojkcchinča wejrqui. Čhjuiqui ajunžcu cherñi cjissinča.

¹²Jalla nekztanaqui nii žejtchi žoñžquiz pewczizakazza tuž cjican:

—¿Jakziquin nii žoñiya?

Niiqui tuž kjaaziča:

—Anal zizuča.

¹³Jalla nekztanaqui jakatažuqui nii zurquiztan čhjetinta žoñiqui fariseo partinacžquin čhjichtatača.

¹⁴Jeejz tjuñquiz Jesusaqui nii milajru paachiča. ¹⁵Fariseo žoñinacaqui nii zurquiztan čhjetinta žoñžquiz wila pecunchiča, tuž cjican:

—¿Anziqui kjažtam cherya?

Nii žoñiqui tuž kjaaziča:

—Llawsiztan pjilžtan tjaržcu, wejt čhjuiqui tjalžinchiča. Jalla nekztan wejt čhjuiqui ajunžcu, cherñi cjissinča. Jaziqui cheruča.

¹⁶Tsjii fariseo žoñinacaqui nii Jesusizjapa quintru chiichiča, tuž cjican:

—Nii žoñiqui anaž Yooz partiquiztan cjesača. Niiqui ana jeejz tjuñimi rispitchila.

Yekjapazti cjetča:

—¿Kjažt ujchiz žoñiqui nižta milajrunaca paasajo? Anaž cjesača.

Jalla nižtiquiztan Jesusiz puntuquiztan t'aka t'aka cjissiča.

¹⁷Jalla nuž t'aka t'aka cjiscu, wila nii zurquiztan čhjetinta žoñžquiz pecunchiča, tuž cjican:

—¿Amqui kjažum cjii, am čhjuiqui čhjetiñi žoñž puntu?

Nii žoñiqui tuž kjaaziča:

—Wejrqui cjiwča, jalla niiča Yooz cuntiquiztan chiiñi profet žoñipanqui.

¹⁸Tuquiqui nii žoñiqui zuratača, jaziqui cherñi cjissiča. Pero nii judío žoñinacaqui nii milajru ana criiz pecatča. Jalla nekztan nii žoñž maa ejp kjawziča, pewczjapa. ¹⁹Jalla tuž pewcziča:

—¿Tiic am majchkaya? ¿Tiic zurapan majttatakaya? ¿Kjažt tiizti cherñi cjesajo?

²⁰Nii maa ejpqui kjaaziča, tuž cjican:

—Tiipanča wejtnaca majchqui.
Nižaza zurapan majttatača. Jalla
niikal chiyasača. ²¹Anziqui cherñi
cjissižlani, jalla nii puntuquiztanaqui
anal zizuča. Nižaza jecčhalaj tiiz
čhjujqui čhjetinchi anal zizuča.
Tiika pewcnani. Pajk žoniča tiiqui.
Tiipachaž razunaqui tjaasača.

²²Nii judío žoninacaqui tsjii
acuerduquiz parlassitača, jakziltat
Jesusiž puntuquiztan “Tiiča Cristuqui”
cjican chiyachaja, jalla niiqui ajcz
kjuyquiztan chjatkattaž cjistanča.
Jalla nii acuerduquiz parlassitača.
Jalla nižtiquiztan nii zur žoňž maa
ejpmi ekziča; ana kjanacama
chiiz pecatča. ²³Jalla nižtiquiztan
ninacaqui kjaaziča, tuž cjican:

—Tiika pewcnani. Pajk žoniča tiiqui.

²⁴Jalla nekztanaqui nii judío
žoninacaqui nii zurquiztan čhjetinta
žoni wilta kjawziča. Nekztan tuž
cjichiča:

—Yooz honora wayta. Anača Jesusiž
honora waytizqui. Wejrnaca zizuča,
nii čhjetinñi cjita žoniqui walja uj
paañipanča.

²⁵Jalla nekztan nii zurquiztan
čhjetinta žoniqui tuž kjaaziča:

—Wejrqui anal zizuča, uj paañi ana
uj paañi, nii. Pero wejrqui zuratača.
Jaziqui cheruča. Jalla nužupan zizuča.

²⁶Wilta nižquin pecunchiča, tuž
cjican:

—¿Jaknužt paachitajo? ¿Jaknužt am
čhjujqui čhjetintajo?

²⁷Nii žoniqui tuž kjaaziča:

—Ančhucaquiz chiichinsala. Weriz
chiita ana nonz pecča. ¿Kjažtiquiztan
wilta wilta wejr chiiyay cjeejo?
¿Ančhucazakaz nižtan chica ojklayñi
cjis pecjo?

²⁸Jalla nekztanaqui nii judío
žoninacaqui nii zurquiztan čhjetinta
žoňžquiz ch'aanichiča tuž cjican:

—Amqui nii žoňž jaru ojčča.

Wejrnaczi Moisés jaru okuča.

²⁹Yoozqui Moisesquiz chiichiča. Jalla
nii zizuča. Tii žoňžquiztanaqui anal
zizuča, jakziquiztan tjončhaja, jalla
niimi.

³⁰Jalla nekztanaqui nii čhjetinta
žoniqui tuž cjichiča:

—Tiiča ispantichuca. Ančhucqui
jakziquiztan tjončhaja, nii ana
zizza. Wejtquiz pero čhjujqui
čhjetinžinchiča. ³¹Učhumqui zizla.
Yoozqui ujchiz žoninacz mayiztaqui
anaž nonznasača cjiča. Yooz
rispitñi žoninaczquizimi nižaza Yooz
kuczama kamñi žoninaczquizimi,
jalla ninaczquiz nonznasača Yoozqui
cjiča. ³²Anawira tsjii zur žoňž
čhjujqui čhjetinta quintu žejlñitala,
tuquitanpachami. ³³Nii žoniqui ana
Yooz partiquiztanžlaj niiqui, ana čjul
pajk obrami paačhani.

³⁴Jalla nekztanaqui nii judíonacaqui
tuž cjichiča:

—Amqui ujchizpan majttamtača.
¿Jaziqui wejtnacaquiz tjaajinzim pec,
kjažtatajo?

Jalla nekztan nii zurquiztan
čhjetinta žoni ajcz kjuyquiztan
chjatkatchiča.

ZURANŽ PUNTUQUIZTAN

³⁵Jalla nuž chjatkattiquiztan
Jesusaqui zizziča. Jalla nekztan nii
žonžtan wilta zalžcu, tuž cjichiča:

—¿Tsewctan cuchanžqita Yooz
Žoňžquizim criya?

³⁶Nii čhjujqui čhjetinta žoniqui tuž
kjaaziča:

—Señor, maznalla, ¿ject niiqui?
Wejrqui nižquin criyasača.

³⁷Jesusaqui nižquin kjaaziča, tuž
cjican:

—Anziqui werim cherča. Niiča
wejrtqui, amtan parliñtqui.

³⁸ Jalla nekztanaqui nii žoñiqui Jesusiž yujcquiz rispitan quillziča, tuž cjan:

—Wejt Jiliri. Amquiz criyuča.

³⁹ Jesusaqui niizquiz cjichiča:

—Wejrqui tii muntuquiz tjonchiča, žoñinaca pjalzjapa. Tsji žoñinaca žejlča ana zuma kamañchiz. Pero ninacž ujquiztan kuz zint'liča, “ujchizpanča wejrqui” cjan.

Wejrqui tjonchinča ninaca zuma kamañchiz cjiskatzjapa. Tsji žoñinaca žejlča. Jalla ninacaqui ana zuma kamañchizzakazza. Pero “Yooz puntu zuma zizuča” cjiñiča. Jalla nuž chiichyanami ninacaža zur žoñinacažtakaz. Jalla nii tjeezjapa, tii muntuquiz tjonchinča.

⁴⁰ Jesusaž nuž chijan yekjap fariseo žoñinacaqui niiz žcati želatča. Ninacaqui nii chiita nonžcu, pewcziča tuž cjan:

—¿Wejrnacmi zur žoñinacažtakaz cjesajo? Anaž cjesača.

⁴¹ Jalla nekztanaqui Jesusaqui ninacžquiz tuž cjichiča:

—Ančhucqui persun kuzquiz zur žoñižtakaz naytasaz niiqui, ančhucqui anaž ančuca ujquiztan casticta cjitasača. Pero “Wejrnacqui Yooz puntu zuma zizuča” cjanž chiila. Jalla nižtiquiztan ančuca ujquiztan casticta cjequiča.

UUZANACŽ QUINTU

10 ¹ Jesusaqui zakaz cjichiča: —Ančucaquiz weraral chiyuča. Jakziltat uuzi uyquiz ana zan kjutan luzzaja, yekja latuquiztan chjojzacuñ luzzaja, jalla niiča ana wal tjañiqui. Uuzanaca kjañzjapa luzza. ² Pero jakziltat uuzi uy zanzquiztanpan luzzaja, jalla niiča uuzi itžñi awatiriqui. ³ Nižaza uy zana cwtiñi žoñiqui uy zana cjetžiñiča nii uuz

awatiri luzjapa. Nižaza nii uuzanacaqui awatirž jora pajča. Nii awatiriqui uuz a tjuucu tjuucu kjawža, nižaza uyquiztan jwessa. ⁴ Jalla nuž tjapa niiz uuzanaca jwescu, niiz uuzanacž tucquinž ojčkča. Nižaza nii uuzanaca niiz wirquiz apža, jora pajžcu. ⁵ Tsji ana pajta žoñž wirquiziqui anaž apža, antiz nii ana pajta žoñžquiztan zajtča, niiz jora ana pajžcu.

⁶ Jalla nuž Jesusaqui quint'ichiča. Pero nonžñi žoñinacazti ana wira intintazziča, čjul puntuquiztan chiičhaja, jalla nii.

ZUMA AWATIRI

⁷ Jalla nekztanaqui Jesusaqui wilta ninacžquiz chiichiča, tuž cjan:

—Ančucaquiz weraral chiyuča. Wejrtča uuzi uy zantqui. ⁸ Ima weriž tjonan, žoñinacaqui tjonchiča, “Yoozquiztan tjonuča”, cjanacaqui. Pero tjañicamača tjapa nii tjonchi žoñinacaqui. Uuz a tjangzñinacača ninacaqui. Pero ninacž wirquiziqui wejt uuzanacaqui ana apziča.

⁹ Wejrtča uuzi uy zantqui. Jakziltat weriž cjen Yooz jamillquiz luzzaja jalla niiqui liwriitaž cjequiča. Jalla niiqui Yooz uuz a cuntaž cjequiča. Uuz a uyquiz luznaquiča, zaž ulnaquiča, zuma pastu watzjapa. Liwriitapaž cjequiča.

¹⁰ Tjañi cjićiñi žoñinacaqui tjonča, cjišni, coní, nižaza tirkati, jalla nii alaja tjonča. Wejrzi tjonchinča, zuma kamaña tjaažjapa, ančhuc ancha zuma kamañchiz cjiskatzjapa. ¹¹ Wejrtča zuma awatirtqui. Tsji zuma awatiriqui niiz uuzanacž laycu ticznasača. ¹² Pero yekjapanacaqui paca tanzjapakaz uuz a ichñiča. Jalla ninacaqui tsji uuzi tanñi animalaž tjonan uuzi eccu zatasacha. Nii uuzaquí anača persun uuzanaca. Jalla nuž uuzanaca ectan nii

anawal animala tjonchiqui uuzanacaž tančha, nižaza witčha. Anačha nižta zuma awatiriqui. ¹³Nii anawal awatiriqui paca tanzjapakaz uuzi ichñičha. Ana nii uuzanacžjapa juyzu paañičha, čhjulunacat watačhaja, jalla nii. Jalla nižtiquiztan uuzanaca eccu, anawal animalquiztan zatasachha.

¹⁴⁻¹⁵Wejrtčha zuma awatirtqui.

Jaknužt wejt Yooz Ejpqui wejtquiz pajčhaja, nižaza wejrmi wejt Ejpžquiz pajučhaja, jalla nižtačha wejrqui wejt uuzanacžquiz pajučha, nižaza wejt uuzanacaqui wejtquiz pajčha. Wejrqui wejt uuzanacž laycu ticznačha. ¹⁶Wejtta zakaz žejlčha yekja uuzanaca ana tii uyquiz cjiñiqui. Wejrqui nii uuzanaca ricujzquiztan zakaztčha. Jalla ninacaqui wejt taku cazaquičha. Tjapa wejt uuzanacaqui tsjii tamaž cjequičha, nižaza tsjii awatirchiz.

¹⁷Wejt uuzanacž laycu ticznačha, nižaza jacatatačha. Jalla nižtiquiztan Yooz Ejpqui wejr k'aachičha. ¹⁸Anaž jecmi wejr ticzkatasachha. Antiz wejrqui persun kuzquiztan ticznačha. Nižaza poderchiztčha jacatatzjapa. Jalla nii poder wejt Yooz Ejpqui wejtquiz tjaachičha.

¹⁹Jalla nuž Jesusiž chiita taku nonžcu judío žoñinacaqui wilta t'aka t'aka cjišičha. ²⁰Tsjii žoñinacaqui cjichičha: —Zajraž tantala. Lucuratala tiiqui. ¿Kjažtiquiztan tiž chiita ančhucqui nonžjo?

²¹Yekjapac cjichičha:

—Tiiqui anaž zajraž tanta žoñižta chiičha. ¿Nižaza zajraž tanta žoñiqui tsjii zur žoñi čhetnasajo? Anaž cjesačha.

TSJII ŽOÑINACAQUI JESUSA ANA NONZ PECČHA

²²Zac timputačha. Nižaza Jerusalén wajtquin timplu cumpleañ pjjizta

paatčha. ²³Jalla nii oraqui Jesusaqui timpluquin ojklayatčha, Salomón cjita kjuy patiuran. ²⁴Jalla nuž ojklayan judío žoñinacaqui Jesusiž muytata ajczičha, tuž cjican:

—¿Čhjulorcama amqui wejtnaca kuz turwayskataquejo? Amčhalaj Cristumž niiqui, tsjiika kjanacama chiizna.

²⁵Jesusaqui ninacžquiz tuž kjaazičha:

—Ančhucquiz nuž cjichinčha. Pero weriž chiitami ana criichinčhucčha. Jaknužt wejt Yooz Ejp mantačhaja, jalla nii mantita jaru zuma obranacal paa-učha. Jalla nii obranacaž cjen, ančhucqui zizasachha, werjtčha Cristo už anažlaj Cristo, nii. ²⁶Ančhuczi ana wejtquiz criinčhucčha. Ančhucqui anačha wejt uuažtakazi, jaknužt tuquiqui chiitučhaja, jalla nii. ²⁷Wejt uuzanacaqui wejt jora pajčha, nižaza wejrqui wejt uuzanaca pajučha. Nižaza nii wejt uuzanacaqui wejtquiz apžquiñipančha. ²⁸Wejrqui ninacžquiz zuma kamaña tjaa-učha, Yooztan wiñaya kamzjapa. Anapan infiernuquin okasačha. Nižaza anaž jecmi wejt kjarquiztan ninaca kjañasačha. ²⁹Wejt Yooz Ejpqui wejt kjarquiz tjaachičha. Jalla niiqui tjappachquiztanami juc'ant azzizza. Jalla nižtiquiztan anaž jecmi Yooz Ejpžquiztan wejt uuzanaca kjañasačha. ³⁰Wejttan wejt Yooz Ejpžtan tsjii kuzziztčha.

³¹Jalla nuž chiitiquiztan nii judío žoñinacaqui maztan aptižcu wilta Jesusižquiz čhajcz pecatčha. ³²Nekztan Jesusaqui ninacžquiz cjichičha:

—Wejrqui Yooz Ejpž aztan zuma obranacal ančhucquiz tjeezinčha. Nii zuma obranaca Yooz kuzcama paachinčha. ¿Jakziltat nii zuma obranacquiztan wejr maztan čhajcz pecjo?

³³Nii judío žoñinacaqui tuž kjaazičha:

—Anal am čhacača, zuma obriquiztan. Yooz quintra chiitiquiztan am čhacača. Amqui žoñimkazza. Pero Yooztakam cjiicjiicha.

³⁴ Jalla nekztanaqui Jesusaqui ninacžquiz tuž cjichiča:

—Ančhuca liiquizpacha tuž cjiirtapanča: “Yoozqui cjiicha: ‘Ančhucqui Yooztakazza.’” ³⁵ Cjiirta Yooz takuqui anaž niqui atasacha. Jalla nii zizza učhumqui. Yoozqui niž taku catokñi žoñinacž puntuiztan cjichiča, “Ančhucqui Yooztakazza”, cjicanaqui. ³⁶ Yoozqui wejr ut'aychiča tii muntuquiz cuchanžquizjapa. Jalla nižtiquiztan wejrqui cjichinča, “Wejrtča Yooz Majchtqui”. Jalla nuž chiitiquiztan, čkjažt ančhucqui Yooz quintra chiiñi cjeejo? ³⁷ Wejrqui wejt Yooz Epiž mantita obranaca ana paayin cjitasaž niiqui, wejtquiz criiz ana waquiziča. ³⁸ Pero wejt Yooz Epiž mantita obranaca paayinča. Jalla nižtiquiztan wejtquin criya. Weriz chiitiquiztan anača wejtquiz criyačhaj niiqui, weriz paata obranacquiztan mekaž wejtquiz criyalla. Wejtquin criyaquiz niiqui, ančhucqui intintazaquiča, wejtjan Yooz Ejpžtan tsjikazza, jalla nii. Wejt Yooz Ejpqui wejt kuzquiz žejlča, nižaza wejrqui wejt Yooz Ejpž kuzquiz želuča. — Jalla nuž chiichiča Jesusaqui.

³⁹ Nekztanaqui wilta Jesusa preso chjitz pecatča. Pero Jesusaqui ninacžquiztan atipassiča.

⁴⁰ Jalla nekztanaqui Jesusaqui Jordán pujž tuuna ojčkiča. Jakziquin Juanqui primero bautistčhaja, jalla nicju želatča. ⁴¹ Walja žoñinacaqui nižtan zali ojčkiča. Ninacaqui tuž cjichiča: —Chekapan, tjapa Juanž chiita tiž puntuiztan werarapanča. Ana čhjul milajru paachi cjenami, Juanqui tiž puntuiztan werarapan chiiñitakalala.

⁴² Jalla nicju želan walja neks žejlñi žoñinacaqui Jesusižquiz criichiča.

LAZARO TICZIČHA

11 ¹ Tsjii laa žoñi želatča, Lázaro cjita. Betania wajtchiz žoñitača. María, nižaza naaža cullaqui, Marta, jalla nii pucultanaqui Betania wajtchizzakaztača. ² Mariiqui nii laa Lazaruž cullaquitača. Nižaza Mariiqui Jesusa Jilirž kjojchquiz zuma ulurchiz asiiti alžinchintača. Nekztan naaža persun ach charžtan Jesusiž kjojchanaca chjujžinchintača. ³ Jalla nuž nii pucultan maatakanacaqui Jesusižquiz mazñi cuchanžquichiča, tuž cjan:

—Wejt Jiliri, amiž pecta k'aachita amigo laa cjichiča.

⁴ Jesusaqui nii mazta nonžcu, cjichiča:

—Niž laacjitiquiztan ana ticznaquiča. Antiz niž laacjitiquiztan Yooz azi tjeežtaž cjequiča. Nižaza Yoozqui honorchiz cjequiča. Nižaza Yooz Majchqui honorchiz zakaz cjequiča.

⁵ Jesusaqui Martaquiz, naaža cullaqui Mariaquiz, nižaza ninacž jila Lazaružquiz, jalla ninacžquiz ančaž k'aachichiča. ⁶ Jalla nuž cjenami Lazaruž laa quintu nonžcu, Jesusaqui iya puc majžtan kamchiča, jakziquin kamatčhaja, jalla nicju. ⁷ Jalla nii puc majquiztan niž tjaajintanacžquiz cjichiča:

—Wiltaž Judea yokquin okla.

⁸ Nekztanaqui niž tjaajintanacaqui cjichiča:

—Tjaajiñi Maestro, ažk tsjii kjaž majkaz nekzta žoñinacaqui am maztan čhajcz pecatla, conžapaqui. ¿Wilta am nicju ojcz pecya?

⁹ Jesusaqui ninacžquiz tuž kjaaziča: —Tsjii noojiqui tuncapan orchizza, majiñqui. Jakziltat kjanquiz ojččhaja,

anaž ezasača. Jalla nižta iratača wejt kjanquiz ojknī žoñinacaqui. Ima niiz ticz ora irantižcan, walikaz cjequiča. ¹⁰ Jakziltat ween zumchiquiz ojčkaja, jalla niiqui ezasača, kjanaž ana želanaqui. Jalla nižtača ana wejt kjanquiz ojknī žoñinacaqui. Ana Yooz kuzcama kamtiquiztan anawalquiz tjojtsnasača.

¹¹ Nekztanaqui Jesusaqui ninacžquiz cjichiča:

—Učhum Lázaro amiguqui tjačha. Pero wejrqui Lázaro tjažil wajtskatača.

¹² Jalla nekztanaqui niiz tjaajintanacaqui cjichiča:

—Jiliri, tjačhaj niiqui, nuž cjenauqui upallat cjissani; žetaquiz, jaz.

¹³ Niiz tjaajintanacaqui tsjii kjutni intintazziča. Jesusaqui Lázaro ticz puntuquiztan chiichiča. Niiz tjaajintanacaqui ultimu tjaž puntuquiztan intintazziča. ¹⁴ Jalla nižtiquiztan Jesusaqui kjanapacha chiichiča tuž cjican:

—Lazaruqui ticziča. ¹⁵ Ana nieju željchiž cjen wejrqui cuntintuča. Jalla nuž cjenča ančhucaltajapaqui waliqui, wejtquiz juc'anti criichi cjisjapa. Jazic nii cheriž ojkla.

¹⁶ Nekztanqui Tomasaqui, niiz mazinacžquiz cjichiča:

—Učhumnac zakaz ojkla, tiiztan chica ticžni.

Tomasaqui “Pacha” cjita žoñizakaztača.

JESUSAČHA JACATATSKATŇIQUI

¹⁷ Betania watja irantižcu, Jesusaqui zizziča, Lazaruž ticžtaqui nižaza tjattaqui pajkpic tjuñitača. ¹⁸ Betania watjaqui Jerusalén wajtquiztan pizc kilómetro jilallatača. ¹⁹ Jalla nii žcati želan walja žoñinacaqui Martaquiz nižaza Mariyaquiz kuzni tjonzitača, ninacž jila ticziž cjen. ²⁰ Martiqui

Jesusaž waj irantižquiñi quintu nonžcu, Jesusižquin zali ojkcchinča. Mariiqui kjuyquin eclichintača. ²¹ Jesusižtan zalžcu, Martiqui paljaychinča, tuž cjican:

—Wejt Jiliri, am tekz žejltasaž niiqui, wejt jilaqui ana ticzi cjitasacha. ²² Jalla nuž cjenami wejrqui zizuča, čhulu amiž Yoozquiztan mayiztami tjaataž cjequiča. —Jalla nuž Jesusižquiz chiichinča Martiqui.

²³ Jesusaqui naaquiz cjichiča:

—Am jilaqui jacatataquiča.

²⁴ Martiqui cjichinča:

—Wejrqui zizuča, tii muntu tucuzinžtan, jacatatz tjuñquiziqui jacatataquiča.

²⁵ Nekztan Jesusaqui naaquiz cjichiča:

—Wejrtča jacatatskatintqui, nižaza arajpach žeti tjayintqui. Jakziltat wejtquiz criyačhaja, ticzi cjenami, wila žetaquiča. ²⁶ Nižaza jakzila žejtni žoñimi wejtquiz criyačhaja, jalla niiqui anaž wira ultimu ticznasača. Arajpachquin wiñaya žetaquiča. ¿Jalla nii crii amya?

²⁷ Naaqui tuž kjaazinča:

—Criyuča, wejt Jiliri. Nižaza criyuča, amqui Cristumča; nižaza Yooz Maatimča tii muntuquiz tjonchiqui. Jalla niiqui criyuča.

MARIAQUI JESUSIŽTAN ZALI ULANCHINČHA

²⁸ Jalla nuž chiizcu, Martiqui naaža Marii cullaqui kjawžni ojkcchinča. Nekztan Mariaquiz jamazit chiichinča, tuž cjican:

—Tjaajiñi Maestruqui tekz tjonchiča. Am kjawža cjiča.

²⁹ Jalla nuž nonžcu Mariiqui apura žaazinča. Jesusižquin zali ojkcchinča.

³⁰ Jesusaqui imaž watja irantižcatča, jakziquin Marti niiztan zalčhaja, jalla

niiranž želatča. ³¹Lázaro jilaž ticziž cjen, Mariaquiz kuzcan žoñinaca kjuyquin želatča. Jalla ninacaqui María apura žaažcu ulanñi cheržcu wirquizpacha apziča. Ninacaqui cjichiča, “Lázaro jilž sipulturni kayit ojčkani” cjan.

³²Jesusižtan zalžcu Mariiqui niiz yujquiz quillzinča, tuž cjan:

—Wejt Jiliri, tekzim cjitčhaj amqui, wejt jilaqui anaž ticzi cjitasača.

³³Jesusaqui naa María kaañi cheržcu, nižaza naatan tjonñi judío žoñinaca kaañi zakaž cheržcu, persun kuzquiz ancha sint'ichiča, nižaza ancha llaquita cjissiča. ³⁴Jalla nekztan pewcziča, tuž cjan:

—¿Jakziquin tjatchinčhuctaya?

Ninacaqui cjichiča:

—Jiliri, niiz cheržinžcalla.

³⁵Nekztanaqui Jesusaqui kaachiča.

³⁶Jalla nuž cheržcu žoñinacaqui cjichiča:

—Cherzna. Lázaro jila anchaž k'aachichiča.

³⁷Yekjapa ninacazti cjichiča:

—Tiiqui zur žoñž čhujqui čhjetinčiča. ¿Anaj tiic Lázaro jila čhjetnasaya, ana ticzi cjisjapaya?

LAZARO JACATATSKATTA

³⁸Jalla nekztanaqui Jesusaqui ancha kuzquiz sint'ican, sipulturni macjatchiča. Sipulturaqui pajk mazquiz pjetatača. Nižaza pajk maztan pjucžtatača, nii sipulturni zana.

³⁹Jesusaqui nekztan cjichiča:

—Nii maz cjewžna.

Martiqui, nii ticzi jilž cullaquiqui, cjichinča:

—Wejt Jiliri, pajkpic tjuñi tiiz ticžtaqui. Jalla nižtiquiztan tiiqui čhjonanchižlani.

⁴⁰Nekztanaqui Jesusaqui naaquiz cjichiča:

—Amqui wejtquiz criyaquiz niiqui, Yooz azi tježtam cheraquiča. ¿Anaj werj nuž amquiz chiichinpanejo?

⁴¹Jalla nekztanaqui nii sipultura mazqui cjewžtatača. Nekztanaqui Jesusaqui arajpach kjutni cheržcu, tuž cjichiča:

—Yooz Ejp, weriž mayizta nonžniž cjen gracias amquin cjiwča. ⁴²Weriž mayiztaqui nonžñampanča amqui. Jalla nii zizuča. Tekz tsijtchi žoñinacžtajapa nuž chiyuča, amča wejr cuchanžquichi, jalla nii criyajo.

⁴³Jalla nuž mayizizcu, Jesusaqui alto tawkžtan mantichiča tuž cjan:

—Lázaro, nekztan ulanžca, ticchuc tjona.

⁴⁴Nii ticziqui ulanžquichiča, kjarami kjojchami jweržintapacha, nižaza niiz yujcni tsjii pañžtan ch'okžinta. Nekztanaqui Jesusaqui nekz žejlñi žoñinacžquiz mantichiča:

—Nii jweržina. Nekztan ojklajaj cjee.

JESUSA CONZJAPA KAZZIČHA

⁴⁵Jalla nižtiquiztan muzpa judío žoñinacaqui Jesusižquin criichiča. Ninacaqui Mariaquiz cumpantižcu Jesusiž paata milajru cherchiča. ⁴⁶Yekjap nekz žejlñi žoñinacazti fariseo žoñinacžquin mazni ojčkichiča. Nicju tjapa Jesusiž paatanaca quint'ižquichiča. ⁴⁷Jalla nuž nonžcu fariseo partir žoñinacami timplu jilirinacami tjapa jilirinaca ajkskatchiča. Nekztan jilirinacžquiz pewcziča, tuž cjan:

—Nii žoñiqui anchaž milajrunaca paača. ¿Učhumnacqui kjaža cjeequi nii žoñžtan? ⁴⁸Jalla nužkaž milajrunaca tira paañižlaj niiqui, tjapa žoñinacaqui niizquincama criyačani. Jalla nuž cjenauqui roman jilirinacaqui zultatunaca cuchanžcačani, učhum timplu pajlžjapani, nižaza učhum naciona akžjapani.

⁴⁹Nii wataqui Caifás cjitaqui uchtatacha timplu chawc jiliri. Jalla niiqui paljaychiha, tuž cjican:

—Ančhucqui ana zizñi žoñinacažtakaz, čkjažtatajo?
⁵⁰Učhum wajtchiz žoñinacžtajapa nii Jesusac ticstanča, tjapa učhumnaca ticz cjenquiztanpacha. Jalla nuž waquiziča. Tjapa tii naciona akžinasaz niiqui, jalla niž ana wali cjesača. Nuž ana waquiziča.

⁵¹Nii timplu chawc jiliri qui anača persun kuzquiztan chiichiqui. Timplu chawc jiliriž cjen, Yooza nuž chiikatchi. Jalla nuž chiican, Jesusiž puntu mazinchiča, Jesusaqui nii wajtchiz žoñinacžtajapa ticznaquiča. ⁵²Anazaž nii wajtchiz žoñinacžtajapakaz ticznaquiča. Tjapa žoñinacžtajapa ticznaquiča. Yooz partiquiz kamñi žoñinacaqui tjapa kjutñi tii muntuquiz wichanžiča. Jalla ninacaqui Jesusaqui tjapa nacionquiztan ricujaquiča. Tsjii Yooz jamillajapa ricujaquiča. ⁵³Jalla nuž palt'izcu nii noojtanpacha judío jilirinacaqui Jesusa conzjapa kazziča.

⁵⁴Jalla nižtiquiztan Jesusaqui chjojzacuñ ana kjanacama ojklaychiča Judea cjita yokquiz. Jerusalén žcati yokquiztan ojkičiča Efraín wajtquin. Efraín watjaqui ch'ekti yok žcatitača. Jalla nicju niž tjaajintanacžtan kamčiča.

⁵⁵Judío žoñinacž pascua pijjzta wajillatača. Jalla nižtiquiztan walja žoñinacaqui jochinacquiztanami zkolta watjanacquiztanami Jerusalén watja ojkičiča ima pascua pijjzta tjonan. Ajunz cuzturumpi payi ojkičiča. Ana nii cuzturumpi paaquiz niiqui, ana pascua pijjzta paasača. ⁵⁶Nii tjonchi žoñinacaqui Jesusa kjuratča. Timpluquin tsijtchi žejlcan ninacpora Jesusiž puntu pewcsassiča, tuž cjican:

—čAm jaknužum tantii? čTii pijjztiquiz Jesusac tjonasaya?

⁵⁷Nižaza fariseo partir žoñinacami timplu jilirinacami ordena tjaachiča, jequit Jesusa cheračhaja, jalla niiqui ninacžquiz maztanča, Jesusa preso tanta cjisjapa.

ASIITI TJAJLŽINTA QUINTU

12 ¹Pascua pijjzta wajilla sojta tjuñiž cjen Jesusaqui Betania watja ojkičiča, Lazaruž kjuya. Niž tuquiqui Jesusaqui ticziquiztan nii Lázaro jila jacatatskatchitača. ²Jalla nicju Jesusižquiz rispitan zuma čhjeri tjaczinčiča. Martiqui čhjeri atintichinča. Lazaruzti mizquiz želatča, Jesusižtan chica lujlcan nii parti žoñinacžtanpacha. ³Jalla nuž lulan Mariiqui medio litro zuma ulurchiz asiiti zjijcchinča. Nii asiitiqui zuma legal nardo cjita asiititača, wali preciuchiztača. Jalla nii asiitižtan Jesusiž kjojchquiz alžcu tjajlžinchinča. Nekztan naaža persun ach charžtan chjujžinchinča. Walja zuma ulurchiztača. Tjapa nii kjuyquiziqui nii zuma ulura chjijsitača. ⁴Jalla nuž asiiti alžinñi cheržcu, Judas Iscariote cjita Simonž majchqui chutchiča. Jalla niiqui Jesusiž tjaajinta žoñinacž partiquiztantača. Nižaza niipacha niž wiruñ Jesusiž quintr tarasunaž paaquiča. Jalla nii Judasqui naa Mariaquiz paljaychiča, tuž cjican:

⁵—čKjažtiquiztan tii aceite ana 300 paazuñ tuytata, pori žoñinacžquiz yanapzjapajo?

⁶Judaszi anaž porinaca importayatča. Tjañi zaañitača. Niiž kjarquiztača paaz pulsaqui. Nižaza nii utža paaznacquiztan tjangñitača. Jalla nižtiquiztan nuž chiichiča.

⁷Jalla nekztanaqui Jesusaqui Judasquiz cjichiča:

—Ana naaquiz nuž cjee. Ima wejt ticz tjuñi tjonan, naaquí wejtajapa tii aceite čhojchinča, wejr zuma tjatta cjisjapa. ⁸Tii muntuquíz porisanacac panž žejlča. Wejrzi ančucatan ana tira želača, tii muntuquíz.

LAZARUZAKAZ CONZ PECČHA

⁹Walja judío žoñinacaquí Jesusiž quintu zizziča, Betania wajtquin žejlči, jalla nii. Jalla nekztan nicju ojkičiča, Jesusa cherzči, nižaza Lázaro cherzči. Jesusaquí Lázaro ticziquiztan jacatatskatchičha. ¹⁰Jalla nuž Lázaro jacatatskatta quintu nonžcu timplu jilirinacaquí Lazaruzakaz conz kazziča. ¹¹Jalla nii Lazaruž jacatattaž cjen, walja judío žoñinacaquí nii jilirinacž čhiitanaca ana cazziča. Nekztan zarakžcu, Jesusižquíz apoychiča. Nižaza nižquin criichiča.

JERUSALEN WAJTQUIN LUZTA QUINTU

¹²Walja žoñinacaquí Jerusalén watja tjonžcu, nekz želatča pascua pijjzta paazjapa. Jakatažuquí žoñinacaquí zizziča, Jesusaquí wajtquin wajillaž irantižquičha, jalla nii. ¹³Jalla nekztan chjañinacžtanpacha ramuza cjita munti itsa kjajpchiča. Jalla nuž nii ramuz itsanac manžcu, wajtž tjiya Jesusa risiwi ulanchičha, tuž kjawcan:

—iYoozqui honorchiz cjila! iYooz Jilirž tjuuquíz tjonči žoñi rispittaj cjila! iIsrael chawjc jiliri rispittaj cjila!

¹⁴Jesusaquí tsjii aznu cunsicžcu, yawchiča, jaknužt Yooz tawkw liwruquíz cjiřtčhaja, jalla nuž.

¹⁵Cjiřta Yooz takuquí tuž cjiča:

—Sión wajtchiz žoñinaca, anaž eksna. Cherzna. Aznuquíz yawchi am chawjc jiliriž tjonča.

¹⁶Jalla nuž watan nii ora niž tjaajintanacaquí anaž intintazatča,

kjažtiquiztan nižta wat, jalla nii. Jesusa arajpacha ojktan, jalla nekztan ninacaquí intintazzi cjissiča. Jalla nii ora cjuñziča, tuquitan cjiřta Yooz takuquí tjapa nii watchinaca mazinchiča, nii. Nii cjiřtanac jaru, nužcama watchičha.

¹⁷Niž tuquiqui Jesusaquí Lázaro ticziquiztan jacatatskatchičha.

Nekztan kjawžcu sipulturquiztan ulanskatžquichiča. Jalla nii cherči žoñinacaquí parti žoñinacžquíz walja parličičha tjapa nii milajru paatiquiztan.

¹⁸Jalla nižtiquiztan Jesusaž paata milajru zizcu, walja žoñinacaquí Jesusižquin zali ojkičiča. ¹⁹Jalla nuž cheržcu fariseo žoñinacaquí ninacpora tuž cjichiča:

—Wejrnacqui jazicž cheručha. Tjapa žoñinacaquí nižquin ojczpanž cjiskalala. Nižaza wejrnacqui anaž čhjulumi kjaž cjiyi atchuca cjesaž, jaz.

GRIEGO WAJTCHIZ ŽOÑINACA

²⁰Nii pijjzta ojkiči žoñinacžporquíz tsjii kjaž griego wajtchiz žoñinaca želatča. Ninacaquí Jerusalén watja ojkičizakazza, Yooz rispiti.

²¹Ninacaquí Felipižquin tjonchiča.

Felipiqui Betsaida wajtchiztača, nižaza Galilea yokchiztača.

Felipižquíz rocchiča tuž cjian:

—Señor, wejrnacqui Jesusižtan zalz pecučha.

²²Nekztanaquí Felipiqui Andrežquíz mazči ojkičiča. Nekztanaquí pucultanaquí Jesusižquíz mazči ojkičiča. ²³Jalla nuž maztiquiztan Jesusaquí cjichiča:

—Wejrqui tsewctan cuchanžquita Yooz žoñtča. Jaziqui wejt ticz ora wajiča. Jalla nekztanaquí wejrqui honorchiz cjeeča. ²⁴Ančhucaquíz weraral chiyučha. Tsjii čhjecta trigo

semillaqui yokquiz tjatža, katča. Jalla niža čhjacta cjen, ew zkala jecža, nižaza pookča. Ana niža čhjacta cjequiči niqui, nužquikaz žejlča semillaqui. ²⁵Jalla niža iratača tii chiitaqui. Jakziltat persun kuzcamakaz kamz pecčhaja, jalla niqui ultim zuma kamaña pertaquiča. Pero jakziltat tii muntuquiz žejlcan persun kuzcama ana kamz pecčhaja, nižaza Yooz kuzcama kamz pecčhaja, jalla niqui wiñayjapa zuma kamañchiz cjequiča. ²⁶Jakziltat wejtquiz sirwačhaja, jalla niqui wejttan chica ojklaysa čjul sufriquiztanami. Nekztan jakziquin wejr želačhaja, jalla nicju wejttan chica wejt sirwiñinaca zakaz cjequiča. Nižaza jakziltat wejtquiz sirwačhaja, jalla nižquiz wejt Yooz Ejpqui honoraž tjaaquiča.

JESUSIŽ TICZ MAZINTA

²⁷Anziqui wejt kuzqui ancha turwaysiča. ¿Kjaž cjisnaqui? Yooz Ejp, tii sufrisquiztanž liwriyalla. ¿Nuž cjis wali cjesaya? Anača. Wejrqui tii muntuquiz tjonchinpanča, sufrisjapaqui. ²⁸Yooz Ejp, am munañpaj cjila; ampacha rispittaj cjila. —Nuž cjichiča Jesusaqui. Jalla nii orapacha arajpachquiztan tsjii joraqui paljayžquichiča, tuž cjican:

—Wejrqui rispittiča, nižaza rispittapan cjeeča, amiž cjen.

²⁹Nekz žejlči žoñinacaqui jalla nii chiiñi jora nonžcu, cjichiča:

—Tsji jorjorñi želatča —nuž cjichiča.

Yekjapanacaqui tuž cjichiča:

—Tsji anjilaž paljayžquichila.

³⁰Jalla nekztanaqui Jesusaqui cjichiča:

—Anaž wejtajapa nii jora chiižquichiča, antiz ančhucaltajapača. ³¹Weriž ticztaž

cjen tii muntuquiz žejlči žoñinacaqui pjalžtaž cjequiča. Nižaza tii muntuquiz mantiñi diabluqui atiptaž cjequiča, chjatkattaž cjequiča. ³²Yooz Žoñtča wejrqui. Jaziqui tii yokquiztan cruzquiz waytital cjeeča. Nekztan tjapa wejt partir žoñinacžquiz wejtquin macjatskatača, wejtquin criizjapa.

³³Jalla nuž chiican Jesusaqui jaknuž ticznačhaja, jalla nii chiichiča.

³⁴Nekz žejlči žoñinacaqui tuž cjichiča:

—Učhumnacqui učhum liiquiztan zizziča, Cristuqui wiñaya žetaquiča. ¿Kjaž amqui chiyasajo, Yooz Žoñi cruzquiz waytita cjequiča, cjicanajo? ¿Ject tii Yooz Žoñejo?

³⁵Jalla nekztanaqui Jesusaqui cjichiča:

—Wejrqui tsjii upacamakal ančhucatan želača Yooz kamaña tjeežcan, tsjii kjanažtakaz. Jalla nuž wejt kjana želan, ančhucqui zuma kamañchiz kama. Zumchi cjis wajillača. Nii zumchi cjen, ana tsucaquiča. Jakziltat anawal zumchiquiz kamčhaja, jalla niqui jakzitchuc ojčkchaja, jalla nii ana zizza. ³⁶Jaziqui tsjii kjanažtakaz weriž želan, wejtquiz criya, zuma Yooz kamaña tjeežñinaca cjisjapa.

Jalla nuž chiižcu Jesusaqui ojčkchicha. Nekztan ninacžquiztan čhjojziča.

ISAIAS CJIJRTA TAKU CUMPLISSICHA

³⁷Ninacaž cheran walja milajrunaca paachiča Jesusaqui. Jalla nuž paachiž cjenami parti žoñinacaqui ana nižquin criichiča. ³⁸Jalla nuž ana criitquiztan Isaías cjita profetž takunaca cumplissiča. Isaías cjita Yooz cuntiquiztan chiiñi profetaqui tuž cjichiča:

“Yooz Jiliri, ¿ject wejtnacaž chiita taku criijo? Nižaza am azi tjeeznan, žoñinacaqui anapaž intintazza”.

³⁹ ¿Kjažt žoñinacaqui criyasajo? Isaiasqui tuž cjichiča:

⁴⁰ “Yoozqui tii žoñinaca zur žoñžtakaz cjiskatchičha, ana cherni žoñinacažtakaz cjejajo. Nižaza chojru kuzziz cjiskatchičha, ana intintazni kuzziz cjejajo. Jalla nuž cjen ana wejtuin macjatžcaquiča, liwriita cjejajo”.

Nuž cjiyrchiča Isaiasqui, ⁴¹ tuquitan Jesusaž tjeeža honora puntu zizcu.

⁴² Jila parti ana criichiž cjenami, muzpa žoñinacaqui Jesusižquiz criichiča, nižaza jilirinacami. Pero fariseo žoñinaca ekskui ana kjanacama cjiicjiichiča. Jamazit criichiča, ana ajcz kjuyquiztan chjatkatta cjejajo. ⁴³ Žoñinacaž rispitta cjis pecatča, Yoozquiztan cjen juc'anti. Jalla nižtiquiztan jamazit criichiča Jesusižquiz.

JESUSIŽ CHIITA TAKU

⁴⁴ Jalla nektanaqui Jesusaqui altu joržtan chiichiča tuž cjican:

—Jakziltat wejtquiz criiĉhaja, jalla niiqui wejr cuchanžquinižquiz nužuzakaz criiĉha. ⁴⁵ Nižaza jakziltat wejr cherĉhaja, jalla niiqui wejr cuchanžquinižquiz nužuzakaz cherĉha. ⁴⁶ Wejrqui tii muntuquiz tjonchinĉha, Yooz kamaña tjeezjapa, tsjii kjanažtakaz. Jakziltat wejtquiz criiĉhaja, jalla niiqui anawal zumchiquiz ana tira kamaquiĉha. ⁴⁷ Jakziltat weriž chiita nonžcu ana catokaĉhaja, jalla niiz quintra tii ora anal chiyuĉha. Wejrqui žoñinacž quintra chiizjapa ana tjonchinĉha. Antiz žoñinaca liwriizjapa tjonchinĉha.

⁴⁸ Jakziltat wejtquiz ana criiĉhaja, nižaza werj ana cherz pecĉhaja, nižaza weriž chiita taku ana catokĉhaja, jalla niiĉha persun quintra cjiicjiiniĉqui. Pjalz tjuñquiziqui weriž chiita taku ana catoktiquiztan jalla nižtiquiztan Yooz Ejpqui ultimquiz ninaca casticaquiĉha. ⁴⁹ Wejrqui anal persun kuzquiztan chiiĉha. Antiz wejr cuchanžquini Yooz Ejpž mantita jaru chiiĉha, nižaza niiz mantitacama tjaajniĉha. ⁵⁰ Wejt Yooz Epiž mantitacama kamzqui arajpachquin Yooztan wiñaya kamzjapapanĉha. Jaziqui weriž chiitaqui Yooz Epiž mantitacama chiichinĉha.

JESUSAQUI PIYUNAŽTAKAZ KJOJCHANACA AWJZIĉHA

13 ¹ Ima pascua pijjta tjonan, Jesusaqui zizziĉha niiz ticz ora wajitaĉha, jalla nii. Nižaza zizziĉha, tii muntu eccu niiz Ejpžquinž okaquiĉha, nii. Tii muntuquiz žejlcan Jesusaqui niiz pecta mazinaca walja k'aachichiĉha, ultim werarapan. Ticzcama k'aachichiĉha.

² Pascua pijjta paacan, Jesusaqui niiz tjaajintanacžtan ĉhjeri lujlĉhiĉha. Judas Iscariote cjita Simonž majch chicapacha nekc želatĉha. Judas kuzqui diabluz mantuquiz cjiskatchiĉha. Diabluz mantitaž cjen Judasqui tarzuna paaz pinsichiĉha, Jesusa tankatzjapa. ³ Jesusaqui zizziĉha, Yooz Ejpqui tjapa mantiznaca niiz kjarquiz tjaachiĉha. Nižaza niiqui Yooz Ejpžquiztan tjonchiĉha, nižaza Yooz Ejpžquin quepaquiĉha. Jalla nii zizziĉha Jesusaqui. ⁴ Jalla nuž zizziž cjenami, piyunažtakaz cjissiĉha. Misquiztan tsijtsu, niiz juntuiĉta zquiti chjojksiĉha. Nektanaqui toalla aptižcu, nižtan tsjaasiĉha. ⁵ Jalla nektanaqui tsjii purinquiz kjaz alžcu,

niiž tjaajintanacž kjojcha awjžiñi kallantichiča. Nekztan nii tsjaazta toallžtan kjojchanaca chjujžinchicha.

⁶Nižaza Jesusaqui Simón Pedro cjita žoñžquiz niiž kjojcha awjžiñi macjatchiča. Nekztan Pedruqui Jesusižquiz cjichiča:

—Wejt Jiliri, čamqui wejt kjojcha awjžinz pecya? Ana wejt kjojcha awjžinz waquiziča.

⁷Jalla nuž chiitiquiztan Jesusaqui tuž kjaaziča:

—Tii weriž paataqui amqui ana intintazza anziqiu. Tii jarquinam intintazaquiča.

⁸Pero Pedruqui cjichiča:

—Wejt Jiliri, amqui wejt kjojcha anapanim awjžinasacha.

Jesaqui niižquiz kjaaziča, tuž cjican:

—Wejrqui am kjojcha anal awjžinaž niiqui, anam wejt partiquiz cjesača.

⁹Jalla nekztanaqui Simón Pedro cjitaqui tuž cjichiča:

—Wejt Jiliri, ana wejt kjojcha alajakaz awjnasacha, wejt kjarami achami awjžinalla.

¹⁰Jesaqui niižquiz tuž cjichiča:

—Tsjii ajunta žoñiqui anaž wilta wilta ajunz pecča, antiz kjojchakaz ajunz pecča. Nekztan limpuž niiqui tjappacha. Ančhucqui limpuča, pero tsjiiqui ana limpuča ančhucqui.

¹¹Jesaqui zizziča, jakziltat tarsuna paazcu nii tankatačhaja, nii. Jalla nižtiquiztan nuž chiichiča Jesaqui, “Tsjiiqui ana limpuča ančhucqui” cjicanaqui.

¹²Nekztan Jesaqui ninacž kjojchanaca awjawjžinžcu, niiž juntuiŋta chjojka zquiti aptichiča. Zquiti cujžcu wilta misquiz julžiča. Nekztan ninacžquiz cjichiča:

—¿Tii weriž paata ančhucqui intintaziñchuckaya? ¹³Ančhucqui

wejr “Tjaajiñi Maestruž” cjiča, nižaza “Jiliriž” cjiča. Jalla nužupanča wejrqui. Jalla nižtiquiztan nužpan chiiz waquiziča. ¹⁴Wejrtča werera ančuca Jiliritqui nižaza Tjaajiñi Maestruqui. Jaziqui wejrqui ančuca kjojcha ajunžinchinča. Jalla niža irata ančhucmi piyunanacažtakaz, porapat yanaparassa, niža kjojchanaca ajunz tjepi. ¹⁵Jazic niža paachinča, ančhuc nižtapacha paajo. ¹⁶Ančucaquiz ultim weraral chiyuča. Tsjii piyunaqui niiž jiliržquiztan anača juc'anti Nižaza tsjii cuchanžquitaqui niiž cuchanžquinižquiztan anača juc'anti. ¹⁷Ančhucqui tii puntu intintazzaj niiqui, jalla nii jaru kamz waquiziča. Nekztan cuntintuž cjequiča ančhucqui.

¹⁸Wejrqui weriž illztanaca pajuča. Nižaza tsjižuŋ pajuča. Niiž puntuiztan cjiirta Yooz takuqui tuž cjiča: “Tsjii wejttaŋ chica lujlñiqui wejt quintraz cjisnaquiča”. Jalla nii cjiirta Yooz takuqui cumplisnaquiča. Tjapa ančuca puntuiztan anal chiyuča. ¹⁹Pero anziqiu ima tankatan ančucaquiz chiyuča jaknuž wejr tanta cječhaja, nii puntu kjanzt'uča. Jalla nižtiquiztan wejr tantanaqui, ančhucqui wejtquiz cryaquiča, wejrtča Yoozquiztan cuchanžquitaqui, jalla nii. ²⁰Ančucaquiz weraral chiyuča. Jakziltat weriž cuchanžquita žoñinaca risiwčhaja, jalla niiqui wejr zakaz risiwčhaja. Nižaza jakziltat wejr risiwčhaja, jalla niiqui wejr cuchanžquinižquiz risiwtazakaz cjequiča.

JESUSAQUI TARAZUNTAŽ CJEQUIČA

²¹Jalla nuž chižcu Jesaqui persun kuzquiz ancha llaquita sint'ichiča. Jalla nekztan tuž kjanapacha cjichiča:

—Anchucaquiz weraral chiyuča. Tsjii anchucaquiztan wejr tankataquiča.

²² Jalla nuž chiitiquiztan niž tjaajintanacaqui porapat chersassiča, kuzquiz pinsican, “¿Jakziltizjapa chiičhaja?” jalla nii. ²³ Tsjii ancha k'aayi tjaajinta žoñi Jesusiž latuquiz žcati julzi želatča. ²⁴ Jalla nekztan Simón Pedruqui nii žcati ježlñižquiz kjaržtan paljaychiča. “¿Jecžquiztanpan chii? Maznalla”, cjicanaui. ²⁵ Jalla nižtiquiztan nii žcati ježlñi žoñiqui Jesusižquiz pewcziča tuž cjican:

—Wejt Jiliri, ¿ject am tankatñi žoñiqui?

²⁶ Jesusaqui tuž kjaaziča:

—Jecžquizkat wejrqui čher mazquiquiz t'awčcu tii t'anta tjaachaja, jalla niž cjequiča niiqui.

Jalla nekztanaui nii t'anta t'awčcu, Judas Iscariotiquiz tjaachiča. Niiqui Simonž majchtača. ²⁷ Jalla nii t'awžta t'anta tanžtanaui, Satanás cjita diabluqui Judas kuzquiz luzziča. Nekztanaui Jesusaqui Judasquiz paljaychiča, tuž cjican:

—Čjulum paačhaja, apura paa.

²⁸ Nii parti mizquiz julzi žoñinacaui ana intintichiča, nii Jesusiž chiita.

²⁹ Yekjapanacaui tantiyatča, jalla tuž: Judas paaz pulsa tanzñiž cjen, Jesusaqui nižquiz mantichižlani pjijzta paazjapa čjulunaca kjayžjapani. Yekjapanacazti zakaz tantiyatča, jalla tuž: Judas paaz pulsa tanzñiž cjen, Jesusaqui mantichižlani, pori žoñinacžquiz paaz onanzjapani.

³⁰ Judasqui nii t'anta tanžcu nii orapacha ulanchiča. Nii oraqui weentača.

EW MANTITAQUI

³¹ Jalla nuž Judas ulantanaui, Jesusaqui cjichiča:

—Wejrtča Yooz cuchanžquita Žoñtqui. Jaziqui wejrqui wejt Yooz tjaata kamaña tjeeznuča, honorchiz cjsjapa. Nižaza weriž cjen Yooz Ejpqui honorchiz cjequiča. ³² Jalla nižtiquiztan Yooz Ejpqui wejtquiz zakaz honorchiz cjiskataquiča. Jalla niiqui wajillaž wataquiča. ³³ Weriž pecta jilanaca, tsjii upacamakaz anchucatan želača. Nekztan anchucqui wejr kjurauiča. Pero jaknužt tuquiqui žoñinacžquiz chiitučhaja, jalla nižtapachal anziui anchucaquiz tuž chiyuča: Jakziquint wejr okačhaja, jalla nicju anchucqui ana oki atasacha. ³⁴ Wejrqui tsjii ew mantita ortina anchucaquiz tjaa-uča: “Porapat zuma munazizpanča, jalla nii. Jaknužt wejrqui anchucatan zuma munazituchaja, jalla niža anchucqui porapat zuma munazauiča”. ³⁵ Anchucaž nii ortina mantita jaruž kaman, tjapa žoñinacaui zizauiča, anchuča weriž tjaajinta žoñinacapan.

PEDRUQUI K'OTAQUIČA

³⁶ Jalla nekztanaui Simón Pedruqui nižquiz cjichiča:

—Wejt Jiliri, ¿am jakzim okauiya?

Jesusaqui nižquiz kjaaziča, tuž cjican:

—Jakziquint wejr okačhaja, jalla nicju anaž apžñi atasacha anziui. Tii jarquinaui amqui wejtquin tjonauiča.

³⁷ Pedruqui cjichizakazza:

—Wejt Jiliri, ¿kjažtiquiztan anziui ana am apžñi atasajo? Anzimi amquiztanami weril ticznasača.

³⁸ Jesusaqui tuž kjaaziča:

—¿Wejtquiztan ticznasaya? Ultim weraral amquiz cjiwča: Ima quer wallpaž kjawan, amqui čhjep wilta wejr ana pajñim toscara chiyauiča.

ARAJPACHA OJKZ PUNTU

14

¹ Wejt tjaajinta žoñinaca, Yooz Ejpžquin criyiñčucča nižaza

wejtquiz zakaz criya. Ana turwayzi kuzziz cjee. ²Wejt Ejpž arajpach kjuyquin wacchi campu žejlčha, kamzjapa. Ana nižta žejltasaž niiqui wejrqui ančhucaquiz maztasačha. Jaziqui wejrqui okačha ančhucaltajapa campu tjaczquizjapa. ³Jalla nuž campu tjaczni ojkcucu, wiltal quejpžcačha ančhuc chjichi, wejttan kamzjapa. Jakziquint wejr želačhaja, jalla nicju ančhuc zakaz želaquičha, weriž chjichtaž cjen. ⁴Ančhucqui jakziquint wejr okačhaja, niiqui zizza. Nižaza wejt ojkc jicz zizza.

⁵Nekztanaqui Tomasqui cjichičha:

—Wejt Jiliri, jakziquinam am okačhaja, anal zizučha wejrnacqui. ¿Kjažt am ojkc jicz zizasaya?

⁶Jesusaqui nižquiz tuž kjaazičha:

—Wejrtčha jicz cuntitqui, arajpachquin irantizjapaqui. Nižaza wejrtčha werarapankaztqui. Weriž cjen werar Yooz kamaña zizasachha. Nižaza wejrtčha žeti tjaayinťtqui, Yooztan winaya kamzjapa. Weriž cjenpankaz Yooz Ejpžquin iranti atasachha.

⁷Ančhucqui wejr ultimu pajtasaz niiqui, ančhucqui wejt Yooz Ejp zakaz pajtasachha. Jaztanpacha weriž cjen ančhucqui wejt Yooz Ejp pajčha, nižaza weriž cjen ančhucqui Yooz Ejp cherčha.

⁸Nekztanaqui Felipiqui cjichičha:

—Wejt Jiliri, Yooz Ejp cherkatalla, nužquiz niimi bastakal cjeečha.

⁹Jesusaqui tuž kjaazičha:

—Felipe, ančhucatan ažkpacha žejlchinzala. ¿Anapanim wejr pajjo? Jakziltat wejr cherčhaja, nižaza Yooz Ejp cherčha. ¿Kjažt am nuž cjeejo, “Yooz Ejp cherkata”, cjanajajo? ¹⁰Wejrmi Yooz Ejpmi tsjii kuzzizza. ¿Jalla nii anam cni amya? Weriž ančhucaquiz chiitaqui anaž persun kuzquiztan chiyučha, antiz Yooz Ejpž cuntiquiztan chiyučha. Yooz

Ejpqui wejt kuzquiz žejlčha. Jalla nižtiquiztan niž cjen obranacal paa-učha. ¹¹Wejrmi Yooz Ejpmi tsjii kuzzizza. Jalla nii criyaquičha, jaziqui. Weriž chiitiquiztan ana criyasaž niiqui, weriž paata obranaca cherčcu mekaz criyalla. ¹²Werarapan ančhucaquiz chiyučha. Jakziltat wejtquiz criican tjapa kuzziz cječhaja, jalla niiqui weriž paata obranaca irataž zakaz paaquičha, nižaza weriž paata obranacquitzan juc'ant pajk obranaca paaquičha, weriž Yooz Ejpžquin ojktiquiztan. ¹³Wejtquiz tjapa kuzziz cjen, ančhucqui čjul mayiztami Yooz Ejpžquiztan mayačhaj niiqui, jalla nii mayiztiquiztan wejrkal čjulumi tjaa-ačha. Jalla nuž tjaa-ačha, weriž cjen Yooz Ejp juc'ant honorchiz cjisjapa. Werjtčha Yooz Majchqui. ¹⁴Ančhucqui wejtquiz tjapa kuzziz cjen čjul mayiztami mayačhaja, jalla nii mayiztiquiztan wejr tjaa-ačha.

ESPIRITU SANTUŽ PUNTU

¹⁵Ančhucqui wejttan tjapa kuztan munazaquž niiqui, weriž tjaata ortinanaca cazaquičha. ¹⁶Wejrqui Yoozquiztan mayačha, tsjii tjurt'ižini cuchanžquizjapa. Nii tjurt'ižiniqu ančhuca kuzquiz wiñayaž kamaquičha. Yooz Espíritu Santučha niiqui. ¹⁷Nii tjurt'ižiniqu werara intintazkataquičha. Ana criichi žoñinacž kuzquiz anaž luzasachha. Ninacaqui nii tjurt'ižini ana cherasachha, nižaza ana pajasachha. Nii tjurt'ižiniqu ančhuca kuzquiz žejlčha. Jalla nižtiquiztan nii pajčha ančhucqui. Nižaza wiñaya ančhuca kuzquizpacha želaquičha. ¹⁸Wejrqui ančhuc anal ecačha maa ejp wajchallažtakaz. Ančhucaquin wilta tjonačha. ¹⁹Tsjii upacamakaz, nekztan ana criichi žoñinacaqui ana iya wejr cheraquičha. Anchuczti wejr wilta cheraquičha. Nižaza jacatatžcu wiñayjapa

žetača. Weriž žejtchiž cjen, ančhuc zakaz wiñaya žetaquiča Yooztan kamcan. ²⁰Jacatatžtanaqui ančhucqui zizaquicha, wejrqui wejt Yooz Ejpžtan tsjii kuzzizza. Nižaza ančhucqui wejtтан tsjii kuzzizza. Nižaza wejrqui ančhucatan tsjii kuzzizza. ²¹Jakziltat weriž mantita ortinanaca catokčhaja, nižaza cumpličhaja, jalla niiqui ultimuz wejtтан munaziča. Nižaza jakziltat wejtтан munazičhaja, jalla nižtan zakaz wejt Yooz Ejpqui munaziča. Nižaza wejrakal nižtan munazuča. Nižaza wejrqui nii žoñžquiz kjanacama wejt puntu zizkatača.

²²Nekztan Judas (anača Iscariotiqui) tuž pewczicha:

—Wejt Jiliri, čkjažtiquiztan amqui wejtnacaquizkaz pajkataquiya, am puntuquiztan zuma zizjapaya? Nižaza čkjažtiquiztan parti žoñinacžquin am persuna ana pajkataquiya? čKjažtiquiztan nuž cjeejo?

²³Jesusaqui tuž kjaaziča:

—Jakziltat wejtтанpan munazičhaja, jalla niiqui weriž chiita taku cazza, nižaza wejt Yooz Ejpqui nižtan munaziča, nižaza wejrnaqui nižžquin tjonuča, niž kuzquiz kamzjapa. ²⁴Jakziltat wejtтан ana munazičhaja, jalla niiqui weriž chiita taku ana cazza. Weriž chiita takuqui anača wejt persun kuzquiztan. Antiz wejr cučanžžini Yooz Ejpž kuzquiztanpanča weriž chiita takuqui.

²⁵Ančhucatan iya žejlcan ančhucaquiz tii puntunaca chiyuča.

²⁶Wejt wiruñ weriž cjen Yooz Ejpqui tsjii tjurt'ižini cučanžcaquiča. Yooz Espíritu Santuča nii tjurt'ižiniqui. Jalla niiqui wejt cuntiquiztanž cjequiča. Niiqui ančhucaquiz tjapa Yooz puntunaca tjaajnaquiča, nižaza tjapa weriž chiita takunaca cjuñkataquiča.

²⁷‘Wejrqui ančhuca kuznaca jeejzkatuča. Ančhuca kuznaca jeejzkatzcuqui okača. Žoñinacaqui anapanž žoñž kuz nižta jeejzkatasacha. Ančhuca kuznacaqui anača turwaysi cjee, nižaza anača eksna. ²⁸Ančhucqui weriž chiita nonzinčhucča: Okača, nižazal ančhucaquiz wiltal tjonača, jalla nii. Ančhucqui wejtтан zuma munaztasaz niiqui, chipchiž cjitasacha, nii weriž chiitaž cjen. Wejrqui wejt Yooz Ejpžquin okača. Wejt Yooz Ejpqui wejtquiztan juc'antiča. ²⁹Ima ojkan ančhucaquiz anziqi mazinčinča, jalla nuž wattan wejtquiz tjapa kuztan criyajo.

³⁰‘Tii muntuquiz žejlñi žoñinacž mantiñiqui tjoncha. Jalla nii anawal mantiñi diabluqui Judasquiz cučanžžiniča, wejr tankatzjapa. Jalla nižtiquiztan tsjii upacamakaz ančhucatan parluča. Pero nii anawal mantiñiqui wejtquiztan anača juc'ant azzizqui. Jazic niiqui wejr anaž mantasacha. ³¹Wejrqui wejt Yooz Epiž mantitacama okača. Jalla nižtiquiztan tii muntuquiz žejlñi žoñinacaqui zizaquiča, wejrqui Yooz Ejpžtan zuma munaziča, jalla nii. Jaziqui žaažna. Tekžtan ojkla.

UWAS MUNTI PUNTU

15 ¹‘Wejrtča chekan lijitumtqui, tsjii zuma uwas muntiztakaz. Wejt Yooz Ejpqui nii munti cwitiñiča. ²Nii uwas muntiquiztan skoz uwas piz itzanacaz pajkča. Jakzilta uwas piz itzat ana čherchiz pajkčhaja, nii ana čherñi itzaqui c'utžtaž cjequiča. Nižaza nii munti cwitiñiqui čherñi itzanaca zumpachaž azquichaquiča, juc'ant čheri pookajo. Yooz Ejpča nii munti cwitiñiqui. ³Weriž chiitiquiztan ančhucqui zuma kuzziz cjissinčhucča.

⁴Nižaza wejrqui ančhucatan tsjii kuzziztčha. Jalla nižta ančhucqui wejttan tsjii kuzziz cjee. Tsjii muntiquiztan ojkñi piz itzaqui nii muntiquiztan apakta cjequiž niiquei, ana čherchiz cjisnasača. Antiz nii zuma muntiquiz pajkñi itzanacakaz čjherasača. Jalla nižta nii munti itzanaca irataž ančhucqui. Ančhucqui wejttan ana tsjii kuzziz cječhaj niiquei, ana zuma kami atasacha. Antiz wejttan tsjii kuzziz cječhaj niiquei, nekzipanž zuma kamaña nižaza zuma obranaca tjeeznasača.

⁵Wejrtčha nii zuma uwas muntiztakaztqui. Ančhuczi nii uwas piz pajkñi itzanacaztakazza. Jakziltat wejttan ultimu tsjii kuzzižlaj niiquei, nižaza wejrmi nižtan tsjii kuzziz cjesaž niiquei, jalla ničha ancha zuma kamaña nižaza zuma obranaca tjeezniiquei. Jakziltat wejttan ana tsjii kuzzižlaj niiquei, Yooz yujcquiz ana čjul zum obranacami tjeeznasača. ⁶Jakziltat wejttan ana tsjii kuzzižlaj niiquei, Yoozquiztan chjatkataž cjequičha. Nekztanaqui ana zuma kamañchiz cjen kjoñchi itsanacaztakaz cjequičha. Jalla nižtiquiztan nii kjoñchi itsanacaztakaz ricujtaž cjequičha ujqin ujzjapa.

⁷Ančhucqui wejttan tsjii kuzzižlaj niiquei, nižaza weriž tjaajinta takunaca catokaquiž niiquei, nekztan wejtquiztan čjulumiž mayasača. Nekztanaqui amiž mayiztiquiztan tjaataž cjequičha.

⁸Ančhucqui walja zuma obranaca tjeezniž cjen, Yooz Ejpqui honorchiz cjequičha. Nižaza ančuca zuma obranacchiz cjen ančhucqui weriž tjaajinta žoñinacčhucča, jalla nii kjanapachaž tjeeznaquičha. ⁹Jaknužt wejt Yooz Ejpqui wejttan zuma munazičhaja, jalla nižtapacha wejr ančhucatan zuma munazučha. Weriž

ančhucatan munazniž cjen, jalla niipanz cjuñzna. ¹⁰Ančhucqui weriž mantita ortinanaca cumplaquičha. Jalla nekztan wejrqui ančhucatan tirapan munaziñil cjeečha. Wejrqui wejt Yooz Epiž mantita ortinanaca cazzinčha. Jalla nižtiquiztan niiquei wejttan tirapanž munazičha. Jalla nižta irata ančhucatan wejttan cjequičha.

¹¹Jalla nii puntunaca ančucaquiz chiyučha, wejttan chica cuntintuž cjisjapa, nižaza ančuca kuznacami ancha cuntintu cjisjapa. ¹²Weriž mantita ortinaqui tužučha, jaknužt wejr amtan zuma munazitučhaja, jalla nižta irata ančhucqui porapat munazaquičha. ¹³Jakziltat persunpacha niž mazinacž laycu ticžaja, jalla niiquei, ancha munaziñi kuz tjeeža. Jalla nižta žoñžquiztan anaž juc'anti munaziñi kuzziz žoñic želasača. ¹⁴Ančhucqui weriž mantitacama kamaquiž niiquei, nekzipančha ančhucqui wejttan munaziñiiquei. ¹⁵Tekztan najwcchuc anal ančucaquiz “wejt piyunanacacha” cjan cjesača. Tsjii piyunaqui čjulut patruna paačhaja, ana zizza. Wejrqui tjapa wejt Yooz Epiž chiitaqui ančucaquiz zizkatchinčha. Jalla nižtiquiztan tekztan najwcchuc ančucaquiz “wejt mazinacapančha” cjeečha. ¹⁶Ančhucqui ana wejr illzinčhucča. Wejrzi ančhuc illzinčha, nižaza apóstol puestuquiz utchinčha, Yooz taku parli okajo, nižaza walja žoñinaca wejtquiz criiskatajo. Nižaza nii wejtquiz criichi žoñinacacqui wejtquiz tiraž tjurt'acuičha. Wejtquiz kuzziz cjen, čjul mayiztami Yooz Ejpžquiztan mayačhaja, jalla nii mayiztaqui tjaataž cjequičha. ¹⁷Wilta ančucaquiz mantučha: Porapat zuma munazaquičha.

**CRIICHI ŽOŇINACAQUI
CHJAAWJKATTA CJEQUIČHA**

¹⁸ Ana criichi žoŇinacaž ančhucatan chjaawjkatan, cjuŇzna, jalla nižta ninacaqui wejttan chjaawjkatchičha.

¹⁹ Ana criichi žoŇinacž partiraž cjitasaž niiqui, ančhucqui ninacžquiz munazita cjitasačha. Pero wejrqui ančhuc

illzinčha. Jalla nižtiquiztan anačha ana criichi žoŇinacž partira ančhucqui.

Nižaza nižtiquiztan ančhucqui ana criichi žoŇinacžquiz ana munazita cjequičha, nižaza chjaawjtaž cjequičha.

²⁰ Weriž chiitac cjuŇzna. Wejrqui cjichinčha, “Tsjii piyunaqui niž patrunžquiztan anačha juc'anti”.

Ana criichi žoŇinacaqui wejtquiz sufriskatchičha. Nižaza ninacaqui ančhucacquiz zakaz sufriskataquičha. Weriž tjaajinta taku ana catokchičha.

Jaziqui ančhucacž tjaajinta taku ana zakaz catokaquičha. ²¹ Pero ana criichi žoŇinacaqui ančhucac quintra cjequičha,

ančhucacž wejtquiz kuzziz cjen. Nii quintranacaqui wejr cučanžquini anaž pajčha. Jalla nižtiquiztan ančhucacquiz quintraza.

²² Wejrqui ninacžquiz Yooz taku mazŇi ana tjontasaž niiqui, ninacaqui ana nii pajk ujchiz cjitasačha. Pero wejrqui wejt puntuquiztan kjanapacha ninacžquiz chiichinčha. Jalla nižtiquiztan ninacaqui ana čjulumi chiyi atasachha, casticz tjuŇquiziqui. Nižaza ninacžquiziqui anaž pertunac želasačha. ²³ Jakziltat wejtquiz chjaawjkatchaja, jalla niiqui wejt Yooz Ejpžquiz zakaz chjaawjkatcha.

²⁴ Wejrqui ninacž yujcquiz walja milajru obranaca paachinčha, jakzilta wali žoŇžquiztanami juc'anti. Pero anapančha wejtquiz criiz pecchičha. Jaziqui pajk ujchiz cjissičha. Jalla nižta obranaca anal paatasaz niiqui,

ninacaqui ana nii pajk ujchiz cjitasačha. Pero nižta obranaca paachinčha. Nižaza ninacaqui weriž paata milajrunaca cherchičha. Jalla nuž cheržcumi, wejtquizimi wejt Yooz Ejpžquizimi chjaawjchipančha. ²⁵ Jalla nuž ninacaz chjaawjtaqui cjiirta Yooz taku cumplissičha. Ninacž liiquizpacha cjiirta Yooz takuqui, tuž cjičha:

“Wejtquiz chjaawjchičha ana čjul razunžtan”.

²⁶ Wejrqui Yooz Ejpžquiztan ančhucacquiz Yooz Espiritu Santo cučanžcačha. Jalla nii Yooz Ejpžquiztan tjonchi Espiritu Santuqui wejt puntuquiztan weraraž intintazkataquičha, nižaza ančhucaltajapa tjurt'ižinaquičha. Jalla nii Espiritu Santuqui tjonžcu wejt puntuquiztan zizkataquičha.

²⁷ Primirquiztanpacha ančhucqui wejttan chica ojklaychinčhucpančha. Jalla nižtiquiztan ančhucacquiz wejt puntuquiztan zizkataquičha.

PRUEBANACAZ TJONAQUIČHA

16 ¹ Tjapa weriž chiitanacaqui ančhucacquiz chiichinčha, čjul sufrisquiztanami tirapan wejtquin kuzziz cjisjapa, nižaza ana wejtquiztan zarakzjapa. ² Jazta timpuquiz ančhucqui ajcz kjuyanacquiztan chjatkattaž cjequičha. Nižaza tsjii sufris ora tjonaquičha. Jalla nii oraqui jecmit ančhuc conačhaja, jalla nii conŇi žoŇiqui cjequičha, “Wejrtčha Yooz sirwintqui. Jalla nižtiquiztan nii žoŇi conchinčha”, nuž cjequičha. ³ Nii ančhuc conŇi žoŇinacami wejtquizimi wejt Yooz Ejpžquizimi anapan pajčha. Jalla nižtiquiztan ančhuc conasačha. ⁴ Tjapa weriž chiitanacaqui ančhucacquiz chiichinčha, ančhucacquiz yanapzjapa. Nii sufris ora tjontanaqui jalla tii weriž chiitanaca

cjuñznaquiċha. Primirquiztanpacha tii sufris puntuquiztan anċhucaquiz kjanacama ana chiichinċha. Anċhucatan kamiñtaċha. Jalla niċtquiztan tii sufris puntu ana chiiz pecchintaċha.

ESPIRITU SANTUŽ PUNTU

⁵Pero anz wajilla wejr cuchanžquiñižquin okaċha. Anċhucaquiztan anaž jakziltami wejr pewcža, “¿Jakzit okaċhaja?” jalla nii. ⁶Anchucqui ancha llaquita cjissinċhucċha, jalla nuž weriž chiiñiž cjen. ⁷Pero wejrqui werara takunaca chiyuċha. Weriž ojktanaqui waliž cjequiċha anċhucaltaqui. Wejrqui anal okasaž niiquei, tjurt'iiziñi Espíritu Santuqui anaž tjonasaċha. Pero wejr ojkcucuqui nii Tjurt'iiziñi cuchanžcaċha. ⁸Jalla niiquei tjonžucuqui, ana criichi žoñinacž kuzquiz ninacž persun uj tantiyaskataquiċha. Nižaza Yooziž mantita kamañ puntu tantiyaskataquiċha, nižaza nii Espíritu Santuqui Yooz casticz puntu tantiyaskataquiċha. ⁹Espíritu Santuqui ana criichi žoñinacž kuzquiz persun uj tantiyaskataquiċha, wejtquiz ana criichiž cjen. ¹⁰Nižaza nii Espíritu Santuqui ana criichi žoñinacž kuzquiz Yooziž mantita kamañ puntu tantiyaskataquiċha, weriž Yooz Ejpžquin ojkihiž cjen. Jalla niċtquiztan anċhuc zakaz wejr ana iya cheraquiċha. ¹¹Tii muntuquiz mantiñi diabluiqui Yooziž yatisinžtaċha, ana walipanċha, nii. Jazic niiquei castictaž cjequiċha ultim juyzuquiz. Jalla niċtquiztan Espíritu Santuqui ana criichi žoñinacžquiz Yooz casticz puntu tantiyaskataquiċha.

¹²Iya juc'anti kjažumi anċhucaquiz chiižinznaca žejlċha wejttaqui. Pero aniziqui anċhucqui anaž nii

intintazasaċha. ¹³Werar intintazkatñi Espíritu Santuqui tjonžcu, anċhucaquiz tjaajnaquiċha tjapa weraranaca. Anaž persun kuzquiztan tjaajnaquiċha, antiz Yoozquiztan nonžtanaca tjaajnaquiċha. Nižaza tekztan najwcchuc ċhjulut wataċhaja, jalla nii zakaz tjaajnaquiċha. ¹⁴Espíritu Santuqui wejt puntuquiztan anċhucaquiz tjaajnaquiċha. Jalla nuž tjaajinñiž cjen wejrqui honorchiz cjeeċha. ¹⁵Tjapa Yooz Epiž chiitaqui wejrpankazza chiiñtqui. Tsjiikaztċha wejrnacqui. Jalla niċtquiztan wejrqui chiichinċha, Espíritu Santuqui wejt puntuquiztan anċhucaquiz tjaajnaquiċha, nii.

CUNTINTUŽ CJEQUIĊHA

¹⁶‘Upaquiztancama anċhucqui wejr ana cheraquiċha. Nekztanaqui tsjii kjaž majquiztan wejr wilta cheraquiċha.

¹⁷Nekztanaqui yekjap tjaajintanacaqui porapat pewcsassiċha, tuž cjican:

—¿Kjažt cjii tjeejo, tuž cjicanajo?
“Upaquiztancama anċhucqui wejr ana cheraquiċha. Nekztanaqui tsjii kjaž majquiztan wejr wilta cheraquiċha”. Nižaza tiiquei “Wejrqui Yooz Ejpžquin okaċha”, cjiċha. Jalla nuž cjican, ¿kjažt cjii teejo? ¿Ĉjul puntut chii teejo?

¹⁸Ninacaqui cjichizakazza:

—“Upaquiztancama” chiicanaqui, ¿kjažt cjii teejo? Anaċha intintazzuca tiiz chiitaqui.

¹⁹Jesusaqui persun kuzquiz zizatċha, ninacaqui niizquin tsjii pewcz pecatċha, jalla nii. Jalla nekztanaqui Jesusaqui ninacžquiz tuž cjichiċha:

—Wejrqui chiichinċha, tuž cjican:
“Upaquiztancama anċhucqui wejr ana cheraquiċha, nekztanaqui tsjii kjaž majquiztan wejr wilta cheraquiċha”. Jalla nuž chiican, ¿kjažt cjii? ¿Jalla niiċha ziz pecya? ²⁰Ultim weraral

ančhucaquiz cjiwčha. Ančhucqui llaquita cjequičha, nižaza kaaquičha. Ana criichi žoñinacazti cuntintuž cjequičha. Ančhucqui llaquita kuzziz cjenami, tsjii kjaž majquiztan ancha chipchipcan cuntintuzakaz cjisnaquičha. ²¹Nonžna. Majtz ora irantižcan tsjaa maatak žonqui janchinaca walja mizkatiñčha. Nekztan wawa majtžcuqui, naa maatak žonqui wawchiz cjen ana janchi mizkattami cjuñiñčha. Wawchiz cjen, ancha cuntintučha naaqui. ²²Jalla nižta irataž ančhucqui anziqúi llaquita kuzzizza. Pero wejrqui am wilta cheračha. Jalla nii oraqui ančhuca kuznaca cuntintuž cjequičha. Nižaza nii ančhuca cuntintu cjis kuzqui anaž jecmi wilta nižta llaquita cjiskatasacha.

²³Nii orquiztan najwcchuc ančhucqui zizñi cjiscu wejr anaž iya pewcnaquičha. Ančhucaquiz weraral chiyučha. Wejtquiz tjapa kuztan cjen, ančhucqui Yooz Ejpžquiztan čjulumi mayačhaja, jalla nekztan weriž cjen nii mayiztaqui tjaataž cjequičha. ²⁴Tii oracama ančhucqui anaž čjulumi maychinčhucča wejt tjuuquiz. Mayiza, nekztanaqui tjaataž cjequičha, ančhuca kuz juc'anti cuntintu cjisjapa.

JESUSIŽ CHIITANACA

²⁵Tii oracama wejrqui ančhucaquiz ch'aman intintazzuc takunaca chiichinčha. Tsjii tjuñiqui tjončha. Jalla nii tjuñiquiztan nižta ch'aman intintazzuc takunacami anal iya chiyacha. Antiz Yooz Ejpž puntuquiztan jalla niil kjanacama chiyacha. ²⁶Nii oraqui ančhucqui wejt tjuuquiz čjulquiztanamiž mayizaquičha. Nekztan wejrqui ančhucaltajapa anal iya maynačha wejt Yooz Ejpžquiztanqui. ²⁷Ančhucqui wejttan munazichinčhucča. Nižaza

wejtquiz criichinčhucča, wejrqui Yooz Ejpžquiztan tjonchi, jalla nii. Jalla nižtiquiztan Yooz Ejppacha ančhucatan munazičha. ²⁸Wejrqui Yooz Ejpžquiztan tii muntuquiz tjonchinčha. Nižaza tii muntuquiztan, wejt Yooz Ejpžquin quepačha.

²⁹Jalla nekztanaqui niž tjaajintanacaqui cjichičha:

—Jaziqui ultimu kjanacama chiichamčha, ana ch'aman intintazzuc takunacžtan. ³⁰Jaziqui zizučha, amqui tjapa čjulumi zizñampančha, nii. Ampankam wejtnaca kuzmi zizza. Jalla nižtiquiztan wejrnacqui anal iya pewcnasacha. Nižaza wejrnacqui ultim chekpacha criyučha, amqui Yooz Ejpžquiztan tjonchamčha, jalla nii.

³¹Jesusaqui ninacžquiz tuž kjaazičha:

—¿Jaziqui ančhucqui ultim chekpacha criichinčhucjo? ³²Tsjii ora wajičha. Anzpachačha nii oraqui. Nii oraqui ančhucqui wichanziž cjequičha, nižaza zina zina wichanziž cjequičha. Wejrqui zinalla ectal cjeečha. Pero wejr zina ecta cjenami, wejrqui ana zina cjeečha. Wejt Yooz Ejpž wejttan chica cjequičha. ³³Jaziqui tjappacha tii takunaca ančhucaquiz chiichinčha, wejtquiz kuzziz cjen, cuntintu cjisjapa. Tii muntuquiz žejlcan ančhucqui sufraquičha. Walja tjup kuzzizpan cjee. Wejrqui tjapa liju atipchinčha.

JESUSIŽ YOOZ EJPŽTAN PARLITA

17 ¹Jalla nuž chiižcu Jesusaqui tsewcchuc arajpach kjutñi cherzičha. Nekztan Yooz Ejpžtan parlichičha, tuž cjican:

—Yooz Tatay. Wejt sufris ora tjončha. Wejrtčha am Majchtqui. Wejtquiz honorchiz cjiskatalla. Nekztan wejrqui amquiz juc'ant honorchiz cjiskatačha. ²Tjapa žoñinaca mantizjapa, jalla

nii poder wejtquiz tjaachamča. Jakziltami amqui wejtquiz intirjičhaja wejt parti cjisjapa, jalla ninacžquiz arajpachquin wiñaya kamkatača wejrqui. ³Amča zinta werara Yoozqui. Nižaza wejrtča Jesucristutqui; amiž cučanžquita Žoñtča. Wejt parti žoñinacqui amquizimi wejtquizimi pajča. Jalla nižtiquiztan arajpachquin ućhumtan wiñaya kamaquičha.

⁴Tii muntuquiz kamcan amquiz honorchiz cjiskatchinča. Nižaza amiž mantita obranaca žerzinča. ⁵Jaziqui, Yooz Tatay, amquin wilta quejpčcu, arajpachquin amtan chica želaquičha. Nekztan wejtquiz honorchiz cjiskatalla. Ima tii muntu želan, wejrqui amtan chica honorchiztala. Jalla nižta tuquita honorchiz irata wilta wejtquiz honorchiz cjiskatalla.

⁶Amqui žoñinaca illzamča, wejt partiquiz cjisjapa. Jalla nii žoñinacžquiz intintazkatchinča am puntuiztan. Ninacqui amtača. Nižaza wejt parti cjisjapa wejtquiz tjaachamča. Nižaza ninacqui am takunac jaru kamča. ⁷Jaziqui wejt partir žoñinacqui zizza, tjapa weriž chiitaqui amquiztan tjonñicamača, jalla nii. ⁸Amiž chiita takunacacama ninacžquiz tjaajinchinča. Jalla nekztan ninacqui weriž tjaajinta catokchiča. Nižaza weriž tjaajinta žoñinacača zizñipanqui, wejrqui amquiztan tjonchinča, jalla nii. Nižaza crichipanča, amqui tii muntuquiz wejr cučanžquichamča, nii.

⁹Jaziqui ninacžtajapa amquiz mayizuča. Ana criichi žoñinacžtajapa anal mayizuča. Antiz wejt partir žoñinacžtajapakaz mayizuča, amiž illñiž cjen. ¹⁰Amtača tjapa wejt partir žoñinacqui. Nižaza wejttača ninacqui. Jalla ninacaž cjen wejrqui honorchizza.

¹¹Wajilla ana iya tii muntuquiz kamača. Nii wejt partir žoñinacaž eclaquičha. Tii muntuquiz tira želaquičha ninacqui. Wejrzi amquin quejpžcača. Zuma arajpach Yooz Tatay, tii žoñinaca wejtquiz tjaachamča. Jaziqui am aztan tinaca tirapan cwitalla, tsjii kuzziz cjejajo, jaknužt ućhumqui tsjii kuzzizlaja, jalla nižta. ¹²Tii muntuquiz tinacžtan kamcan, tii žoñinaca cwitichinča, am aztan. Nižaza tinacžquiztan tsijtsinchinča čjulquiztanami ana kjaž cjisnajo. Tsjiiquei pertissipanča. Jalla nuž pertisjapa nii Judas Iscariotiqui žejltkalča. Jalla nuž cjen tuquita cjiirta Yooz taku cumplissičha.

¹³Anziqui wejrqui amquin quejpžcača. Iya tsjii zkolucžtan tii muntuquiz kamcan wejrqui tinacžquiz chiižinuča, wejtquiz criichi žoñinacaž wejržtapacha cuntintu cjejajo. ¹⁴Wejrqui tinacžquiz am taku tjaajinchinča. Jaknužt wejrqui ana criichi žoñinacž partiquiz ana želatučhaja, jalla nižta irata wejtquiz criichi žoñinacqui ana žejlča ana criichi žoñinacž partiquiz. Jalla nižtiquiztan ana criichi žoñinacqui ninacžquiz chjaawjča. ¹⁵Amquiztan ana mayizuča, wejt žoñinacaž tii muntuquiztan chjichtaž cjisjapa. Antiz amquiztan mayizuča, ana wal diabluzquiztan wejt žoñinaca tsijtsinta cjisjapa. ¹⁶Jaknužt wejrqui ana criichi žoñinacž partiquiz ana želatučhaja, jalla nižta irata wejt žoñinacqui ana žejlča, ana criichi žoñinacž partiquiz. ¹⁷Amiž chiitaqui ultim werarača. Am takuž cjen wejtquiz criichi žoñinaca zuma kamañchiz cjiskata. Čjul ana zuma kamañquiztanami zarakskata. ¹⁸Jaknužt amqui tii muntuquiz žejlñi žoñinacž kjutñi wejr cučanžquičhaja, jalla nižaza wejrqui tii muntuquiz

žejlñi žoñinacž kjutñi wejt žoñinaca cuchnuča. ¹⁹Wejtquiz criichi žoñinacžtajapa ancha kuztanča wejrqui ticzjapa. Nižaza am werar tawk jaru kamtiquiztan tii žoñinaca t'akžinuča amta cjejajo.

²⁰“Wejrqui tii tekžta žoñinacžtajapa alaja anal mayizuča, antiz tjapa wejtquiz anzimi wiruñami criichi žoñinacžtajapa mayizuča. Tii tekžta žoñinacž Yooz taku paljaytiquiztan yekjapanacahui wejtquiz criyaquičha. Jalla ninacžtajapa zakaz mayizuča.

²¹Jalla tjapa ninacžtajapa mayizuča tsjii kuzziz cjisjapa. Yooz Tatay, amqui wejttan tsjii kuzzizta. Nižaza wejrqui amtan tsjii kuzziztča. Jalla nižta irata ninacahui učumnacahiz tsjii kuzziz cjila. Jalla nuž mayizuča, tii muntuquiz žejlñi žoñinaca criyajo, am wejr cuhanžquichi, jalla nii.

²²Amiž wejtquiz tjaata arajpach kamaña, jalla nii kamaña ninacžquiz cjiskatchinzakazza, tsjii kuzziz cjejajo, jaknuž učumqui tsjii kuzzizalaja, jalla nižta. ²³Jaknužt amqui wejttan žejlčhaja, jalla nižtača wejrqui ninacžtan želača, ninaca tsjii kuzzizpan cjejajo. Jalla nižtiquiztan žoñinacahui zizaquičha, amqui wejr cuhanžquichiča, jalla nii. Nižaza žoñinacahui zakaz zizaquičha, amqui ninacžtan munaziča, jaknužt amqui wejttan munazičhaja, jalla nižta.

²⁴“Yooz Tatay, amqui wejtquiz tii žoñinaca tjaachamča, wejtquiz criyajo. Jalla tinacahui wejttan chica kamñijapa pecuča, jakziquin wejr želačhaja, jalla nicju. Jalla nužuntu žejlcan tinacahui wejt arajpach kamaña kjana cheraquičha. Ima tii muntu želan, wejttan munaziñiž cjen amqui wejtquiz nii arajpach kamaña tjaachamča. Jalla nii kamaña cheraquičha wejt partir žoñinacahui.

²⁵Ultim lijitum Tatayi ana criichi žoñinacahui am anaž pajča. Wejrztii am pajuča. Nižaza jalla tinacahui zizza, amqui wejr cuhanžquichamča, jalla nii. ²⁶Am puntuquiztan tinacžquiz zumpacha intintazkatchinča. Nižaza wejrqui tiral intintazkatučha, ninacž zuma munazizjapa, jaknužt učumqui zuma munazičhaja, jalla nižta. Nižaza am puntuquiztan ninacžquiz intintazkatučha, wejr ninacžtan tsjii kuzziz cjisjapa.

JESUSAQUI TARAZUNTAČHA

18 ¹Jesusaqui nuž chiižcu niž tjaajintanacžtan ojkchiča. Cedrón cjeta k'awž tsjii latuquin ojkchiča. Jalla nicju ch'ojñi muntinaca želatča. Nijecchuc luzziča. ²Jesusaqui nii yokquin kjaž wilta ajcžñipantakalča niž tjaajintanacžtan. Tarazunñi Judasqui nii yoka pajchiča. ³Jalla nicju Judasqui zultatunacami, nižaza timplu wijilñi zultatunacami, jalla ninaca chjitchiča. Timplu jilirinacami, fariseo žoñinacami jalla ninacača nii timplu wijilñi zultatunaca cuchanchiqui. Ninacahui irantichiča michanacžtan teyanacžtan pajk cuchillunacžtan, nižaza wjajtz carotinacžtan. Jalla nižtanacžtan irantichiča. ⁴Jesusaqui čhjulut watačhaja, jalla nii tjapa zizatča. Nii tjonchi žoñinacžquiz macjatžcu, pewczičha, tuž cjan:

—¿Jectča kjur ančucjo?

⁵Jalla ninacahui kjaaziča, tuž cjan:

—Wejrnacahui kjuruča Jesusa, nii Nazaret wajtchiz žoñi.

Jesusaqui tuž kjaaziča:

—Wejrtča niitqui.

Judas, nii tarazuñi žoñiqui ninacžtan chica tsijtchi želatča. ⁶Jesusaž “Wejrtča niitqui” cjitiquiztan nii tanñi

žoninacaqui wir kjutñi atžcu porapat tewksarascu yokquiz tjojtassiča.

⁷Jesusaqui wilta pewcziča:

—¿Jectpan ančhuc kjurjo? —cjican.

Ninacaqui wilta kjaaziča, tuž cjican:

—Wejrnacqui kjuruča Jesusa, nii Nazaret wajtchiz žoñi.

⁸Jesusaqui nekztan zakaz cjichiča:

—Wejrtča cjichinsala. Ančhucqui wejr kjurča. Jaziqui tii parti žoninaca cutznaquiča.

⁹Jalla nekztan Jesusaž tuqui chiita taku cumplissiča. Tuquiqui Jesusača chiichiqui, jalla tuž: “Yooz Epiž wejtquiz tjaata žoninacaqui ana tsjiimi pertichinča”. ¹⁰Simón Pedruqui pajk cuchillchiztača. Jalla nii cuchillu jwescu, Pedruqui timplu jilirž piyunž žew cjuñi pootžcu chjajtžinčiča. Jalla nii cjuñi chjajtžinta žoniqui Malco cjitatača. ¹¹Nekztanaqui Jesusaqui Pedružquiz cjichiča:

—Am cuchillu cuchillž žejlžquiz quijtžna. Wejt Yooz Ejpž pinsita kuz jaru wejtlaqui sufristanča. ¿Anaj wejr tii sufrasajo?

JESUSAQUI CHJICHTAČHA

¹²Jalla nekztanaqui zultatunacami, zultatž comandantimi, nižaza judío timplu wijilñi zultatunacami, jalla ninacaqui Jesusa tanžcu kjara jweržinčiča. ¹³Nekztan Anás cjita jilirž kjuyquiz chjitchiča. Anasqui Caifás ajmuž ejptača. Jalla nii wata Caifasqui timplu chawjc jiliritača. ¹⁴Nii Caifasqui tuquiqui tuž cjitkalča: “Učhumnacaltajapa tsjii žoñi ticstanča, tjapa žoninaca ana conta cjeyajo”.

¹⁵Jesusa chjichan, Simón Pedružtan tsjii tjaajinta žoñžtan Jesusa apziča. Nii tsjii Jesusiž tjaajinta žoniqui timplu jiliriz pajtatača. Jalla nižtiquiztan Jesusižquiz apžcu nii timplu jilirž

patiuquin luzziča. ¹⁶Pedruqui ana pajtaž cjen zancu eclichča. Nekztan nii tsjii luzzi tjaajinta žoniqui ulanžquichiča, naa ulanz zanquiz cwtiñi žonaquin paljayzjapa. Jalla nuž paljayžcu patiuquiz Pedro luzkatchiča.

¹⁷Nekztan naa cwtiñi žonqui Pedružquiz pewczinča, tuž cjican:

—¿Anaj am zakaz nii žoñžtan chica ojklajñamtajo?

Nekztan Pedruqui chiichiča:

—Anaž wejr, —cjican.

¹⁸Ch'uñuriž cjen piyunanacami timplu zultatunacami uj taaziča carpunžtan. Nekztan nii uj parazquiz tsijtchi kutnatča. Ninacžtan chica Pedruqui tsijtchi zakaz želatča, kutuncan.

TIMPLU CHAWJC JILIRŽQUIN APANTITA

¹⁹Jalla nekztanaqui timplu chawjc jiliriqui Jesusa pecunchiča, niž tjaajinta žoninacž puntuquiztanami nižaza niž persun tjaajintami.

²⁰Jesusaqui nižquiz kjaaziča, tuž cjican:

—Tjapa žoninacž yujcquiz tjaajinchinča. Učhum ajcz kjuyquizimi timpluquizimi tjaajinchinča.

Timpluquiz tjapa žoninaca ajczñiča. Ana chjozaka tjaajinchinča.

²¹¿Kjažtiquiztan nuž wejr pecunjo? Weriž tjaajinta nonžni žoninacžquiz pewczna, čjulut tjaajintučaja, jalla nii. Jalla ninacaqui weriž tjaajintanaca zizza.

²²Jalla nuž chitan, tsjii nekz tsijtchi žejlñi zultatuqui Jesusa yujcquiz kjaržtan tsajpchiča, tuž cjican:

—¿Jalla nuž timplu jiliržquiz kjaazkaya?

²³Jesusaqui nii zultatžquiz kjaaziča, tuž cjican:

—Wejr ana zuma chiituchaj niiqui, ¿jaknužt cjican ana zuma chiichintajo?

Zumal chiyučha. ¿Kjažtiquiztan am wejr tsjajpjo?

²⁴ Jalla nekztanaqui Jesusa kjara jweržintapacha cuchiañchiča Caifás timplu chawjc jiliržquin.

PEDRUQUI K'OTCHIČHA

²⁵ Jalla nii oraqui Simón Pedruqui tsijtchi želatča nii ujquiz kutuncan. Tsjii tsjii nekz žejlāi žoñiqui Pedružquiz cjichiča:

—Amqui nii žoñžtan chica ojklayñamčha, čana jaa?

Pedruqui toscara čiičiča:

—Anača wejrqui, —cjican.

²⁶ Jalla nekztanaqui tsjii timplu jilirž piyunaqui Pedružquiz pewczizakazza. Nii piyunaqui nii cjuñi chjajtžinta piyunž familiatača. Jalla tuž cjican pewczyča:

—Nii munti yokquin nii žoñžtan chica am cherchinla, čana jaa?

²⁷ Pedruqui wilta toscara čiičiča. Jalla nuž wilta toscara čihan, nii orapacha tsjii querwallpi jora kjawchiča.

PILATUŽQUIN CHJICHTA

²⁸ Jalla nekztanaqui Caifás cjita žoñžquiztan Jesusaqui chjichtača pajk mantiñiž kjuyquin. Waj kjantatitača. Nii judío žoñinacapacha nii pajk mantiñiž kjuyquin ana luzziča, ninacž cuzturumpi cjen. Jalla nuž luztasaz niiqui, pascua pjijzta čhjeri ana lujltasača. ²⁹ Jalla nižtiquiztan Pilatuqui ninacžquiz paljayi ulanžquichiča, tuž cjican:

—Ančhucqui, ččjul ujž tii žoñž quintra jwes pecya?

³⁰ Žoñinacaqui tuž kjaaziča:

—Tii žoñiqui ana čjul pajk ujnacami paatasaz niiqui, anal wejrnaqui tii intirjitasacha.

³¹ Nekztanaqui Pilatuqui ninacžquiz cjichiča:

—Ančhuckaz chjicha, ančuca lii jaruž justicia paažca.

Nii žoñinacaqui kjaaziča, tuž cjican:

—Wejtnacalta žoñi conzqui lii quintrača.

³² Niiž tuquiqui Jesusaqui čhiitkalča, persun ticz puntuquiztan, jaknužt ticznačhaja, jalla nii. Nižaza niiž čiiitaqui cumplisnaquiča.

³³ Pilatuqui wilta niiž kjuyquin luzquichiča. Jesusa kjawžcu, niižquiz pewczyča, tuž cjican:

—¿Judío žoñinacž chawc jilirimkaya?

³⁴ Jesusaqui niižquiz kjaaziča, tuž cjican:

—¿Amqui jalla nuž persun kuzquiztan wejr pewczya? Už čyekja žoñinaca amquiz nuž pewczna cjichi jaa?

³⁵ Pilatuqui tuž kjaaziča:

—Wejrqui judío žoñt, čjaa? Am persun wajtchiz žoñinacami nižaza am persun timplu jilirinacami, jalla nii žoñinacača wejtquin am intirjichiqui. ¿Čhjul uj paachamt, amjo?

³⁶ Jesusaqui nekztan cjichiča:

—Wejtla mantizqui anača tii muntuquiztan. Tii muntuquiztan wejtla mantiz cjesaz niiqui, wejt piyunanaca kichaskatasača wejt quintra žoñinacžquiz, ana wejr intirjita cjisjapa. Pero wejtla mantizqui anača tii muntuquiztanaqui.

³⁷ Nekztan Pilatuqui cjichiča:

—¿Nižtaqui amčhalani mantiñi jiliriniqui?

Jesusaqui cjichiča:

—Jesalla, wejr mantiñi jilirtchiya, am čiiča jalla nuž. Tii muntuquiz tjonžcu nassinča, werara puntu tjaajinzjapa. Jakziltat nii werara tjaajinta jaru kamčhaja, jalla niiqui weriž čiiita taku nonža.

³⁸ Jalla nuž čhiitiquiztan Pilatuqui cjichiča:

—Werara puntuqui, ¿chjulut neejo?

Jalla nuž pewczcu Pilatuqui wilta ulanchiċha judfo žoñinacžquin parli. Ninacžquiz cjichiċha:

—Wejrqui tii žoñžquiz ana ċhjul ujmi jwesi atuċha. ³⁹Pascu pijjztiquiz anċhucalta tsjii custurumpi žejlċha, wejtla tsjii preso tanta žoñi cutzqui. ¿Tii judfo wajtchiz chawjc jiliri cutznaquiya? ¿Jalla nuž cutskatz pecya?

⁴⁰Judfo žoñinacaqui kjawchiċha:

—iTii žoñi ana cutzna! iBarrabás cutzna! —cjican. Barrabasqui tsjii anawal tjañi žoñitaċha.

PILATUQUI JESUSA CUTZ PECĊHA

19 ¹Jalla nekztanaqui Pilatuqui wilta kjuylchuc Jesusa majcchiċha. Nekztanaqui Jesusižquiz wjajtajo mantichiċha. ²Nekztan zultatunacaqui ch'apquiztan tsjii pillužtakaz paachiċha. Jalla nii paatižtan Jesusiž achquiz tewžinchiċha. Nižaza jilirž murat zquti tjtuziċha. ³Jalla nuž paažcu niizžquin macjatchiċha, —iViva, judfo žoñinacž chawjc jiliri! —cjican.

Nižaza Jesusiž yujcquiz kjaržtan tsjajpchiċha.

⁴Nekztan Pilatuqui judfo žoñinacžquin wilta ulanžquichiċha. Nekztan ninacžquiz cjichiċha:

—Cherzna. Anċhucaž intirjita žoñi ticju jwescaċha, anċhuc zumpacha intintazajo. Wejrqui tii žoñžquiz anal ċhjul ujmi jwesi atuċha.

⁵Jalla nekztan Jesusaqui ulanzkatžquichiċha. Ch'apquiztan paataqui achquiz tewžinta, nižaza jilirž murat zquti tjtutža. Nekztanaqui Pilatuqui ninacžquiz cjichiċha:

—Tiiċha anċhucaž intirjita žoñiqui.

⁶Timplu jilirinacami, nižaza timplu wijilni zultatunacami nii cheržcu, alto joržtan kjawcan, chiichiċha:

—iCruzquizkaz ch'awczna! iCruzquizkaz ch'awczna! —cjican.

Pilatuqui ninacžquiz cjichiċha:

—Way, nižtacž ċhjicha anċhucqui, nižaza cruzquiz ch'awczca. Pero wejrqui ana ċhjul ujmi tiižquiz jwesi atchinċha.

⁷Nekz žejlñi judionacaqui tuž kjaaziċha:

—Wejrnacqui liichiztċha. Wejtnaca lii jaru tii žoñic ticstanċha, tiiqui “Wejrtċha Yooz Majch” cjican ojklaychiž cjen.

⁸Jalla nii chiita taku nonžcu, Pilatuqui tsjan eksiċha Jesusižquiztan.

⁹Jalla nižtiquiztan Pilatuqui niiz žkuya wilta luzziċha Jesusižquin pewczjapa. Jalla tuž pewcziċha:

—¿Jakziquiztan žoñipant amya? Jesusazti ana ċhjulumi kjaaziċha.

¹⁰Jalla nižtiquiztan Pilatuqui niizžquiz wilta paljaychiċha, tuž cjican:

—¿Kjažtiquiztan am ana wejtquiz kjaazjo? Wejrqui mantasaċha, am cutzjapa. Nižaza mantasaċha cruzquiz ch'awczjapa, ¿Jalla nii ana ziz amjo?

¹¹Jesusaqui niizžquiz kjaaziċha, tuž cjican:

—Yoozqui amquiz mantiz poder ana tjaatasaj niiqui, amtaqui mantiz poder ana žejltasaċha. Yooz amquiz mantiz poder tjaachiž cjenkaz wejr mantasaċha. Jalla nižtiquiztan jecċhalaj amquiz wejr intirjichi, jalla ninacaċha amquiztan juc'ant ujchizqui.

¹²Jalla nuž nonžcu Pilatuqui Jesusa anchaž jaknužumi cutz pecatċha pero nii judfo žoñinacazti kjawžcan chiichiċha, tuž cjican:

—Tii žoñi cutznaquiz niiqui, am zakaz César tsjan chawjc jilirž quintr paaquičha. Jakziltat “Wejrtċha chawjc jiliritqui” cjican cheċhaj niiqui, César chawjc jilirž quintrāž paaċha.

¹³Pilatuqui jalla nuž nonžcu, zultatu mantichiċha, Jesusa zancchuc jwescajo.

Zancchuc jwesquichiċha Gabata cjita patiuquin. Gabata tuċ cjiċha, maznacċtan curta, jalla nii. Jalla nicju Pilatuqui jusjiiz julzquiz julziċha.

¹⁴ Jalla nii tjuñiqui tjacz tjuñitaċha jaka pascua pijjztaċ cjen. Niċzaa taypurutaċha. Nekztanaqui Pilatuqui nii judío ŋoñinacċquiz cjichiċha:

—Tiiċha anċhuca chawjc jiliriqui.

¹⁵ Ninacaqui kjawchiċha, tuċ cjican:

—iTicċla tiiqui! iTicċla tiiqui!

iCruzquiz ch'awcċla!

Nekztan Pilatuqui ninacċquiz cjichiċha:

—ċKjaċt anċhuca tsjan chawjc jiliri ch'awcċnas?

Nii timplu jilirinacaqui tuċ kjaaziċha:

—Wejtnacaltaqui zinta tsjan chawjc jiliri ħejlċha, César cjitaċha.

¹⁶ Jalla nekztanaqui Pilatuqui ninacċ kuzcama Jesusa intirjichiċha cruzquiz ch'awcċta cjisjapa.

CRUZQUIZ CH'AWCTAĊHA

¹⁷ Jalla nekztanaqui Jesusaqui chjichtataċha. Persuna cruza kuzi ojkkatchiċha Ach Tsjiy cjita tjuuchiz yokquin. Nii yokaqui hebreo tawkquiz Gólgota cjitataċha. ¹⁸ Jalla nicju cruzquiz ch'awctataċha, niċzaa niċċtan chica tsjii pucultan ŋoñinaca yekja cruzanacquiz ch'awctazakaztaċha, Jesusiċ porap kjuttan, Jesusazti ninacċ taypiquiz. ¹⁹ Niċzaa Pilatuqui tsjii letrero paakatchiċha, tuċ cjican:

“Jesusa Nazaret wajtchiz ŋoñi.

Judionacċ tsjan chawjc jiliri”. Jalla nii paaċcu Jesusiċ ach juntuñ cruzquiz ch'awcċinchiċha. ²⁰ Chawc wajt ċcati Jesusaqui cruzquiz ch'awctataċha.

Jalla niċtquiztan walja judío ŋoñinacaqui niċċ letrero liichiċha. Nii letreruqui ċhjep tawkquiztan cjiirtataċha, hebreo tawkquiztanami,

griego tawkquiztanami, niċzaa latín tawkquiztanami. ²¹ Nii letrero cherċcu timplu jilirinacaqui Pilatuċquiz cjichiċha:

—Ana cjiira, “Judionacċ tsjan chawjc jiliri” cjicanaqui. Antiz cjiira, “Tii ŋoñiqui cjiċha, ‘Wejrtċha judionacċ tsjan chawjc jiliritqui’ ”. Jalla nuċ cjiira.

²² Pilatuqui tuċ kjaaziċha:

—Jaknuċt cjiirċhinċlaja, nuċupanikaz cjequiċha.

²³ Zultatunacaqui Jesusa cruzquiz ch'awcċcu niċċ zquiti ricujchiċha. Niċzaa pajkpċic partiquiz tojziċha, nii pajkpaltan zultatunacaqui. Tsjii pajk tol zquitiqui ana ch'ucuchiz watztataċha, tsewcchuc kozzuc pakjipacha. ²⁴ Jalla niċtquiztan nii zultatunacaqui porapat kazassiċha, tuċ cjican:

—Anaċhum wjaċrla. Antiz surtiila. Tii zquitiqui jecċquizkat surti cayaċhani niċċtaċ cjequiċha.

Jalla nuċ paatan cjiirċta Yooz takuqui cumplissiċha. Cjiirċta Yooz taku tuċ cjiċha: “Ninacċpora wejċt zquiti tojziċha, niċzaa parti zquitquiztan surtiyassiċha”. Jalla nuċ paachiċha nii zultatunacaqui.

²⁵ Jalla nekz Jesusiċ cruz ċcati tsjijsiñ ċelatċha, Jesusiċ maa; niċzaa niċċ maa cullaqui; niċzaa María (Cleofas tjuntaċha); niċzaa María Magdalena; nii pajkpaltan ċelatċha. ²⁶ Jesusaqui niċċ maa cherċhiċha. Niċzaa niċċ pecta tjaaċinta ŋoñi naaċa ċcati tsjiċtchi ċelatċha. Jalla nuċ cherċcu Jesusaqui niċċ maaquiz cjichiċha:

—Maataka, tiċha am maati cunta.

²⁷ Nekztanaqui nii tjaaċinta ŋoñċquiz cjichizakazza:

—Taaċha am maaqui.

Jalla nekztanpacha nii tjaaċinta ŋoñiqui Jesusiċ maa ricujċcu persun kjuya chjitchiċha.

JESUSAQUI TICZA

²⁸ Jalla nekztanaqui Jesusaqui zizzičha, tjapa Yooz Epiž tjaata langznaca liwž žeržtapantača, jalla nii. Nekztan cjichiča:

—Kjaz kjaral paznuča.

Jalla nuž cjican, cjiirta Yooz takuqui cumplissiča.

²⁹ Jalla nekzi tsjii ojch želatča jar vinchiz. Jalla nekztanaqui kjaz ch'umñi esponja t'awziča nii vinquiz. Nekztan hisopo cjita munti parquiz chjapžcu, Jesusiž atquin ch'iizinchičha. ³⁰ Jesusaqui nii jar vinu licžcu, nekztan cjichiča:

—Tjapaž cumplissay. —Jalla nuž chiižcu Jesusaqui acha colžcu ticziča.

³¹ Pascua pijizta tjacz tjuñitača. Niiž jakatažu jeejz tjuñitača, nižaza chawc pijizti tjuñitača. Jalla nižtiquiztan judío žoñinacaqui nii cruzquiz ticziž curpunaca anaž nuž tsjiptapacha čhelinz pecatča. Jalla nižtiquiztan nii judionacaqui Pilatužquin maychiča, cruzquiz ch'awcta žoñinacž lis tsjii kjolkjolžinajo, apura ticskatsjapa. Nekztan ticžtan cruzquiztan apakznasača. ³² Nekztan Pilatuqui zultatunaca mantichiča, nii cruzquiz ch'awctanacž lis kjolžjapa. Primir tjañž lismi kjolžinchičha. Nižaza tsjii tjañž lizmi kjolžinchizakazza. ³³ Nekztanaqui Jesusižquiz macjatžcu, nii zultatunacaqui cherziča, ticzi, jalla nii. Jalla nižtiquiztan niiž lismi ana kjolkjolžinchičha.

³⁴ Pero tsjii zultatuqui Jesusiž ch'ill kjuttan chjapžinchičha pajk cuchillžtan. Jalla nuž chjaptan ljocmi kjazmi lewchiča. ³⁵ Wejrpača jalla nii cherchinča. Jalla nižtiquiztan werara ticlarchinča nii puntuquiztan, ančhuczakaz criyajo. Weriž ticlarta takuqui werarapanča. ³⁶ Jalla tii

watchi puntunacquiztan cjiirta Yooz takuqui cumplissiča. Cjiirta Yooz takuqui jalla tuž cjiča: “Anaž jakzilta niiž tsjijmi kjoltaž cjequiča”. ³⁷ Nižaza tsjii cjiirta Yooz takuqui tuž cjicha: “Ninacaqui ninacaž chjapta žoñiqui cheraquiča”.

JESUSAQUI TJATŽTAČHA

³⁸ Jalla nekztanaqui tsjii Arimatea wajtchiz žoñiqui, José cjita, Pilatužquin mayi ojkičiča. Josequi Jesusiž curpu maychiča tjatzjapa. Josequi chjojzaka Jesusiž chiita tjaaajintanaca catokchiča, ana jeczquizimi mazcu. Parti judío jilirinacžquiztan eksiča. Jalla nuž maytan Pilatuqui permiso tjaachiča. Jalla nekztanaqui Josequi ojkičiča Jesusiž curpu chjichi. ³⁹ Nižaza Nicodemo cjita žoñiqui Jesusiž curpu tjaczni tjonchiča. Jalla nuž Jesusiž curpu tjaczjapa zjičchiča, tsjii quintala zuma ulurchiz miržtan aloestan t'ajžta. Niiž tuquiqui Nicodemuqui Jesusižquin ween tjonzitača. ⁴⁰ Josežtan Nicodemžtan Jesusiž curpu tjacziča. Nižaza nii miržtan aloestan jalla ninacžtan zuma pañunacžtan Jesusiž curpu capziča, jaknužutažlaj nii judío žoñinacž cuzturumpi, jalla nuž. ⁴¹ Jesusiž cruzquiz ch'awcta yokquin muntinaca želatča. Nii muntinac yokquiz tsjii ew sepulturu želatča, ana jec ticzimi tjatžtatača nii ew sepulturquiz. ⁴² Judionacž jeejz tjuñimi pascua pijizta tjuñimi wajillatača. Pero nii ew sepulturuqui žcatillatača. Jalla nižtiquiztan nii sepulturquin Jesusiž curpu tjatchiča.

JESUSAQUI JACATATCHIČHA

20 ¹ Semana kalltiznan nii tuming wenz chawjc kjantati María

Magdalena sepulturquin ojkchinča. Nekztan cherchinča sepultura pjucžta maz, cjetžtatača. ²Jalla nekztan María Magdalenqui zati pariju ojkchinča, Simón Pedružquin, nižaza nii Jesusiž pecta tjaajinta zoñžquin. (Jalla niiča tii liwru cjiirni Juan cjitaqui.) Jalla naa Mariiqui ninacžquiz paljaychinča, tuž cjican:

—Jesús Jilirž curpu sepulturquiztan chjichtača. Nižaza jakziquin chjichcu tjažtakazlani anača zizzuca.

³Jalla nekztanaqui Pedružtan nii tsjii pecta tjaajinta zoñžtan ulanžcu sepultura cheržni ojkchiča.

⁴Ninacac pucultan juntu zatatča. Nii tsjiiqui tsjan apura zajtchiča Pedružquiztan. Jalla nuž zajtžcu Pedruž tuqui sepulturquin irantichiča.

⁵Irantižcu sepulturquiz colžcu chercherziča, nii Jesusiž curpu tejlžta pañunaca nekzikaz cherziča. Pero ana luzziča. ⁶Niiž wiruñ Simón Pedruqui irantichizakazza. Jalla niiqui sepulturquiz luzziča. Nižaza niiqui Jesusiž curpu tejlžta pañunaca cherziča. ⁷Jesusiž acha jeržinta pañu morokpachalla tsjii latu nonžtatača. Parti pañunacžtan anatača juntu.

⁸Jalla nekztanaqui nii tuqui irantiñi zoñiqui sepulturquiz luzzizakazza. Jalla nii pañunaca cheržcu, criichiča, Jesusa jacatatchi, jalla nii. ⁹Cjiirta Yooz takuqui Jesusaž ticziquiztan jacatatz puntuquiztan chiiča. Pero Jesusiž tjaajintanaqui nii cjiirta Yooz taku imaž tintazatča. ¹⁰Jalla nekztanaqui Pedružtan Juanžtan, jalla nii pucultanaqui kjuya quejpchiča.

MARIA MAGDALENAŽ QUINTU

¹¹Maria Magdalena cjitiqui sepultur zancu želatča, kaacan. Jalla nuž kaacan sepultur kjutni colžcu cherzinča. ¹²Nekz sepulturquiz

pucultan anjilanaca chiw zquiti cutchi želatča. Jakziquiz Jesusa tjažtatažlaja, jalla nekz julzi želatča. Tsjiiqui ach kjuttantača, tsjiiqui kjojch kjuttantača. ¹³Nii anjilanacaqui naaquiz pewcziča:

—Cullacalla, žkjažtiquiztan am kaa? —cjican.

Naaqui tuž kjaaziča:

—Wejt Jilirž curpu chjitchiča. Jakziquin chjitztakazlani, anal zizi atuča.

¹⁴Jalla nuž chiižcu, kjutzquichinča. Jalla nuž kjutžcu Jesusa tsijtsi cherziñča. Pero Jesusa ana pajchinča nii ratu. ¹⁵Nekztan Jesusaqui naaquiz pewcziča, tuž cjican:

—Cullacalla, žkjažtiquiztan am kaa? žJequim kjurya?

Mariiqui persun kuzquiz pinsichinča: “Munti yoka cwitiñi zoñiž caa”, cjican. Jalla nižtiquiztan nižquiz cjichinča:

—Señor, amqui Jesusiž curpu chjitchamžlaj niiqui, maznalla, jakziquin nii curpu cjichamta. Nekztan wejrqui niž curpu chjichasača.

¹⁶Jesusaqui nekztan naaquiz cjichiča:

—iMaría!

Mariiqui nuž chiiñi nonžcu zumpacha kjutzinča. Nekztan Jesusižquiz chiichinča:

—iRaboni! —cjican. Nii takuqui hebreo tawquiz “Maestro” cjiča.

¹⁷Nekztanaqui Jesusaqui naaquiz cjichiča:

—Wejr cutzna. Wejrqui imazil Yooz Ejpžquin okuča. Jaziqui mazni okaquiča weriž tjaajinta jilanacžquin. Tuž cjican maznaquiča: “Wejrqui Yooz Ejpžquin okača. Jalla niiqui wejt Ejpča, nižaza ančuca Ejpzakazza. Nižaza niiča wejt Yoozqui, nižaza ančuca Yoozqui”.

¹⁸ Jalla nekztanaqui María Magdalenqui Jesusiž tjaajintanacžquin mazñi ojkcchinča, tuž cjican:

—Jesusa Jiliri cherchinča.

Nekztan ninacžquin Jesusiž chiitanaca mazzinča.

JESUSAQUI WILTA PARIZICHIČHA

¹⁹ Tumincuqui jalla nii nooj ween niiz tjaajintanacaqui tsjii kjuyquiz želatča. Kjuya zuma chawjcchitača, quintrā žoñinaca ekskū. Jalla nuž cjen Jesusaqui tsijtsi ninacž taypiqueiz parizichiča. Nekztan ninacžquiz tsaanchiča, tuž cjican:

—Ančhucqui walikaz cjee.

²⁰ Jalla nuž tsaanzcu, Jesusaqui ninacžquiz tjeezicha niiz pjetta kjaranacaž, nižaza niiz chjapta ch'illa. Jalla nekztanaqui ninacaqui Jesús Jiliri cheržcu, ancha chipchi cuntintutača.

²¹ Jalla nekztanaqui Jesusaqui wilta ninacžquiz tuž chiichiča:

—Walikaz cjee. Jaknužt Yooz Ejpqui wejr cuhanžquichiča, jalla nižta zakaz wejrqui ančhucaqueiz cuhanžcača.

²² Jalla nuž chiican, Jesusaqui ninacž kjutniž pjuziča, tuž cjican:

—Ančhucqui, Yooz Espiritu Santuž tanzna. ²³ Jakzilta žoñž ujnaca ančhucqui pertunaquiz niiquei, Yooz Epiž pertuntaž cjequičha. Nižaza jakzilta žoñž ujnaca ančhucqui ana pertunaquiz niiquei, ana pertuntaž cjequičha.

WILTA PARIZICHIČHA, TOMAS ŽELAN

²⁴ Nii oraqui nii tuncapan illzta žoñinacžquiztan tsjiiqui ana želatča, Tomás cjita. Niiz tsjii tjuuqui “Pacha” cjitatača. Jesusa tjonž, nii ora ana želatča. ²⁵ Wiruñaquei parti tuncapan tjaajintanacaqui Tomasquiz quint'ichiča, tuž cjican:

—Jesús Jiliri wejrnac cherchinča.

Pero Tomaszi tuž cjichiča:

—Anal criyasača. Wejrqui Jesusiž clawžtan pjetta kjarami ana cheraž niiquei, nižaza nii pjetquiz ana wejt kjar loc'ana chjapznaž niiquei, nižaza niiz ch'ill pjetquiz wejt kjara ana chjapznaž niiquei, jalla nižtiquiztan anal criyasača.

²⁶ Quinsakal tjuñquiztan nii tjaajintanacaqui wilta kjuyquin želatča, Tomastanpacha. Kjuy chajwcchiž cjenami, Jesusaqui ninacž taypiqueiz tsijtsi parizichiča. Nekztan ninacžquiz tsaanchiča, tuž cjican:

—Ančhucqui walikaz cjee.

²⁷ Jalla nekztanaqui Tomasquiz paljaychiča, tuž cjican:

—Wejt kjara chernza. Am kjar loc'ana tekz chjapzna. Nižaza am kjara zijica, wejt ch'illquiz chjapzna. Anapan tira ana criiñi kuzziz cjee. Antiz criya, wejtquiz kuzziz cjee.

²⁸ Tomasqui tuž kjaaziča:

—iWejt Jiliri! iWejt Yooz!

²⁹ Jesusaqui nekztan niizquiz cjichiča:

—Jaziqui Tomás, amqui wejr cheržcu criichamča. Ana wejr cheržcu criichinacaqui, juc'ant waliž cjequičha.

³⁰ Jesusaqui niiz tjaajintanacaž cheran walja milajrunaca paachiča. Parti milajrunacakaz tii libruquiz cijirtatača.

³¹ Jalla tekz cijirta milajrunacaqui wejrqui cijjrchinča ančhucqui criyajo, Jesusaqui Cristučha, nižaza Yooz Majchča, jalla nii. Nižaza cijjrchinča, ančhuc Cristužquin kuzziz cjsjapa, arajpachquin wiñaya kamzjapa.

JESUSAQUI WILTA PARIZICHIČHA

21 ¹ Niiz wiruñ Jesusaqui niiz tjaajintanacžquiz wilta parizichiča, Tiberias kot atquin. Jalla tuž watchiča. ² Nekz želatča, Simón Pedružtan, “Pacha” cjita Tomastan,

Caná de Galilea wajtchiz Natanaelžtan, Zebedeož majchnacžtan, nižaza tsjii pucultan iya tjaajintanacžtan. Jalla ninacauntu želatčha. ³Nekztan Simón Pedruqui cjichičha:

—Wejrqui ch'iz tani okuča.

Nii partinacaqui cjichičha:

—Wejrnacmi amtan chical okačha.

Jalla nekztan kotquin ojckhičha.

Nicju tsjii warcuquin luzzičha. Pakara langzanami ana čhjul ch'izmi tani atchičha. ⁴Kjanžcanalla, Jesusaqui kot atquin parizizquichičha. Nii tjaajintanacaqui ana zizatčha, nii Jesusažlaj, jalla nii. ⁵Nekztanaqui Jesusaqui ninacžquiz cjichičha:

—Jilanaca, čana čhjul ch'izmi tanchinčhuckaya?

Ninacaqui kjaazičha:

—Ana čhjul, —cjican.

⁶Nekztanaqui Jesusaqui ninacžquiz cjichičha:

—Nii warcuž žew latuquiz ch'iz tanz tjojtzna. Jalla nekz ch'iznaca tanznaquičha.

Jalla nuž tjojtžtiquiztan wacchi ch'iznaca tanzčičha. Wacchi ch'iznaca tanchiž cjen, wirataž ana warcuquin joozuca. ⁷Nii Jesusaž ancha k'aachita žoñiqui Pedružquiz cjichičha:

—Niičha Jesús Jiliriqi.

Nuž chiitiquiztan nii orapachalla Pedruqui niž chjojka zquiti cutžcu, kot kjazquin luzzičha, kjazuntu narkan Jesusižquin ojckzjapa. Warcuquiz langzan, ana zquitchiztačha, calzunsillo alaja. ⁸Parti tjaajintanacaqui warcuquiz ojckhičha ch'iz tanzquiz ch'iznaca joocan. Nii ch'iz tanzqui ch'iznacžtan chjiypachatačha. Nii joocan kot atquin macjatžquichičha. Ninacaqui kot atquiztan patac metruž jalla nužquinkaztačha. ⁹Nekztanaqui kot atquin irantižcu, warcuquiztan ulanchičha. Nižaza uj paraza

cherchičha, ch'iz tjucta. Nižaza t'anta želatčha. ¹⁰Nekztanaqui Jesusaqui ninacžquiz cjichičha:

—Tsji kjaž ančhucaž tanta ch'iznaca zjičha.

¹¹Jalla nuž maytiquiztan Simón Pedruqui warcuquiz luzcu nii ch'iznaca kot atquin joožquichičha. Nii ch'iz tanzqui pajk ch'iznacžtan chjiypitačha, patac pjijska tunca quinsani ch'iznacchiztačha. Jalla nuž wacchi tanchiž cjenami, nii ch'iz tanzqui ana wjažzičha. ¹²Jesusaqui ninacžquiz cjichičha:

—Picha. Čheriž lujl-lay.

Ana ultim pajžcumi anaž jecmi nii tjaajintanacžquiztan pewcžni atatčha, “¿Ject amya?” cjicanaqui. Ninacaqui “Jesús Jilirižlani” nuž kuzquiz pinsichičha. ¹³Jalla nekztanaqui Jesusaqui ninacžquin žcatžinžquichičha. T'anta tanžcu, ninacžquiz tjaachičha, nižaza ch'iz zakaz ninacžquiz tjaachičha.

¹⁴Ticziquiztan jacatatžcu, tii čhjep wiltiquiziqui Jesusaqui niž tjaajintanacžquiz parizichičha.

SIMON PEDRUŽQUIZ CHIICHIČHA

¹⁵Jalla nuž čheri lujltiquiztan, Jesusaqui Simón Pedružquiz pewcžičha, tuž cjican

—Simón, Jonás maati, čamqui tii žoñinacžquiztan wejttan juc'anti munazkaya?

Pedruqui tuž kjaazičha:

—Jesalla, wejť Jiliri. Amqui zizza, wejr am pecučha, jalla nii.

Nekztan Jesusaqui nižquiz cjichičha:

—Wejť žoñinacžquiz arajpach čheri tjaa. Ninacačha uuzanacažtakazqui.

¹⁶Nekztan Jesusaqui Pedružquiz wilta pewčičha, tuž cjican:

—Simón, Jonás maati, čamqui wejttan zuma munazkaya?

Pedruqui tuž kjaazičha:

—Jesalla, wejt Jiliri. Amqui zizza, wejr am pecučha, jalla nii.

Jesusaqui niizquiz cjichiča:

—Wejt žoñinaca cwita. Ninacača uuzanacažtakazqui.

¹⁷Nekztanaqui Jesusaqui čhjep wiltiquiziqui Pedružquiz pewczičha:

—Simón, Jonás maati, čamqui wejr peckaya? —cjican.

Pedruqui jalla nuž čhjep wilta pewcztiquiztan llaquita cjissiča. Jalla nekztanaqui Pedruqui tuž kjaaziča:

—Wejt Jiliri, amqui tjapa zizñampanča. Amqui zizza, wejr am pecučha, jalla nii.

Nekztan Jesusaqui niizquiz cjichiča:

—Wejt žoñinacžquiz arajpach čhjeri tjaa. ¹⁸Ultim weraral amquiz chiyučha. Amqui tjowa cjicanaqui zquiti cujtžcu jakziquinam ojcz pecčhaja, ojčñamtača. Pero chawczcužti, amqui kjaram waaznaquiča. Yekja žoñiqui am zquiti tjutznaquiča, nižaza ana amiž ojcz pecta, jalla nijcchuc chjichta cjequiča.

¹⁹Jalla nuž chiižcu, Jesusaqui mazinčiča, jaknužt Pedro ticstančhalaja, nižaza jaknužt Pedruž cjen Yoozquin honora tjaataž cječhaja, jalla nii. Nekztan nuž chiižcu, Jesusaqui Pedružquiz tuž cjichiča:

—Wejt kamañquizka kama.

TJAAJINTA K'AYI ŽOÑI

²⁰Nekztanaqui Pedruqui wir kjutñi kjutžcu, Jesusiž tjaajinta k'ayi žoñž

kjutñi cherziča. Nii tjaajinta k'ayi žoñiqui pascu pjijztiquiz čhjeri lulan, Jesusiž latuquiz želatča. Niiqui Jesusižquiz pewczitača, tuž cjican: “Wejt Jiliri, čject am tankataquiya?”

²¹Jalla nii tjaajinta žoñž kjutñi cheržcu, Pedruqui Jesusižquiz pewczičha, tuž cjicha:

—Wejt Jiliri, čtii žoñžquiz čhjulut wataquiya?

²²Jesusaqui Pedružquiz tuž kjaaziča:

—Wejt tjonzcama tii žoñž žejtz munaž niiqui, ččhjulut amquiz importiya? Wejt kamañquizka kama amqui.

²³Jalla nuž Jesusaž chiitiquiztan, tii quintu ojčchiča, nii tjaajinta k'ayi žoñiqui ana ticznaquiča, jalla nii. Pero Jesusaqui ana nižta chiichiča, “Amqui ana ticznaquiča” cjican. Pero Jesusaqui cjichiča, “Wejt tjonzcama tii žoñž žejtz munaž niiqui, ččhjulut amquiz importiya?” Jalla nužkaz cjichiča.

²⁴Wejrpachača nii tjaajinta k'ayi žoñiqui. Wejrqui tii cartiquiz cijjrtanaca maznuča. Nižaza tii liwruquiz cijjruča. Nižaza criichi žoñinacaqui zizza, weriž mazta taku werarapanča.

²⁵Nižaza iya juc'anti Jesusaž paatanaca žejlča. Tjapa niiž paatanaca cijjrta cjesaž niiqui, nii cijjrta liwrunaca tjapa tii muntuquiz chjijsnasača. Nižaza iya juc'anti želaquiča. Nužukazza. Amén.